


國學基
本叢書
明詩別裁



上海图书馆藏书



A541 212 0006 1949B

~~172277~~

書叢本基學國

明 詩 別 裁

沈德潛 周準 選



商務印書館發行

本書係用萬有文庫版本
印行原裝分訂二冊每冊
面數各自起迄今合訂一
冊面數仍舊讀者鑒之

沈序

宋詩近腐。元詩近纖。明詩其復古也。而二百七十餘年中。又有升降盛衰之別。嘗取有明一代詩論之。洪武之初。劉伯溫之高格。並以高季迪袁景文諸人。各逞才情。連鑣並軫。然猶存元紀之餘風。未極隆時之正軌。永樂以還。體崇臺閣。軌馘不振。弘正之間。獻吉仲默。力追雅音。庭實昌穀。左右騁。斬古風未墜。餘如楊用修之才華。薛君采之雅正。高子業之沖淡。俱稱斐然。于鱗元美。益以茂秦。接踵曩哲。雖其間規格有餘。未能變化。識者咎其尠自得之趣焉。然取其菁英。彬彬乎大雅之章也。自是而後。正聲漸遠。繁響競作。公安袁氏。竟陵鍾氏。譚氏。比之自鄣無譏。蓋詩教衰而國祚亦爲之移矣。此升降盛衰之大略也。編明詩者。陳黃門臥子。皇明詩選。正德以前。殊能持擇。嘉靖以下。形體徒存。尙書錢牧齋。列朝詩選。於青邱茶陵外。若北地信陽濟南婁東。概爲指斥。且藏其所長。錄其所短。以資排擊。而於二百七十餘年中。獨推程孟陽一人。而孟陽之詩。纖詞浮語。祇堪爭勝於陳仲醇諸家。此猶舍丹砂而珍溲勃。貴箏琶而賤清琴。不必大匠國工。始知其誣妄也。國朝朱太史竹垞。明詩綜。所收三千四百餘家。泯門戶之見。存是非之公。比之牧齋。用心判別。然備一代之掌故。匪示六義之指歸。良楛正閏。雜出錯陳。學者將問道以親風雅。其何道之由。余與周子欽。萊夙有同心。慨焉決擇。合羣公選本。暨前賢名彙。別而裁之。於洪永之詩。刪其輕靡。於弘正嘉隆之詩。汰其形似。萬曆天啓以下。遂寥寥焉。而勝國遺老。廣爲搜羅。比宋逸民谷音之選。得詩十

二卷。凡一千一十餘篇。皆深造渾厚。和平淵雅。合於言志永言之旨。而雷同沿襲。浮艷淫靡。凡無當於美刺者。屏焉。有明之詩。誠見其陵宋躐元而上追前古也。至楊廉夫倪元鎮諸公。歸諸元人。錢牧齋吳梅村諸公。歸諸國朝人。編詩之中。微具國史之義。其他前後七子。或存或刪。理學諸子。古文名家。與夫黨錮殉國諸賢。有及有不及。因詩存人。不因人存詩也。寡聞單見。挂漏良多。尙期博雅君子。歛啓未逮。乾隆三年秋七月望日。長洲沈德潛題於靈巖山居。

周序

選明詩者衆矣。於才藻者類鮮風裁。尙規格者徒存體貌。二者交失。夫風裁不具。洪永所以未極於盛體。貌徒存。嘉隆所以漸卽於衰也。決擇之際。詎不重哉。歸愚沈子。夙有明詩之選。予嘗與之參酌訂定。上自廊廟。下迄山林。旁及方外異域。遇有可採。悉爲收入。不求備乎人。亦未嘗偏遺乎人。凡以輔翼詩教云爾。抑予觀陳臥子明詩選。其所採取。時有刪潤。故所收較完美。是編所錄。務從善本。其有名言可采而疵類並見者略焉。以是書之選。欲上續唐人。不敢不從其嚴也。書旣成。釐爲十二卷。其作者里居出處。亦略附焉。至於明詩盛衰升降之際。歸愚子之論詳矣。故不復贅。乾隆戊午仲秋。長洲周準題。

蔣序

歸愚沈先生選明詩別裁集成。共一十二卷。起國初諸臣。青田青邱。兩雄並峙。開風尚也。永樂以還。體尚臺閣。所收從略。防膚浮也。成弘之代。茶陵振興。紹先啓後。標引導也。北地信陽。義娥經緯。邊徐輔協。左右驂靳。紀極盛也。升庵挺生。雲興春麗。叔嗣別操。冰襟雪抱。志特立也。弇州雄闊。濟南矜貴。茂秦斗拔。除蕪就潔。表繩武也。隆萬以後。或奏畫聲。或漂鬼國。嚴刪薙也。雲間卓立。漸臻壺奧。識復古也。板蕩變操。各寫幽噫。茹芝采菊。初心靡悔。存餘響也。始端宗旨。繼審規格。終流神韻。三長具備。迺登卷帙。視從前明詩之選。備一朝掌故者。殊厥旨焉。先生向有古詩源。唐詩別裁問世。茲編風旨。除纖去濫。簡嚴和厚。可續唐音。而宋金元詩。尙俟采葺云。乾隆己未秋七月望日。古吳蔣重光題於賦琴樓。

明詩別裁目錄

第一冊

卷一

劉基二十首

汪廣洋三首

宋濂一首

陶凱一首

張昱三首

宋訥四首

張以寧六首

魏觀一首

詹同一首

高啓二十一首

明詩別裁目錄

楊基八首

卷二

張羽五首

徐賁三首

林弼一首

王蒙一首

張簡一首

王彝一首

劉炳三首

郭翼一首

袁凱八首

周致堯一首

明詩別裁目錄

劉崧三首
周湏一首
王旬一首
周立一首
林鴻九首
貝瓊五首
凌雲翰一首
邱民一首
練高一首
管訥一首
張宣一首
魯淵一首
李延興四首
孫蕢四首

黃哲二首
沈夢麟一首
滕毅一首
藍仁三首
藍智二首
甘瑾二首
王偁一首
浦源一首
吳文泰一首
烏斯道一首
許繼一首
胡奎二首
顧文昱一首

卷三

高 棟 四首

王 恭 二首

卞 同 一首

鄭 真 一首

鄭 灝 一首

練子寧 一首

方孝孺 五首

程本立 二首

袁敬所 一首

趙 玃 一首

解 縉 一首

楊士奇 二首

谷 宏 一首

趙 文 一首

趙友同 一首

曾 槩 三首

李昌祺 二首

尹鳳岐 一首

金 誠 一首

黃 閏 一首

沈 貞 七首

薛 瑄 一首

于 謙 二首

劉 球 一首

施 敬 二首

黃 裳 一首

劉 績 四首

錢 暉 二首

蕭 鎡一首

王 清一首

郭 登四首

張 和一首

陳憲章一首

范 澄一首

沈 愚一首

陸德蘊一首

陳 寬一首

王 越一首

蘇 平一首

王 佐一首

秦 夔一首

李東陽十一首

卷四

莊 景二首

戴 縉一首

周 瑛一首

吳 寬一首

楊一清三首

文 林一首

王 鏊一首

馬中錫二首

邵 寶二首

喬 宇一首

王雲鳳一首

文 森一首

沈 周二首

史鑑一首

戴冠一首

莫止一首

李夢陽四十七首

卷五

邊貢十三首

顧璘三首

王守仁三首

何景明四十九首

王廷相六首

卷六

徐禎卿二十三首

殷雲霄一首

孟洋一首

王韋二首

鄭善夫四首

孫一元二首

韓邦靖一首

張含一首

胡纘宗一首

戴冠一首

駱用卿一首

楊慎十五首

常倫二首

周在一首

薛蕙十一首

許宗魯四首

王廷陳三首

敖英二首

蔡羽二首

文徵明二首

王寵六首

金鑾二首

第二冊

卷七

高叔嗣九首

徐階二首

鄭旦一首

張時徹二首

蘇祐三首

華察六首

陸粲一首

袁袞四首

王慎中三首

皇甫沖二首

皇甫汈十首

唐順之三首

陳束二首

黃省曾一首

錢鏞六首

尹耕十首

皇甫湜八首

蔡楠一首

黎民表三首

沈鍊三首

翁大立一首

王 問 二首

徐文通 一首

陳臯謨 一首

張居正 一首

楊繼盛 一首

楊 巍 二首

姚汝循 二首

魏時亮 一首

申時行 二首

唐 鉞 一首

許邦才 一首

皇甫濂 二首

卷八

李攀龍 三十五首

明詩別裁 目錄

章美中 五首

王世貞 四十首

謝 榛 二十六首

卷九

張佳胤 四首

梁有譽 二首

吳國倫 六首

徐中行 二首

宗 臣 三首

張九一 一首

王世懋 二首

潘 緯 一首

張邦伊 一首

戚繼光 一首

明詩別裁 目錄

歐大任 四首

張元凱 一首

陳鶴 二首

徐渭 一首

沈明臣 二首

唐詩 一首

黃姬水 一首

袁景休 一首

嵇元夫 二首

居節 一首

孫良器 一首

王叔承 一首

王穉登 三首

汪時元 一首

蔡文範 二首

黃洪憲 一首

李三才 一首

朱期至 一首

馮琦 一首

朱國祚 三首

徐學聚 一首

湯顯祖 一首

徐燧 十五首

陶望齡 一首

高攀龍 五首

傅新德 一首

區大相 四首

鄭明選 三首

歸子慕九首

卷十

謝肇淛四首

袁宏道一首

曹學佺八首

蔡毅中一首

公鼎三首

李流芳四首

唐時升二首

程嘉燧四首

楊漣一首

王象春一首

賀萬祚一首

高道素一首

陳鳴鶴一首

周永年一首

王人鑑一首

吳稼澂一首

宋登春一首

孫友麓一首

俞安期三首

何白一首

鄭琰一首

盛鳴世一首

沈木一首

王屋二首

吳夢暘一首

范汭二首

吳兆一首

徐燠三首

文震孟一首

徐石麟一首

倪元璐一首

蔣燦二首

徐汧一首

萬壽祺二首

馬世奇一首

楊廷麟一首

張溥一首

姜埰一首

顧咸正一首

陳宗之 一首

謝遴一首

吳本泰一首

萬泰一首

閻爾梅一首

劉永錫一首

陳子龍十九首

卷十一

梁朝鐘一首

方以智一首

黃周星一首

陳瑚三首

徐枋一首

譚貞良二首

黃淳耀三首

吳 易 三首

黃翼聖 一首

周立勳 三首

夏完淳 四首

鄭 露 七首

劉 城 一首

沈壽民 一首

邢 昉 三首

施 武 二首

葉 襄 二首

陸 圻 一首

沈欽圻 五首

顧夢游 三首

錢秉鐙 八首

明詩別裁 目錄

顧 絳 十六首

韓 洽 六首

朱鶴齡 一首

陳 忱 一首

李 沂 二首

王 翊 二首

沈自然 一首

屠 曠 一首

卷十二

龔 賢 一首

顧 苓 一首

杜 濬 五首

方 文 一首

岑 徵 一首

紀映鍾一首

申涵光二首

蔣易一首

戴冠一首

費密二首

朱茂暉一首

朱茂曙一首

王光承一首

俞汝言一首

張綱孫四首

吳騏七首

周篔二首

陳恭尹七首

徐夜一首

余懷二首

潘問奇三首

周同谷一首

梵琦四首

宗泐二首

守仁一首

道衍一首

大回一首

明秀一首

宗倫一首

通潤一首

道源一首

讀徹二首

今種六首

以下方外

郭貞順一首 以下名婉

陸娟一首

沈瓊蓮一首

屈安人一首

黃安人一首

方維儀三首

黃幼藻一首

商景蘭一首

曹壽奴一首

喫遜一首 以下外國

申從濩一首

崔澱一首

成侃一首

林悌一首

姜克誠一首

李仁老一首

鄭之升一首

許景樊二首

李氏一首

占城貢使一首

洞庭老人一首

無名氏一首

明詩別裁

卷一

劉

基

基字伯溫青田人元進士洪武中以佐命功封誠意伯後爲胡惟庸毒死正德中追謚文成元季詩都尙辭華文成獨標高格時欲追逐杜韓故超然獨勝尤爲一代之冠○樂府高

於古詩古詩高於近體五言近體又高於七言

走馬引

天冥冥雲濛濛。當天白日中貫虹。壯士拔劍出門去。手提鬢頭擲草中。擲草中血漉漉。追兵夜至深谷伏。精誠感天天心哀。太一乃遣天馬從天來。揮霍雷電揚風埃。壯士呼天馬馳橫行白晝。吏不敢窺戴天之恥。自古有必報。天地亦與相扶持。夫差徒能不忘而報越。棲於會稽又縱之。始知壯士獨無愧。魯莊何以爲人爲。錢受之云明宗被弑於晃忽又庚申帝卽位七年乃以尙書之言撤文宗主於太廟而詔書但以私圖傳子爲言昧於春秋復讐之大義矣此詩蓋深譏之

梁甫吟

誰謂秋月明。蔽之往往由纖翳。誰謂江水清。淆之往往隨沙泥。人情旦暮有翻覆。平地倏忽成山谿。君不見桓公相仲父。豎刁終亂齊。秦穆信逢孫。遂違百里奚。赤符天子明。見萬里外。乃以薏苡爲文犀。停婚仆碑何震怒。青天白日生虹蜺。明良際會有如此。而況童角不辨粟與稊。外間皇父中豔妻。馬角突兀連牝

雞以聰爲聾。狂作聖。顛倒衣裳行。蒺藜屈原懷。沙子胥棄。魍魅叫嘯風。淒淒梁甫吟。悲以悽。岐山竹實日稀少。鳳凰憔悴將安棲。拉雜成文。極煩冤噴亂之致。此離騷遺音也。

懊懷歌

白鴉養雛時。夜夜啼達曙。如何羽翼成。各自東西去。其法本之打起黃鸞兒篇。

薤露歌

人生無百歲。百歲復如何。古來英雄士。各已歸山阿。悲咽。

玉階怨

長門燈下淚。滴作玉階苔。年年傍春雨。一上苑牆來。婉而曲。

長門怨

白露下玉除。風清月如練。坐看池上螢。飛入昭陽殿。宗子相云。不作怨語。怨已自深。

感懷

驅車出門去。四顧不見人。回風卷落葉。颯颯帶沙塵。平原曠千里。莽莽盡荆榛。繁華能幾何。憔悴及茲辰。所以芳桂枝。不爭桃李春。雲林耿幽獨。霜雪空相親。

槁葉寒緘緘。羅帳秋風生。悽悽候蟲鳴。嚶嚶賓鴻驚。美人抱瑤瑟。仰視河漢明。絲桐豈殊音。古調非今聲。

沉思空幽寂。歲月已徂征。
結髮事遠游。逍遙觀四方。天地一何闊。山川杳茫茫。衆鳥各自飛。喬木空蒼涼。登高見萬里。懷古使心傷。
竚立望浮雲。安得凌風翔。

旅興

寒燈耿幽幕。蟲鳴清夜闌。起行望青天。明月在雲端。美人隔千里。山河杳漫漫。玄雲翳崇岡。白露凋芳蘭。
願以綠綺琴。寫作行路難。憂來無和聲。絃絕空長歎。
倦鳥冀安巢。風林無靜柯。路長羽翼短。日暮當如何。登高望四方。但見山與河。寧知天上雨。去爲滄海波。
愴慨對長風。坐感玄髮皤。弱水不可航。層城岌嵯峨。淒涼華表鶴。太息成悲歌。

晚同方舟上人登師子巖作

落日下前峯。輕煙生遠林。雲霞媚餘姿。松柏淡清陰。振策縱幽步。披襟陟層岑。槿花籬上明。莎雞草間吟。
涼風自西來。颼颼吹我襟。榮華能幾時。搖落方自今。逝川無停波。急絃有哀音。顧瞻望四方。悵焉愁思深。
夏夜台州城中作

江上火雲蒸熱風。欲雨不雨天夢夢。良田半作龜兆坼。秔稻日夕成蒿蓬。去年海賊殺元帥。黎民星散劫
火紅。耕牛剝皮作戰具。鋤犂化盡刀劍鋒。農夫有田不得種。白日慘澹衡茅空。將軍虎毛深玉帳。野哭不

入轅門中健兒鬪死烏自食。何人幕下矜奇功。今年大軍蕩淮甸。分命上宰麾元戎。舞干再見有苗格。山川鬼神當效忠。何爲旱魃還肆虐。坐令毒沴傷和沖。傳聞逆黨尙攻剽。所過邱隴皆成童。闔司恐懼破和議。斥堠悉罷雲邊烽。殺降共說有大禁。無人更敢彎弧弓。山中悲啼海中笑。蜃氣繞日生長虹。古時東海辟孝婦。草木枯瘁連三冬。六月降霜良有以。天公未必長瘖聾。只今幅員廣無外。東至日出西太蒙。一民一物吾肺腑。仁者自是哀癯痾。養臬殪鳳天所厭。誰能抗疏回宸聰。夜長木末挂河漢。海嶠月魄升天東。仰視皇天轉北斗。嗚呼愁歎何時終。

太公釣渭圖

璇室羣酣夜。璜溪獨釣時。浮雲看富貴。流水淡鬚眉。偶應非熊兆。尊爲帝者師。軒裳如固有。千載起人思。
通首格高隱然
有王佐氣象

古戍

古戍連山火。新城殷地笳。九州猶虎豹。四海未桑麻。天迴雲垂草。江空雪覆沙。野梅燒不盡。時見兩三花。

望孤山作

返照千山赤。寒煙一島青。羈心霜下草。生態水中萍。黃屋迷襄野。蒼梧隔洞庭。空將垂老淚。灑恨到滄溟。

會稽

會稽南鎮夏王封。蔽日騰空紫翠重。陰壑煙霞輝草木。古祠風雨出蛟龍。玄夷此日歸何處。玉簡他年豈再逢。安得普天休戰伐。不令竹箭困輸供。

和李子庚

風落餘花春事非。愁心煙雨共霏霏。溪雲不爲從龍起。山石何須學燕飛。籬下舊存彭澤菊。林間新長首陽薇。夜闌忽漫聞啼鳥。腸斷天邊信使稀。

追和音上人

絕頂浮雲鎖石關。曲途危磴阻躋攀。他年甲楯孤臣泣。此日齋鐘老衲閑。夜永星河低半樹。天清猿鶴響空山。干戈未定歸無處。擬結茅廬積翠間。

感興

天弧不解射封狼。戰骨縱橫滿路旁。古戍有狐鳴夜月。高岡無鳳集朝陽。瑠戈畫戟空文物。廢井頽垣自雪霜。漫說漢庭思李牧。未聞郎署遣馮唐。

汪廣洋

廣洋字朝宗。高郵人。洪武中封忠勤伯。拜右丞相。尋貶廣東。詔數其罪。自縊死。

忠勤樓諸老夜直余時守省作詩寄之

西掖延秋爽。高樓倚太清。玉繩當坐轉。銀漢近人明。上相思經濟。諸公任老成。不知前席夜。曾語及蒼生。

送許時用歸越一作王禕

舊擢庚寅第。新題甲子篇。老來諸事廢。歸去此身全。煙樹藏溪館。霜禾被石田。鑑湖求一曲。吾計尙茫然。

當時有歸去而身未全者。宋潛溪是也。

登南海驛樓

海氣空濛日夜浮。山城纔雨便成秋。馮唐頭白偏多感。倚遍天南百尺樓。

宋

濂濂字景濂。浦江人。元末除翰林學士。承旨正德中。追諡文憲。

送許時用還剡

尊酒都門外。孤帆水驛飛。青雲諸老盡。白髮幾人歸。風雨魚羹飯。煙霞鶴氅衣。因君動高興。予亦夢柴扉。

陶

凱凱字中立。天台人。洪武初。召修元史。陞禮部尙書。出爲湖廣參政。旋致仕。

長平戈頭歌

長安野人鑿地得古戈。上有疑字歲久俱滅磨。惜不能如豐城古劍射牛斗。吁嗟戈乎奈爾何。但見青銅凝寒暮。煙紫月黑山深夜。飛雨恨血千年猶未銷。荒郊夜夜啼冤苦。當年趙括輕秦人。降卒秦坑化爲土。嗟哉趙亡秦亦亡。落日長城自今古。摩挲爾戈一問之。令人爲爾生愁思。何不以爾爲鐘鐻。何不以爾爲鼎彝。吁嗟戈乎徒爾悲。爾今還當太平世。人間銷兵鑄農器。願壽吾皇千萬年。終古不用戈與鉞。當時諸名家賦

此題者俱作七言長歌。惟作者得頌揚本朝之體。

張

昱

昱字光弼廬陵人遷杭元末行樞密院判官明祖召至深見溫接憫其老曰可閑矣放歸○光弼嘗於酒間爲瞿宗吉誦歌風臺詩云世間快意寧有此亭長歸來作天子以界尺擊案

淵淵作金石聲詩劇可傳惜中間雜失韻語因割愛刪去

白翎雀歌

烏桓城下白翎雀。雄鳴雌隨求飲啄。有時決起天上飛。告訴生來毛羽弱。西河伶人火倪赤。能以絲聲代禽臆。象牙指撥十三絃。宛轉繁音哀且急。女真處子舞進觴。團衫鞞帶分兩旁。玉織羅袖柘枝體。要與雀聲相頡頏。朝彈暮彈白翎雀。貴人聽之以爲樂。變化春光指顧間。萬蕊千花動弦索。只今蕭條河水邊。宮庭毀盡沙依然。傷哉不聞白翎雀。但見落日生寒煙。

感事

雨過湖樓作晚寒。此心時暫酒邊寬。杞人惟恐青天墜。精衛難期碧海乾。鴻雁信從天上過。山河影在月中看。洛陽橋上聞鶻處。誰識當時獨倚闌。

如此江山清集同王仲玉陸進之呂世臣作

如此江山亭名清集猶云雅集

吳越江山會此亭。暮春風景畫冥冥。長空孤鳥望中沒。落日數峰煙外青。不用登臨生感慨。且憑談笑慰飄零。古今何限英雄恨。付與江湖醉客聽。悲壯蒼涼不勝舉目山河之異新亭雪涕前後同情

宋

訥字仲敏滑縣人元季官鹽山知縣明初徵爲國子助教官至文淵閣大學士遷祭酒卒於官

壬子秋過故宮

離宮別館樹森森秋色荒寒上苑深北塞君臣方駐足中華將帥已離心隆祖名元世有管鸞笙歇

正斧名以玉爲之自殷時流傳至元代者朝會時一人執之立於陛下取正人不正之意無官玉斧沉落日憑高望燕薊黃金臺上棘如林

萬國朝宗拜紫宸於今誰望屬車塵名聞少室徵奇士驛斷高麗進美人朝會寶燈沉轉漏授時玉曆罷

班春街頭野服儒冠老曾是花磚視草臣

萬年海岳作金湯一望凄然恨自長禾黍秋風周洛邑山河殘照漢咸陽上林春去宮花落金水霜來御

柳黃虎衛龍墀人不見戎兵騎馬出蕭牆

清寧宮殿閉殘花塵世回頭換物華寶鼎百年歸漢室錦帆終古似隋家後宮鸞鏡投江渚北狩龍旗沒

塞沙想見扶蘇城上月照人清淚落悲笳

張以寧以寧字志道古田人元末官翰林學士承旨初例徙南京召爲侍讀學士使安南道卒

峨眉亭

碧酒雙玉瓶獨酌峨眉亭不見李太白惟見三山青秋色淮上來蒼然滿雲汀安得十五弦彈與蛟龍聽

秋色淮上來二十字何減太白

送重峰阮子敬南還

君家重峰下。我家大溪頭。君家門前水。我家門前流。我行久別家。思憶故鄉水。況乃故鄉人。相見六千里。十年在揚州。五年在京城。不見故鄉人。見君難爲情。見君情尙爾。別君奈何許。送君遽不堪。憶君良獨苦。君歸過江上。爲問水中魚。別時魚尾赤。別後今何如。情致纏綿神似飲馬長城窟詩。

送同年江學庭弟學文歸建昌

白髮江夫子。青雲信獨稀。故人長北望。令弟又南歸。庭樹烏先喜。江帆雁共飛。東湖春柳色。到日上君衣。過辛稼軒神道

長嘯秋雲白石陰。太行天黨氣蕭森。英雄已盡中原淚。臣主元無北伐心。歲晚陰符仙蠹化。夜寒雄劍老龍吟。青山萬折東流去。春暮鶉啼宰樹林。

嚴陵釣臺

故人已乘赤龍去。君獨羊裘釣月明。魯國高名懸宇宙。漢家小吏待公卿。天回御榻星辰動。人去空臺山水清。我欲長竿數千尺。坐來東海看潮生。明人詠嚴陵者以此章爲最。如羞見先生面。黃昏過釣臺。不有一章。議論極正。但語近於腐。且廢郭后事在徵嚴光以後。於事不合。故舍旃。

有感

馬首桓州又懿州。朔風秋冷黑貂裘。可憐吹得頭如雪。更上安南萬里舟。

魏

觀字杞山。蒲圻人。洪武初就徵。歷仕至國子祭酒。兩知蘇州府事。改修府治為指揮某告訐。尋受御史張度所劾。坐法死。

都昌懷舊隱

江霧仍為雨。山花故作容。秋風餘鼠雀。寒水落魚龍。慷慨心雖壯。羈棲力已慵。白雲菴浦上。悵望最高峰。

詹

同字同文。婺源人。元末為郴州路學正。遇亂家黃州。任陳友諒為翰林學士。承旨歸附後。授國子博士。累官吏部尚書。改翰林學士。承旨卒。諡文憲。

出獵圖

朔風凜凜吹龍沙。年年馬上長為家。陰山大漠百草死。獵遍青海瀕天涯。旌旗裂盡霜華濕。萬騎貔貅似雲集。蒼鷹歛翅若飛電。四尺神獒作人立。什圍五攻兵法存。發蹤指示知何人。豈無詭遇獲禽者。誰能為爾梟鬩分。直將勇氣飽所欲。寢虎之皮食虎肉。生擒山下九青兕。射殺巖前雙白鹿。日暮歸來雪洗箭。血灑腥風滿河曲。穹廬散野如繁星。涼月蕭蕭照平陸。酪漿跪進瑪瑙盤。黃面奚奴眼睛綠。明朝滿馬馱爛斑。蕃王喜生紅玉顏。焉知祝網三驅意。但醉氍毹紫塞間。君不見暴殄天物焚咸邱。畫師之筆學春秋。還君此圖三太息。使我忽憶比蒲菟。

高

啓字季迪。長洲人。洪武初召修元史。授翰林院國史編修。擢戶部侍郎。放還。為魏觀作上梁文。連坐死。○侍郎詩。上自漢魏盛唐。下至宋元諸家。靡不出入其間。一時推大作家。特才調

有餘。蹊徑未化。故一變元風。未能直追大雅。集中所存皆最上者。

塞下曲

日落五原塞。蕭條亭堠空。漢家討狂虜。籍役滿山東。去年出飛狐。今年出雲中。得地不足耕。殺人以為功。登高望衰草。感歎意何窮。為千古開邊者垂戒。

悲歌

征塗嶮巇。人乏馬飢。富老不如貧少。美游不如惡歸。浮雲隨風。零落四野。仰天悲歌。泣數行下。

顧榮廟

晉侍中顧彥先。有墓并祠在長洲之東。久而廢為淫祀。縣令周君復之。為賦是詩。

軍司吳國秀。神機夙超朗。弱冠游洛師。已蒙南金賞。崎嶇諸王幕。沉湎務遵養。中罹廣陵艱。計服匪誠枉。風雲一揮扇。義旅臻同響。事成恥言勳。飄然理歸鞅。晉社始東遷。羣賢悉收獎。道謁真感會。矯翼丹霄上。德聞一代稱。跡泯千齡往。時屯乏良佐。英謨益堪想。墳祠託荒郊。蕭條並榛莽。堯童侵雨隧。淫巫闖塵幌。大夫過停轅。式瞻為含愴。衣冠復故貌。筵几陳新享。寡劣忝鄉人。因歌表遐仰。李舒章云。似謝康樂。

支遁菴

閑登待月嶺。遠叩棲雲關。石室閉千載。高僧猶未還。殘燈黃葉下。古座青苔間。不見跣趺影。鶴鳴空此山。憶昨行寄吳中故人

憶昨結交游。俠客意氣相。傾無促戚。十年離亂如不知。日費黃金出遊劇。狐裘蒙茸欺北風。霹靂應手鳴雕弓。桓王地下衰草白。彷彿地是遼城東。馬行雪中四蹄熱。流影欲追飛隼滅。歸來笑學曹景宗。生擊黃獐飲其血。臯橋秦娘雙翠蛾。喚來尊前爲我歌。白日欲沒奈愁何。迴潭水綠春始波。此中夜遊樂更多。月出東山白雲裏。照見船中笛聲起。驚鷗飛過片片輕。有似梅花落江水。夫差城南天下稀。狂遊累日忘卻歸。座中爭起勸我酒。但道飲此毋相違。自從飄零各江海。故舊如今幾人在。荒煙落日野烏啼。寂寞青山顏亦改。須知少年樂事偏。當飲豈得言無錢。我今齒髮雖未老。豪健已覺難如前。去日已去不可止。來日方來猶可喜。古來達士有名言。只說人生行樂耳。跌踢淋漓神來之候。○結處頗近率易。故陳臥子選節去後六句。然終似神氣未舒。故仍從原本。

明皇秉燭夜遊圖

花萼樓頭日初墮。紫衣催上宮門鎖。大家今夕宴西園。高爇銀盤百枝火。海棠欲睡不得成。紅妝照見殊分明。滿庭紫燄作春霧。不知有月空中行。新譜霓裳試初按。內使頻呼燒燭換。知更宮女報銅籤。歌舞休催夜方半。共言醉飲終此宵。明日且免羣臣朝。只愁風露漸欲冷。妃子衣薄愁成嬌。琵琶羯鼓相追逐。白日君心歡不足。此時何暇化光明。去照逃亡小家屋。姑蘇臺上長夜歌。江都宮裏飛螢多。一般行樂未知極。烽火忽至將如何。可憐蜀道歸來客。南內淒涼頭盡白。孤燈不照返魂人。梧桐夜雨秋蕭瑟。光明燭二夷中田家詩。意與題中秉燭相應。巧而不纖。

贈金華隱者

我聞名山洞府三十六。一靈蹤紀真錄。金華秀出向東南。遠勝陽明與句曲。樓臺縹緲開煙霞。天帝賜與神仙家。靈源有路不可入。但見幾片流出雲中花。子房之師赤松子。三千年前亦居此。飛行恍惚誰解尋。漫說至今猶不死。松花酒熟何處遊。瑤草自綠春巖幽。羣羊臥地散如石。老鹿耕田馴似牛。聞有隱君子。乃是學仙者。自從入山中。不會到山下。世人莫知其姓名。以山呼之不敢輕。樵夫忽見苦未識。只疑便是黃初平。嗟我何爲在塵網。遠望高峯若天壤。茯苓夜煮儻許餐。鐵杖來敲石門響。松花瑤草一聯。太白佳境。

聽教坊舊妓郭芳卿弟子陳氏歌

時至正己亥歲作。

文皇元文宗

在御昇平日。上苑宸遊駕頻出。仗中樂部五千人。能唱新聲誰第一。燕國佳人號順時。郭芳卿字。姿

容歌舞總能奇。中官奉旨時宣喚。立馬門前催畫眉。建章宮裏長生殿。芍藥初開勅張宴。龍笙罷奏鳳絃停。共聽嬌喉似鶯囀。遏雲妙響發朱唇。不數開元許永新。繡階花驚飄豔雪。文梁風動委芳塵。翰林才子山東李。洞每進新詞蒙上喜。當筵按罷謝天恩。捧賜纏頭蜀都綺。晚出銀臺酒未消。侯家主第強相邀。寶釵珠袖尊前賞。占斷春風夜復朝。回頭樂事浮雲改。瘞玉埋香今幾載。世間遺譜竟誰傳。弟子猶憐一人在。曾記霓裳學得成。朝元閣裏藝初呈。九天聲落千人聽。丹鳳樓前月正明。狹斜貴客叢車馬。不信芳名在師下。風塵一旦禁城荒。誰是花前聽歌者。從此飄零出教坊。遠辭京國客殊方。閉門春盡無人問。縞袂

青裙不理妝。相逢爲把雙蛾蹙。水調涼州歌續續。江南年少未曾聞。元是當時供奉曲。朝使今年海上歸。繁華休說亂來非。梨園散盡宮槐落。天子愁多內宴稀。始知歡樂生憂患。韓休老去無人諫。傷心不見昔人歌。汾水秋風有飛雁。此日西園把一卮。感時懷舊盡成悲。含情欲爲秋娘賦。愧我才非杜牧之。與少陵大娘弟子舞劍器歌同一用意。蓋惓惓故國之思。意不在教坊弟子也。而詩格則在元和長慶之間。

登金陵雨花臺望大江

大江來從萬山中。山勢盡與江流東。鍾山如龍獨西上。欲破巨浪乘長風。江山相雄不相讓。形勝爭誇天下壯。秦皇空此瘞黃金。佳氣蔥蔥至今王。我懷鬱塞何由開。酒酣走上城南臺。坐覺蒼茫萬古意。遠自荒煙落日之中來。石頭城下濤聲怒。武騎千羣誰敢渡。黃旗入洛竟何祥。鐵鎖橫江未爲固。前三國。後六朝。草生宮闕何蕭蕭。英雄來時務割據。幾度戰血流寒潮。我今幸逢聖人起南國。禍亂初平事休息。從今四海永爲家。不用長江限南北。

張中丞廟

延秋門上烏啼霜。羯兒曉登天子牀。江頭老臣淚暗滴。萬乘西去關山長。公卿相率作降虜。草間拜泣如羣羊。當時不識顏平原。豈復知有張睢陽。孤城落日百戰後。瘦馬食尾人裹瘡。男兒竟爲忠義死。碧血滿地嗟誰藏。賀蘭不斬上方劍。英雄有恨何時忘。千年海上見祠廟。古苔叢木秋風荒。摩挲畫壁塵網裏。勇

氣曄曄虬髯張。巫歌大招客。酌酒忠魂或能來故鄉。

唐昭宗賜錢武肅王鐵券歌

妖兒初下含元殿。天子仍居少陽院。諸藩從此擁連城。朝貢皆停事攻戰。岐王一去梁王來。長安宮闕生蒿萊。天目山前異人出。金戈雙舉風煙開。羅平惡鳥啼初起。犀弩三千射潮水。歸來父老拜旌旗。醜酒搥牛宴鄉里。擊裘駿馬驕春風。錦袍玉帶真英雄。詔書特賜誓終始。黃金鏤字旌殊功。虎符龍節彤弓矢。後嗣猶令赦三死。盡言恩寵冠當時。天府丹書未逾此。摩挲舊物四百年。古色滿面凝蒼煙。天祐宰相署名在。尋文再讀心茫然。古來保族須忠節。受此幾人還覆滅。王家勳業至今傳。不在區區一方鐵。人生富貴知幾時。泰山作礪徒相期。行人曾過表忠觀。風雨斷蘚葬殘碑。

送謝恭

涼風起江海。萬樹盡秋聲。搖落豈堪別。躊躇空復情。帆過京口渡。砧響石頭城。爲客歸宜早。高堂白髮生。

與劉將軍杜文學晚登西城

木落悲南國。城高見北辰。飄零猶有客。經濟豈無人。鳥過風生翼。龍歸雨在鱗。相期俱努力。天地正烽塵。

壯悲

晚次西陵館

匹馬倦嘶風。蕭蕭逐轉蓬。地經兵亂後。歲盡客愁中。晚渡迴潮急。寒山舊驛空。可憐今夜月。相照宿江東。

送沈左司從汪參政分省陝西汪由御史中丞出

重臣分陝去臺端。賓從威儀盡漢官。四塞河山歸版籍。百年父老見衣冠。函關月落聽雞度。華岳雲開立馬看。知爾西行定回首。如今江左是長安。音節氣味格律詞華無不入妙青邱集中爲金和玉節

送葉判官赴高唐時使安南還

銅柱崖前使節過。貢隨歸騎入京多。一官暫遣陪成瑨。片語曾煩下趙佗。曉拜賜衣辭絳闕。秋催征棹渡黃河。政餘好賦登臨詠。聞說州人最善歌。南陽太守成瑨任功曹岑暉時謠曰南陽太守岑公孝弘農成瑨但坐嘯三語切判官四語切使安南還也如此運古乃見典切一結切高唐

送李使君鎮海昌州有雙廟

海風千里捲雙旌。按轡初聞屬部清。人雜島夷爭午市。潮隨山雨入秋城。鳴狐不近睢陽廟。突騎猶屯廣利營。肯掃帳中容我醉。夜深燃燭臥談兵。

清明呈館中諸公

新煙著柳禁垣斜。杏酪分香俗共誇。白下有山皆繞郭。清明無客不思家。卞侯墓上迷芳草。盧女門前映落花。喜得故人同待詔。擬沽春酒醉京華。

弔岳王墓

大樹無枝向北風。十年遺恨泣英雄。班師詔已來三殿。射虜書猶說兩宮。每憶上方誰請劍。空嗟高廟自藏弓。棲霞嶺上今回首。不見諸陵白露中。鳳洲作英氣勃發。讀此和平溫厚之篇。又爽然失矣。○通體責備高宗。居然史筆。○諸本作千年遺恨。應以十年為典。

涼州曲

關外垂楊早換秋。行人落日旆悠悠。隴山高處愁西望。只有黃河入漢流。高渾。

秋柳

欲挽長條已不堪。都門無復舊毵毵。此時愁殺桓司馬。暮雨秋風滿漢南。

楊

基字孟載。其先蜀人。居於吳。用薦入官。仕至山西按察使。被讒奪職。供役卒於工所。○孟載春草詩云。六朝舊恨斜陽裏。南浦新愁細雨中。誠為佳句。然大概近纖。他如春風顛似唐張

旭。天氣和如魯展禽。白鷺下田。千點雪。黃鸝上樹。一枝花。殊乖大雅矣。集中收七言律二章。風格頗上。

感懷

韞鷹斂六翮。棲息如鷓鴣。秋風颯然至。聳目思凌霄。英雄在承平。白首為漁樵。匪無搏擊能。不與狐兔遭。長星巨東南。壯士拭寶刀。落落丈夫志。悠悠兒女曹。

鄧禹南陽來。仗策歸光武。孔明臥隆中。不即事先主。英雄各有見。何必問出處。孫曹與更始。未可同日語。向非昭烈賢。三顧猶未許。君子當識時。守身如處女。

聞鄰船吹笛

江空月寒露華白。何人船頭夜吹笛。參差楚調轉吳音。定是江南遠行客。江南萬里不歸家。笛裏分明說鬢華。已分折殘堤上柳。莫教吹落隴頭花。

登岳陽樓望君山

洞庭無煙晚風定。春水平鋪如練淨。君山一點望中青。湘女梳頭對明鏡。鏡裏芙蓉夜不收。水光山色兩悠悠。直教流下春江去。消得巴陵萬古愁。

長江萬里圖

我家岷山更西住。正見岷山發源處。三巴春霽雪初消。百折千回向東去。江水東流萬里長。人今漂泊尙他鄉。煙波草色時牽恨。風雨猿聲欲斷腸。七言短古原本李頎常建諸公

岳陽樓

春色醉巴陵。闌干落洞庭。水吞三楚白。山接九疑青。空闊魚龍氣。嬋娟帝子靈。何人夜吹笛。風急雨冥冥。應推五言射雕手。起結尤入神境。

送魏萬之安西

梁苑微霜木葉紅。行人此日發關東。酒邊怨別看長劍。馬上驚心見斷蓬。雲散岳蓮開泰華。月寒郊樹隱

新豐窮秋亦有臨邊使。待爾題詩寄塞鴻。

感秋

嫋嫋西風吹逝波。冥冥灑氣逼星河。宣王石鼓青苔澀。武帝金盤白露多。八陣雲開屯虎豹。大江潮落見鼉鼉。沅湘一帶皆秋草。欲采芙蓉奈晚何。

卷二

張

羽字來儀。潯陽人。因兵阻居吳興。明初徵起。擢太常司丞兼翰林院同掌文淵閣事。以事竄嶺外。未半道召還。知不免投龍江死。

金川門

兩山夾滄江。拍浮若無根。利石伴劍戟。風濤相吐吞。維天設巨險。爲今國東門。試將一卒守。堅若萬馬屯。吾來犯清曉。天空霜露繁。列宿森在列。北斗峭可援。江光合海氣。溟滓神攸存。俯視不敢睡。中有蛟龍蟠。浮屠者誰子。高居凌風幡。下見渡口人。擾擾蠡螳喧。愧彼超世士。去去將何言。李辰山云。詩作於洪武甲寅。未三十載而燕師從此入矣。讀之可勝浩歎。

秋日茗溪道中

深秋羣物肅。灑氣明朝陽。方舟蕩清溪。良遊閱景光。疎林綴餘綠。菰蒲搖晚芳。鳴鴻去杳杳。遙嶺翳蒼蒼。閑行無物役。洄沿自徜徉。寂寞欣有得。留連豈爲荒。一理滄浪調。知音非所望。

清口

豁達兩河口。前與黃河通。高岸忽斗折。清淮匯其中。甘羅城在南。韓信城在東。一爲秦人英。一爲漢家雄。人生有不死。所貴在立功。方其未遇時。鹿鹿常人同。時命苟未會。丈夫有固窮。舍舟登高防。歲暮百草空。陂陀隴畝間。一二羸老翁。遺跡不可問。但見荒榛叢。行行重回首。目斷雙飛鴻。

贈僧還日本

杖錫總隨緣。鄉山在日邊。遍參東土法。頓悟上乘禪。呪水龍歸鉢。翻經浪避船。本來無去住。相別莫潸然。

題陶處士像

五兒長大翟卿賢。彭澤歸來只醉眠。籬下黃花門外柳。風光不似義熙前。

徐

賁賁字幼文。其先蜀人。徙居吳。洪武初以薦授官。歷仕至河南布政使。尋下獄死。

過荷葉浦

粼粼水溶春。澹澹煙銷午。不見唱歌人。空來荷葉浦。無處寄相思。停舟采芳杜。

柳短短送陳舜道

柳短短。春江滿。蘭渚雪融香。東風釀春暖。山長水更遙。浩蕩木蘭橈。蘭橈向何處。送君南昌去。離愁落日煙中樹。

送曾伯滋赴西河將幕

上將切分閫，儒官解習兵。風旗春獵野，雪帳夜歸營。洮水從岷下，祈山入隴平。知公能載筆，草檄報邊聲。

林

弼字元凱，龍谿人。任元為漳州府知事。明初與修禮樂書，除禮部主事，歷登州知府。

秦皇廟

蠶食雄風逐逝波，荒祠寂寂寄巖阿。三神山下仙舟遠，萬里城邊戰骨多。東魯尙存周禮樂，西秦空壯漢

山河。早知二世無多祚，崖石書功不用磨。結意與李義山地下若逢陳後主，豈宜重問後庭花。同是一種風刺。

王

蒙字叔明，吳興人。元末官理問。洪武初為泰安知州，坐胡黨獄死。

暮宿田家作

木落天正寒，山空日將暮。荒林倦鳥歸，亂水行人渡。窮年滯草莽，短褐被霜露。晚宿依田家，主人情亦故。

汲水泉滿澗，燒竹煙在戶。鐘殘溪上村，月照階前樹。濁酒初潑醅，嘉蔬亦時具。且慰飢渴懷，況諳村野趣。

老翁八十餘，有子沒征戍。秬稻歲莫收，官司日加賦。我願息兵戈，海宇重農務。愧乏經濟才，徒然守章句。

張

簡字仲簡，吳人。初為道士，元季兵亂，以母老歸養。洪武初召修元史，饒介之分守吳中，自號醉樵，延諸文士作歌。仲簡詩擅場，居首坐高季迪次之，楊孟載又次之。

醉樵歌

東吳市中逢醉樵，鐵冠欹側髮飄蕭。兩肩矻矻何所負，青松一枝懸酒瓢。自言華蓋峯頭住，足跡踏遍人

間路學劍學書總不成。惟有飲酒得真趣。管樂本是王霸才。松喬自有煙霞具。手持崑岡白玉斧。曾向月裏斫桂樹。月裏仙人不我曠。特令下飲洞庭春。興來一吸海水盡。卻把珊瑚樵作薪。醒時邂逅逢王質。石上看棋黃鵠立。斧柯爛盡不成仙。不如一醉三千日。於今老去名空在。處處題詩償酒債。淋漓醉墨落人間。夜夜風雷起光怪。

王

彝字常宗。嘉定人。以布衣召修元史。入翰林。後坐太守魏觀事。坐法死。

秋林高士圖

嵐峯半殘陽。彩翠明林杪。僧塢遠鐘微。歸人下山少。風杉落葉響。驚起棲煙鳥。攜手願言還。前村月初皎。

劉

炳字彥昂。以字行。鄆陽人。明初獻書。任中書典籤。

春夕直左掖懷周侍御

晚雨池上晴。透迤澹將夕。金莖華月生。綺樹流雲濕。窗虛漏聲永。幔卷鑪煙襲。憶我同袍人。何由共瑤席。

楊廉夫云。仿章。

寄許永明公冕昆季得夫先生

與君往歲從戎日。正值中原戰血腥。諸葛有心扶漢室。包胥無淚哭秦庭。九鷺夜徙龍沙黑。八駿秋迷鳥道青。一別關河俱白首。斷腸煙樹滿長汀。

同周伯寧連楊劇談悲歌有感

醉來拔劍斫珊瑚。迴首侯門是畏途。夜半聞雞眠不著。草堂秋雨讀陰符。

郭

翼字義仲。自號東郭生。崑山人。明初徵授學官。

城南草堂與顧仲璞夜話

花發草堂風雨春。青燈翦韭話情親。亂離隔世今何夕。生死論交竟幾人。城郭是非華表鶴。蓬萊清淺海中塵。三千賓客馮驩在。莫怪悲歌撫劍頻。

袁

凱字景文。華亭人。洪武中徵拜御史。以病免歸。○李獻吉謂海叟師法子美。何仲默謂歌行。得杜之體。鄙意傷於平直。未極變化。若七言斷句。在李庶子劉賓客間。青邱孟載俱未及也。

楊白花

楊白花。飛入深宮裏。宛轉房櫳間。誰能復禁爾。胡爲高飛渡江水。江水在天涯。楊花去不歸。安得楊花作楊樹。種向深宮飛不去。

客中除夕

今夕爲何夕。他鄉說故鄉。看人兒女大。爲客歲年長。戎馬無休歇。關山正渺茫。一杯柏葉酒。未敵淚千行。

京師得家書

江水三千里。家書十五行。行行無別語。只道早還鄉。天籟

客中夜坐

落葉蕭蕭江水長。故園歸路更茫茫。一聲新雁三更雨。何處行人不斷腸。

淮東逢張十二信

少年追逐共西東。吳邁文章馬亮弓。一自干戈零落後。白頭淮海獨相逢。不減白首何哉之作。

揚州逢李十二衍

與子相逢俱少年。東吳城郭酒如川。如今白髮知多少。風雨揚州共被眠。

題李陵泣別圖

上林木落雁南飛。萬里蕭條使節歸。猶有交情兩行淚。西風吹上漢臣衣。王元美云頗見風雅。○詞婉意

筆秋之

淮西夜坐

蕭蕭風雨滿關河。酒盡西樓聽雁過。莫怪行人頭盡白。異鄉秋色不勝多。吳明卿云悲惋欲涕。

周致堯致堯字煥文崇德人平江書院山長

西津夜泊

孤帆夜落石橋西。橋外青山入會稽。臥聽海潮吹地轉。起看江月向人低。一春衰謝憐皮骨。萬國艱虞厭

鼓鼙何處商船歌水調。令人歸思益淒迷。

劉

崧字子高。秦和人。明初以人材舉。歷仕至國子司業。○子高詩辭采鮮媚。骨格未高。應是學溫飛卿一派。

姑蘇曲

姑蘇城頭烏夜啼。姑蘇臺上風淒淒。芙蓉露冷秋香死。美人夜泣雙蛾低。銅龍咽寒更漏促。手撥繁絃轉紅玉。鴛鴦飛去屣廊空。猶唱吳宮舊時曲。

題余仲揚畫山水圖爲余自安賦

金華山人余仲揚。筆墨蕭疎開老蒼。昨看新圖湖上宅。煙霧白日生高堂。層峯上蟠石皜皜。絕島下瞰江茫茫。長松並立各千丈。間以灌木相低昂。松下上人坐碧草。秋影忽落衣巾涼。囊琴未發絃未奏。已覺流水聲洋洋。赤城霞氣通雁蕩。巫峽雨色來瀟湘。誰能千里坐致此。欲往久歎河無梁。風塵漲天滿吳楚。六年悵望神慘傷。玄猿苦啼巖北樹。白雁不到江南鄉。赭山焚林絕人迹。如此山水非尋常。此圖本爲自安寫。亦感同姓悲殊方。幽軒素壁泉聲動。對此令我心爲狂。何由捫蘿逐麋鹿。振衣直上雲中岡。登臨一寫漂泊恨。長嘯清風生八荒。

玉華山

翠巘千峯合。丹崖一徑通。樓臺上雲氣。草木動天風。野曠行人外。江平落雁中。傷心俯城郭。煙雨正冥濛。

周

滇滇字伯寧江寧人明初任饒州長史歷仕至刑部尙書

舟中望九華山

貞履無素期。勞生意恆窘。誰云戒戎路。曾是返初隱。水宿淹長晷。山行阻修畛。縹緲對雄標。巖巖發奇蘊。巖回氣如憤。峯去勢猶引。刻削冠青蓮。雕鏤轟丹筍。嵯霞上斑剝。石乳下礪碾。山鬼從文狸。淵靈闕玄蜃。瞻言志藜藿。未遂采芝菌。卽事情已悲。懷賢迹俱泯。潛吳愧梅福。去汝羞閔損。人德險未夷。天道明可準。臯蘭豈徒歇。巖桂芳未隕。歲暮山中人。寤歌候歸軫。善學謝公巖回十字尤佳

王

旬字子宣里居未詳

宮詞

南風吹斷采菱歌。夜雨新添太液波。水殿雲房三十六。不知何處月明多。高廷禮云婉麗似王龍標

周

立立字公禮長洲人

行經華陰

西游莫歎勞行役。風物繁華記往年。十里關河臨渭水。萬家煙樹入秦川。露盤臺迴金爲掌。華嶽峰高石作蓮。聞道盛時多宴樂。更傳車馬幸溫泉。

林

鴻鴻字子羽福清人明初以薦授將樂訓導後拜禮部員外郎○閩中詩派。鴻以子羽爲首宗法唐人繩趨尺步衆論以唐臨晉帖少之然終是正派

感秋

撫劍中夜起。氣候何淒清。天高白露下。北斗當前楹。嗷嗷雙飛鴻。隨陽亦宵征。微禽爾何知。寒暑嬰其情。始知玩物化。中復念吾生。三十志有立。一經尙無成。緬懷古哲人。信與大運并。道在無終始。時來暫衰榮。感歎不能寐。延首東方明。

飲酒

儒生好奇古。出口談唐虞。倘生羲皇前。所談竟何如。古人既已死。古道存遺書。一語不能踐。萬卷徒空虛。我願但飲酒。不復知其餘。君看醉鄉人。乃在天地初。

金雞巖僧室

遠公青蓮宇。百尺構雲闕。一徑入松蘿。山泉濯苔髮。石房彈玉琴。清響在林樾。夜來滄海寒。夢遶波上月。微吟白雲篇。高興了未輟。無能悟聲聞。安得離言說。夜來滄海寒十字得常建神理。

無諸釣龍臺懷古

無諸昔建國。赤土疏王封。築臺青冥上。垂釣滄江龍。乘龍去不返。千載如飛蓬。只今荒臺上。寂歷多遺蹤。我有太古懷。來吟江上峯。天青海氣滅。地古寒煙濃。潭水綠萬丈。秋岑碧千重。登臨未能已。落日催霜鐘。

同鄭二宣江上泛舟

載酒入江色。酒多江復長。酣來散予纓。濯向春流香。東壁過疎雨。西崦殘夕陽。猿禽相叫嘯。靈木共清蒼。夕景更汎覽。客程殊未央。魚風葦上起。蚌月波中光。嘗以事泮渙。冰期名跡忘。乘槎子豈必。聊復詠滄浪。

巫峽啼猿歌送邱少府歸四明

巫山巫峽連三巴。猿啼三聲客思家。停舟聽之聲未了。卻過青枝猶裊裊。野人乍來錦官城。清秋滿峽啼猿聲。黃牛灘上怨楓落。白帝祠前哀月明。商聲清冽羽聲亂。倏忽東崖復西澗。久客聞之淚欲乾。壯夫聽此魂亦斷。故人歸臥越山雲。憶得啼猿歌送君。扁舟獨宿剡溪夜。叫月三聲誰共聞。

出塞曲

十五薊門行。能探黠虜情。潛兵秋度磧。牧馬夜歸營。苦霧沈旗影。飛霜濕鼓聲。昨來承密詔。東築受降城。

送高郎中使北

漢使臨邊日。天驕已請和。看花辭紫陌。犯雪渡交河。水草留行帳。雲沙想玉珂。從來清漠北。婁敬策居多。

風刺得唐人體

寄逸人高漫士

獨倚城南百尺闌。粵鄉秋思浩漫漫。平臺樹色催殘照。近郭砧聲報早寒。雲物正當搖落後。關河終念別離難。龍門別墅今宵月。誰與相同把酒看。

貝 瓊 瓊字廷瑒崇德人洪武初
徵修元史除國子助教

穆陵行

至元中西僧楊璉真伽利宋諸陵寶玉因倡妖言惑主盡發攢宮之在會稽者斷理宗頂骨爲
飲器璉敗歸內府九十年矣洪武二年正月詔宣國公求之得於僧汝訥所乃命葬金陵聚寶
山石以表之予感而賦詩

六陵草沒迷東西冬青花落陵上泥黑龍斷首作飲器風雨空山魂夜啼當時直恐金棺腐鑿石通泉下
深銅一聲白雁度江來寶氣竟逐妖僧去金屋猶思宮女侍玉衣無復祠官護可憐持比月氏王寧飼烏
鳶及狐兔真人歛見起江東鐵馬九月踰崆峒百年枯骨卻南返雨花臺下開幽宮流螢夜飛石虎殿江
頭白塔今可見人間萬事安可知杜宇聲中淚如霰白鴈字音似伯
顏見當時童謠

經故內

山中玉殿盡蒼苔天子蒙塵豈復回地脈不從滄海斷潮聲猶上浙東來百年禁樹知誰惜三月宮花向
自開此日登臨解題賦白頭庾信不勝哀

送楊九思赴廣西都尉經歷

邛笮康居路盡通西南開鎮兩江雄漢家大將推楊僕蠻府參軍見郝隆象跡滿山雲氣白雞聲千戶日

車紅明珠薏苡無人辨。行李歸來莫厭窮。即此鄉多寶玉慎勿厭清貧工於脫化。

送王克讓員外赴陝西

貂裘萬里獨衝寒。舊是含香漢署官。白雪作花人面落。青山如鳳馬頭看。關中相國資王猛。海內蒼生望謝安。應念東南有遺佚。采芝深谷尙盤桓。

父山隱居夏日

病客從教嬾出村。兩山一月雨昏昏。野花作雪都辭樹。溪水如雲欲到門。無復元戎喧鼓吹。試從田父牧雞豚。來青處士時相過。猶是平原舊子孫。

凌雲翰

雲翰字彥紳錢塘人洪武初以薦授四川成都教授。

關山雪霽圖

前峰後峰雪模糊。東村西村春有無。快雪時晴入佳想。況復見此關山圖。關山迢遞相聯屬。玉潔珠光眩人目。扶桑飛上金畢逋。暗水流澌度空谷。野橋行過路三叉。青旗插檐沽酒家。驅驢倦客得少憩。悵望遠道還咨嗟。詩翁好事常起早。天寒祇恐梅花老。柴門時有故人來。階下白雲須用掃。此圖一日落塵寰。筆法依稀荆與關。人生遠遊固云樂。何似在家長看山。我本識字耕夫耳。占祥便作豐年喜。田園歸隱會有時。麥飯飽餐茅屋底。

邱民字克莊揚州人洪武初爲松江學官仕至禮部侍郎

送友人至杭

又隨南雁度錢塘。不道他鄉是故鄉。江水秋風蓴菜美。山中春雨石田荒。杜陵老去寧忘蜀。江總歸來不
是梁。欲采芙蓉贈君去。錦衣零落倍淒涼。

練

高字伯上新淦人洪武中起居注以直言忤旨外謫廣德州同知

送趙將軍

崆峒一劍倚秋陰。誰識將軍百戰心。老去功名餘白髮。閑來歌舞散黃金。呼鷹大澤風竿勁。射虎南山雪
羽深。敲缺唾壺銀燭短。時人不解隴頭吟。

管

訥字時敏華亭人洪武中徵拜楚府紀善陞左長史

和陸伴讀闔過梅根

江行愜素懷。遐覽匪遊冶。開篷望九華。隱隱白雲下。素波明遠川。青天入平野。煙樹淡欲無。風泉斷還瀉。
因知漢陂舟。差勝習池馬。斯遊樂未央。我輩胡爲者。

張

宣字藻仲江陰人洪武初召修元史擢翰林編修既而謫濠道卒

感鄰婦

日月光八表。焉能照覆盆。可憐東家婦。哀聲時一吞。將軍豈不仁。養士亦有恩。失計緣數奇。車徒散雲屯。寧知邊頭骨。盡是忠義魂。妾今止一身。又無子與孫。婦人不下堂。寧上他人門。死者已如此。何以慰生存。貞節語好在。斬絕與波瀾。警不起妾心。井中水一例。

魯

淵淵字道原。淳安人。元進士。明初徵修禮樂書。授江西按察司僉事。以病辭。

重九

白雁南飛天欲霜。蕭蕭風雨又重陽。已知建德非吾土。還憶并州是故鄉。蓬鬢轉添今日白。菊花猶似去年黃。登高莫上龍山路。極目中原草木荒。

李延興

延興字繼本。東安人。元進士。洪武初屬典邑校。

丙申歲詠懷

白首殊方客。奔馳戎馬間。時危憂母老。歲晚寄書還。凍雪連荒野。寒雲出亂山。蒼茫西日外。痛哭倚柴關。辛苦憐吾弟。荒山久避兵。素書連月斷。白髮滿頭生。雪翳窗燈影。風沉戍鼓聲。寸心憂百結。寂寞度殘更。妻子何時見。淒涼病轉侵。虛傳千里信。已負百年心。茅屋飛霜滿。空階落葉深。白頭吟正苦。回首淚霑襟。得杜詩氣體。但渾厚沉鬱處未到。

讀賈誼王粲傳

白髮悲王粲。青春羨賈生。萬言辭慷慨。一賦氣崢嶸。弔屈心猶壯。依劉恨未平。懷賢坐長夜。耿耿若爲情。

孫

賈字仲衍。南海人。洪武中授蘇州府經歷。坐黨禍死。

送翰林典籍張敏行之官西上

燉煌城下沙如雪。燉煌城頭無六月。關西勁卒築防秋。捷書夜半飛龍樓。九重下詔徵貔虎。推轂上將開都府。黃旗卷日大軍行。旄頭化石夜有聲。燉煌迢迢五千里。十月卽渡黃河水。上將翩翩才且雄。平戎不數貳師功。叱咤猶在輪臺北。匹馬已入渠黎國。左較偏裨晚射鵬。倚鞍醉索單于朝。西山黑風吹墮瓦。霜角吹秋塞垣下。太平今見遠宣威。君往從戎幾日歸。幕下文儒能耀武。詞林從此有光輝。善學嘉州。

次歸州

歸州城門半天裏。白雲晚向城下起。市廛架屋依巖巒。婦女提罍汲江水。巴山雪消江水長。城中夜聞灘瀨響。客船樹杪鈎石稜。漁父雲端曬罾網。家家蕪田山下犁。倒枯大樹燒作泥。居人養犬獲山鹿。穉子縛柴圍野雞。楚王臺高對赤甲。四時猛氣長颯颯。柁工鳴板避漩渦。櫓聲搖上黃牛峽。

下瞿塘

我從前月來西州。錦官城下十日留。回船正值重九節。巫山巫峽風颼颼。人言灩澦大於馬。瞿塘此時不可下。公家王事有程期。敢憚微軀作人鮮。人鮮甕頭翻白波。怒流觸石爲漩渦。長年敲板助船客。破浪一

擲如飛梭。灘聲櫓聲歷亂聒。緊搖手滑櫓易脫。沿洄劃轉如旋風。半側船頭水花沒。船頭半沒船尾高。水花作雨飛鬢毛。爭牽百丈上崖谷。兩旁捷走如猿猴。停船把酒酌蒼昊。因笑吾生真草草。吟詩未解追譎仙。萬里經行蜀中道。巴東東下想安流。便指歸州向峽州。船到岳陽應漸穩。洞庭霜降水如油。

湖州樂

湖州溪水穿城郭。傍水人家起樓閣。春風垂柳綠軒窗。細雨飛花濕簾幕。四月五月南風來。當門處處芰荷開。吳姬畫舫小於斛。蕩槳出城沿月回。菰蒲浪深迷白紵。有時隔花聞笑語。鯉魚風起燕飛斜。菱歌聲入鴛鴦渚。

黃

哲字庸之。番禺人。明初用薦拜翰林待制。出授東平府通判。坐法死。

過梁昭明太子墓

帝子降南浦。飄飄蒼桂陰。神飈迴震闕。玄跡闕坤岑。鳳陵輝璞蘊。龍沼媚珠沉。文藻絢華馥。芳芬揚素襟。遺編軼正雅。曠代殊徽音。玉馬風雲變。金鳥歲月深。霜蘭秋被坂。煙蘿夕翳林。采蘋思永薦。捐玦遂幽尋。靈脩忽爾逝。歲晏勞予心。遼東鶴馭遠。緱嶺鸞笙吟。眇眇因懷昔。營營徒慨今。瑤華竟衰歇。惆悵雍門琴。

過昭明墓詩。應作選體。

秋夜雜興呈涂典籤穎

璿杓運西宇。華月麗中楹。坐知流序易。遙夜秋風生。銀漢呈霄景。金堂含夕清。柔條棲湛露。嘉蕙茁幽莖。撫跡遂成感。如何君遠征。相思雲陽浦。峩嶢限玉京。寸心渺何極。搖蕩如懸旌。

沈夢麟夢麟字元昭歸安人元末爲武康尹入明以賢良徵起校文闕浙者三同考會試者再

和邵山人

亂後還家如旅泊。愁中貰酒喜人過。每吟栗里停雲句。不作南山種豆歌。故宅東風歸燕靜。孤村夜雨落花多。白頭卻憶觀光日。曾賦神明與馭娑。晚唐風韻

滕

毅字仲弘鎮江人以儒士徵授起居注擢吏部尙書出參政江西

感事

虎戰龍爭二十秋。江波日夜自東流。道旁無語王孫泣。天際含顰帝子愁。苜蓿風煙空壁壘。蒹葭霜露滿汀洲。多情惟有西山月。永夜依依照白頭。故國之思如聞黍離麥秀比宋文恪過故宮作風神較勝

藍

仁字靜之崇安人明初內附例徙臨濠尋放還

暮歸山中

暮歸山已昏。濯足月在澗。衡門棲鵲定。暗樹流螢亂。妻孥候我至。明燈共蔬飯。佇立松桂涼。疎星隔河漢。

宿橘山田家懷蔣先生

蒼峰落日微。白鶴秋風遠。客路入疎鐘。田家背山坂。孤煙桑柘寒。歸鳥茅茨晚。欲覓紫芝翁。山深白雲滿。

西山暮歸

涼葉墜微風。秋山正蕭爽。天寒獨鳥歸。日夕百蟲響。偶從桂樹招。遂有桃源想。石磴闕無人。山猿自來往。

藍

智字明之。崇安人。明初應薦授廣西按察僉事。

雨中同孟原僉憲登嘉魚亭

高閣流鶯外。荒城駐馬前。江寒三月雨。春老百蠻天。折柳悲橫笛。飛花落釣船。乾坤總羈旅。把酒意茫然。

過雲洞嶺

路出千林迥。山連五嶺遙。石崖懸度棧。野樹臥通橋。澗飲猶防蠱。畚耕盡屬獠。夕陽驅瘦馬。鬢影漫蕭蕭。

甘

瑾字彥初。臨川人。明初嚴州府同知。

何梅閣山居

迹不到城市。逢人無厚顏。一瓢風外樹。雙屐雨中山。流水春喧確。歸雲暮掩關。無心經世務。爲益鬢毛斑。

寄馬彥會

百戰孤城血未乾。故人書札報平安。秋風代馬思燕草。夜月湘歌怨澧蘭。萬里江湖仍旅食。百年天地自儒冠。山陰更有誅茆地。仗劍休辭行路難。

王 儻 傳字孟揚。閩中人。洪武庚午舉人。永樂初薦授國史院檢討。參英國公張輔軍事。後坐解縉黨。下獄死。

宿巴陵聞笛

玉笛凌秋韻遠汀。空江皓月思冥冥。怪來楊柳移關塞。可是梅花落洞庭。半夜旅魂隨調切。誰家少婦倚樓聽。曉來更覓龍吟處。一點君山水面青。

浦

源 源字長源。無錫人。洪武中晉王府引禮舍人。○舍人名句如細雨疎燈聞落葉。斷雲高樹見

江店。榕葉熏風瘴海。船均是詩中有畫。

送人之荆門

長江風颺布帆輕。西入荆門感客情。三國已亡遺舊壘。幾家猶在住荒城。雲邊路繞巴山色。樹裏河流漢水聲。此去郢中應有賦。千秋白雪待君賡。

吳文泰

文泰字文度。吳縣人。洪武中涿州同知。

送人之巴蜀

煙波迢遞古荊州。君去應爲萬里遊。倚櫂遙看湘浦月。聽猿初泊渚宮秋。雲開巫峽千峰出。路轉巴江一字流。若見東風楊柳色。便乘春水泛歸舟。中疊用四地名。亦是

烏斯道

斯道字繼善。慈谿人。明初以薦起知石龍縣。

澤畔

上征天無風。遠游橐無金。種蘭蘭不芳。行吟向江潯。漁父曠達者。庶幾知我心。鶴鳴子不和。徒然有哀音。踟躕當奈何。湘水清且深。陳臥子云。古拙。

許

繼。繼字士修。寧海人。洪武中台州訓導。

夜坐

雨歇宵影澄。天清月華素。空山秋欲來。涼意先在戶。蕭蕭林樾風。泫泫幽篁露。草蟲亦何知。含淒感遲暮。深思無與言。美人隔雲路。空山十字。前人寫秋俱未到此。

胡

奎。奎字虛白。海寧人。寧府教授。

秋夕

月出萬井秋。商聲在高樹。風條絡緯鳴。露葉流螢度。天河一杯水。流向西南去。坐念素心人。佳期渺何處。
夢遊廬山

我有紫霞想。夢遊匡廬峰。仙人凌絕頂。手弄金芙蓉。芙蓉亭亭九天上。疊嶂崩騰涌波浪。五色雲中白鹿鳴。三更海底金雞唱。懸崖瀑布從天來。疋練倒界青天開。高人自是陸修靜。邀我石磴行莓苔。九江秀色可攬結。欲跨長鯨捉明月。望斷蓬萊青鳥書。琪花落盡無人折。飛身上挹香爐煙。坐臥九疊屏風前。翻然

拜手招五老。一笑彷彿三千年。松風泠泠吹夢覺。鶴背高寒露華落。早知此境隔塵凡。只合栖神向邱壑。何人寫此江上山。雲山與我心俱閑。明當會碾飄輪去。長謝時人竟不還。

顧文昱文昱字光遠嘉定人。明初官吳王副相。

白雁

萬里西風吹羽儀。獨傳霜翰向南飛。蘆花映月迷清影。江水含秋點素輝。錦瑟夜調冰作柱。玉關晨度雪霑衣。天涯兄弟離羣久。皓首江湖猶未歸。風格高於海叟白燕詩。一結尤見作手。○王安中詠白雁。夜月。蘆花看。不定。夕陽楓葉見初飛。極不即不離之妙。惜通體不稱。

卷三

高 棟棟字彥恢。長樂人。永樂初以布衣召入翰林。爲待詔。陞典籍卒。○林尙默云。詩始漢魏。至唐極盛。宋失之。理趣元滯於學識。而不由悟以入。自襄城楊士弘始。編唐音。然知者尙鮮。先生

選唐詩品彙。議者服其精博。○典籍詩以五言古爲勝。俞汝成盛推歌行。非篤論也。至擬唐諸作。初無君形者存。

九月八日郭南山亭宴集分得下字

海國霜氣涼。秋聲落遙野。乾坤肅以清。收納屬多暇。出郭尋幽期。同人命軒駕。載酒入翠微。憑高憩層榭。蒼山橫黃雲。大江天同瀉。飛雨霞際晴。夕陽雁邊下。江山滿陳迹。今古成代謝。高興殊未平。臨風獨悲咤。飛雨十字寫晚景入畫。

賦得羅浮霜月懷二逸人

海國梅始白。飛霜動鳴鐘。寒空一片月。挂在羅浮峰。夜色不映水。清光與之同。百里皆瑤華。千林闕幽風。蕭條巖際葉。嘹唳雲邊鴻。遠客起遙念。滄波思千重。夢迴明鏡沒。寂歷聞幽蛩。

水竹居

清溪入雲木。隱處林塘深。微月到流水。泠泠竹間琴。虛聲起遙聽。天影激遠心。余亦鸞鶴侶。將期此投簪。題臺江別意。錢顧存信歸番禺。

置酒臺江上。悵然傷解攜。番禺天萬里。矯首南雲低。停舟對君日將暮。目送南雲指歸路。鄉夢多隨蜃母樓。家林近入扶桑樹。滄浪浩蕩杳難期。此別重逢又幾時。東去臺江應到海。唯因流水寄相思。

王

恭字安中。閩縣人。永樂初以儒士薦。起授翰林典籍。尋投牒歸。

聞笛歌送人之塞上

橫笛對離亭。扁舟越江口。月下何人最斷腸。天涯怨別驚楊柳。此夜愁心獨對君。明朝悵別又離羣。單于城上吹羌管。知爾相思不忍聞。

春鴈

春風一夜到衡陽。楚水燕山萬里長。莫怪春來便歸去。江南雖好是他鄉。

卞 同符 同字孟 吳人

倪雲林畫

雲開見山高。木落知風勁。亭下不逢人。斜陽澹秋影。

鄭 真 真字千之。鄞縣人。洪武壬子鄉試第一。官廣信教授。

寄烏繼善先生

紅心驛外望家山。颯颯西風兩鬢斑。繫雁書成霜滿地。飯牛歌罷月臨關。誤傳海外蘇公死。終許羌村杜老還。客舍不知身健否。何時訪我白雲間。

鄭 灞 灞字仲養。浦江人。

海棠仕女圖

東風蕩漾百花潭。翠袖迎風酒半酣。好鳥隔窗催曉色。美人殘夢到江南。

練子寧 子寧字名安。新淦人。洪武乙丑榜眼。累官工部侍郎。建文時遷御史大夫。靖難兵入。不屈死。

二月望日與饒隱君遊玉笥山

我懷謝康樂。獨往遊名山。身同雪舟繫。心與浮雲閒。清風澹蕩灑六合。令我與在雲松間。玉山高與南斗齊。雲錦照耀廬山低。三十六峰凌虹霓。飛湍噴雪臨迴溪。長松挂月青猿啼。上有梅仙采藥之幽栖。下有

蕭雲讀書之故基。洞天石扇杳莫測。瑤草謾長三春莢。我欲因之覽八荒。手拂青蘿眠石牀。回飈吹散碧天霧。清冥倒瀉澄湖光。作爲玉山謠。寄之雙峰客。興來攜妓秋復春。笑殺東山謝安石。

方孝孺 孝孺字希直。臨海人。建文中文學博士。靖難兵至。令草詔不屈。族誅。

閑居感懷

我非今世人。空懷今世憂。所憂諒無他。慨想禹九州。商君以爲秦。周公以爲周。哀哉萬年後。誰爲斯民謀。鳳隨天風下。暮息梧桐枝。羣鷗得腐鼠。笑汝長苦飢。舉頭望八荒。默與千秋期。一飽亮易得。所存終不移。池魚不知海。越鳥不知燕。蚯蚓霸一穴。神龍行九天。小大萬相殊。豈惟物性然。君子勿歎息。彼誠可哀憐。

上巳約友登南樓

生意忽滿眼。不知春淺深。良朋曠嘉會。濁酒難孤斟。迢迢城上樓。高朗宜遠臨。曷不一舉趾。縱望淵與岑。逍遙羣動表。舒豁萬古心。古人已寂寞。繼者應在今。蘊真有至樂。外慕非所欽。願言領衆妙。無爲鬱沖襟。懿文皇太子挽詞

盛德聞中夏。黎民望彼蒼。少留臨宇宙。未必愧成康。宗社千年恨。山陵後世光。神遊思下土。經國意難忘。

程本立

本立字原道。崇德人。洪武中以明經薦。建文初徵入翰林。陞僉都御史。靖難兵至。自經於應天府學。

題李典儀雲東卷

母老今猶健。兒行久不歸。一官淹白首。萬里夢斑衣。越郡東溟闊。秦關西日微。只將雙淚眼。日日看雲飛。

晚至安寧

連然驛路馬曾諳。落日行人思不堪。地極九州銅柱北。山蟠六詔鐵橋南。湯池水底皆陰火。鹽井煙中半夕嵐。迴首蓬萊天萬里。忍教塵鬢白毵毵。

袁敬所敬所不知其名。靖難後流寓常山之松嶺。酒酣書五柳圖詩。擲筆悲吟。繼以灑淚。有江右布商見之曰。此吾鄉某編修何爲在此。敬所趨掩其口。不顧而去。

題淵明五柳圖

藜杖芒屨白布裘。山中甲子自春秋。呼兒點檢門前柳。莫遣飛花過石頭。

趙

狂字雲翰。祥符人。洪武丁卯舉人。授兵部主事。後歷官禮兵刑三部尙書。

成南書事

三年爲客寄龍沙。望斷江南不見家。惟有受降城上月。照人清淚落胡笳。陳臥子云。有嘉州之風。略同宋文恪句法。

解

縉字大紳。吉水人。洪武戊辰進士。永樂中官翰林學士。出爲廣西參政。改交趾。入奏事。會太和之相習成風。而眞詩漸亡矣。故解大紳以下。李賓之以前所收。獨略。

送劉繡衣按交趾

虬髯白皙繡衣郎。驄馬南巡古越裳。城郭新開秦郡縣。山河原是漢金湯。天連銅柱蠻煙黑。地接珠崖海

氣黃莫說炎荒冰雪少。須令六月見飛霜。

楊士奇

士奇名寓以字行泰和人。建文時以辟召入翰林。永樂初改編修入直文淵閣。累官少師。贈太師。諡文貞。

漢江夜泛

泛舟入玄夜。奄忽越江干。員景頽西林。列宿燦以繁。凝霜飛水裔。回飄蕩微瀾。孤鴻從北來。哀鳴出雲間。時遷物屢變。游子殊未還。短褐不掩脛。歲暮多苦寒。悠悠念行邁。慊慊懷所懽。豈不固時命。苦辛誠獨難。感彼式微詩。喟然興長歎。

同蔡尙遠尤文度朱仲禮楊仲舉蔡用嚴遊東山

步出城東門。逍遙望雲巘。累月懷佳遊。茲晨遂登踐。梵宇繞層阿。飛樓凌絕峴。方塘涵湛碧。喬林茂敷衍。繁翳幽莫通。丰茸紛不翦。攀磴窮高躋。緣徑屢回轉。是時微雨收。輕霞澹舒卷。睇遙素橫川。俯夷綠盈畎。陟降體自便。顧睇心已緬。況接曠士言。復偕釋子辯。析空理弗昧。違喧抱逾展。何因此閒棲。永令浮慮遣。
胚胎晉宋。端厚不佻。

谷

宏 宏福州人。洪武中官中書舍人。

行經華陰

崔嵬太華出雲中。積翠遙連渭水東。秋色萬家連遠塞。暮煙一帶遶離宮。秦關日落行人少。漢時天陰古

殿空寂寞武皇巡幸處。祠郊木葉起秋風。宋韓文云。調既不卑。景色亦合。

趙文文字宗文。長洲人。永樂中以薦舉官。鄱陽知縣。

過金山寺

水天樓閣影重重。化國何年此寄蹤。淮海西來三百里。大江中湧一孤峰。濤聲夜恐巢枝鳥。雲氣朝隨出洞龍。幾欲登臨帆去疾。蒼茫遙聽隔煙鐘。

趙友同友同字彥如。金華人。徙長洲。官太醫院御醫。

宋徽宗畫半開梅

上皇朝罷酒初酣。寫出梅花蕊半含。惆悵汴宮春去後。一枝流落到江南。

曾棨字子啓。永豐人。永樂甲申。賜進士第一。歷官詹事府少詹事。贈禮部侍郎。諡襄敏。○子啓五言如斷雲京口樹。殘月廣陵鐘。有中唐風致。

車駕渡江

朱旗畫戟擁晴沙。錦纜牙樯向水涯。佳氣迴浮江北樹。日光初照海東霞。雲中鸞鳳扶丹轂。水底魚龍識翠華。不用臨流羨天塹。只今四海盡爲家。

送陳郎中重使西域

雕輪歷碌擁鳴騶。幾欲停鞭記舊游。赤嶺晚雲連雪積。黃河春水帶冰流。旌麾每過羅諸部。金帛頻頒拜

衆會卻笑虎頭班定遠。身親百戰覓封侯。

維揚懷古

廣陵城裏昔繁華。煬帝行宮接紫霞。玉樹歌殘猶有曲。錦帆歸去已無家。樓臺處處迷芳草。風雨年年怨落花。最是多情汴堤柳。春來依舊帶栖鴉。

李昌祺

名禎。以字行。廬陵人。永樂甲申進士。官至廣西布政使。

過吳門

七澤三江通甫里。楊柳芙蓉照湖水。闔門過去是盤門。半掩珠簾畫樓裏。靡蕪生遍鴛鴦沙。東風落盡棠梨花。館娃香徑走麋鹿。清夜鬼燈明絳紗。三高祠下東流續。真孃墓上風吹竹。西施去後屨廊傾。歲歲春深燒痕綠。

送周秀才遊長沙

迢遞長沙道。逍遙歲宴遊。亂山黃葉寺。孤棹白蘋洲。夕鳥衝船過。寒波背郭流。毋論卑濕地。賈傅昔淹留。

尹鳳岐

鳳岐字邦祥。吉水人。永樂丙戌進士。官翰林侍講。

送兄廣東參政應奎

价人藩闔寄旬宣。五嶺南行遠著鞭。曉日紅亭留別酒。秋風黃葉下瀧船。青連橄欖千家雨。黃觸桄榔萬

井煙珍重平生清節在不妨引滿酌貪泉

金

誠字成之番禺人永樂戊戌進士官刑部主事

江行

江水悠悠江路長孤鴻啼月有微霜十年踪跡渾無定莫更逢人問故鄉

黃

閏字期餘信豐人永樂戊戌進士

擬唐人長安春望

南山晴望鬱嵯峨上苑春游玉輦過天抱帝城雙闕迴日臨仙仗五雲多鶯聲盡入新豐樹柳色遙分太液波漢主離宮三十六樓臺處處起笙歌

沈

貞字元吉長興人卜居橫玉山下

樂神曲七首有序

樂神曲者擬楚辭九歌而作也吳人尙鬼祀必以巫覡迎送舞歌登獻其辭褻嫚禳災徵福不知其分滋黷甚矣故爲此辭以明神鬼之理禱祀之意祛其荒淫之志焉

保我之民兮邑此方崇其墉兮凌其隍民不驚兮志定眷靈修兮作民命隄楊兮結陰青青兮蔽林女牆堅兮有郭繞洄灣兮濠歸於壑靈之來兮玄都颺旂旌兮若荼陳一豕兮兩羶載斟之兮百壺城兮

隍兮吾永無虞。

右城隍

嗟靈伯兮御清泠。洗杵敲兮滌炎蒸。駘蕩兮春初。颺颺兮夏徂。颺颺下兮木葉枯。號空桑兮吹雪載塗。靈之來兮憑女巫。女巫兮屢舞。箬簫兮伐鼓。靈醉飽兮無怒。蕭蕭來兮颯颯去。

右風伯

佩芳蘭兮擘芬椒。潔新服兮綴珠珫。駕靈螭兮翔重霄。要靈輅兮下迢迢。我禾兮成役。我田兮龜坼。烈日兮驕陽。利行水兮熱湯。靈之來兮天外。下土乾兮霑一漑。維靈布澤兮惠我無私。嗟我民兮其敢繹思。靈皇皇兮萃只。舞僛僛兮醉只。福穰穰兮歲復歲只。

右雨師

月維仲兮日維剛。肅齋宮兮神所藏。靈輝輝兮垂佩。儼飛馭兮高蓋。降靈雨兮來斯。左有翁兮右有妃。悵嘉期兮難又。羌永歎兮陳辭。靈修修兮不語。逝翩翩兮歸去。

右社公

波震蕩兮具區。既底定兮奠神之居。芙蓉蓋兮菱車。導翠輦兮文魚。神之來兮孰俱。後子皮兮前靈胥。與神遊兮湖之許。衝風息兮極浦。有倡兮妙舞。有列兮清酤。神保聿歸兮或返而顧。灌我田兮受神之祐。

右太湖神

雄何爲兮厲於鄉。祀有時兮享有嘗。赭白馬兮青蓋明。而沒兮晦而在。屏方相兮去儻。神巫進兮舞且歌。雄欣欣兮遠逝。不水旱兮不疵厲。樂吾民兮世世。

右鄉厲

兩旗兮分張。舞輕風兮悠揚。神之司兮我疆。原田每每兮立我青秧。不稂不莠兮無好無妨。時雨兮時暘。俾百穀兮登場。維神兮降康。報之兮肴蒸。脂羊七章未能獨造。然終是雅音。

右青苗神

薛瑄瑄字德溫。河津人。永樂辛丑進士。歷官禮部左侍郎。兼文淵閣大學士。謚文清。從祀孔廟。

梅花落

檐外雙梅樹。庭前昨夜風。不知何處笛。并起一聲中。

于謙謙字廷益。錢塘人。永樂辛丑進士。官至大理寺少卿。景陵卽位。拜兵部尚書。加少保。英宗復辟。棄市。成化中。贈太傅。謚肅愨。後改忠肅。

暑月將自太行巡汴

三晉衝寒到。中州冒暑回。山川原不改。節候自相催。綠樹連天暗。丹葵向日開。太行雲縹緲。搔首意徘徊。

上太行

西風落日草斑斑。雲薄秋容鳥獨還。兩鬢霜華千里客。馬蹄又上太行山。

劉

球球字求樂。更字廷振。安福人。永樂辛丑進士。官翰林侍講。以忤王振。矯旨下獄死。景泰初贈翰林學士。諡忠愍。

山居

水抱孤村遠。山通一徑斜。不知深樹裏。還住幾人家。

施

敬敬字孟莊。錢唐人。謫居滇。

巴陽夜泊

獨棹三巴夜。秋高片月孤。灘聲將客夢。萬里下東吳。

南行途中寄錢唐親友

萬里移家入瘴煙。故鄉音耗若爲傳。衡陽自古無來雁。況去衡陽又八千。

黃

裳裳字仲裳。文江人。

客夜

西風蕭蕭木葉稀。秋深作客何時歸。城頭月出照擊柝。江上露白催搗衣。雁鴻附書遠莫致。烏鵲遶樹還驚飛。三更不眠欲起舞。躍馬臥龍誰是非。

劉

績績字孟熙。山陰人。隱居不仕。人稱西江先生。

題西陵送別圖送姚進士

悠悠復悠悠。風吹江上舟。今朝天色好。送客西陵頭。西陵在何許。羃歷春郊樹。搔首望行人。迢迢上京路。京路一千程。官梅照眼明。春風濃似酒。難浣別離情。別離餘幾日。佇得君消息。折取杏園花。慰我長相憶。相憶夢相仍。高樓只自登。春潮知我意。日夜向西陵。

早春寄白虛室

帝城佳氣接煙霞。草色芊芊紫陌斜。殘雪未消雙鳳闕。春風先入五侯家。歌鐘暗度新豐樹。游騎晴騎上苑花。獨有子雲才思逸。應傳麗句滿京華。

征夫詞

征夫語征婦。死生不可知。欲慰泉下魂。但視襟中兒。

征婦詞

征婦語征夫。有身當殉國。君爲塞下士。妾作山頭石。

錢

曄字允輝。常熟人。浙江都司經歷。

過江

江渚風高酒乍醒。川途渺渺正揚舲。浪花作雨汀煙濕。沙鳥迎人水氣腥。三國舊愁春草碧。六朝遺恨晚

山青不須倚棹吹長笛。恐有蛟龍欲出聽。

贈周岐鳳

李賓之云。江陰周岐鳳。坐事亡命。扁舟夜泊。岐鳳得之大慟。江南人至今傳之。

琴劍飄零西復東。舊游清興幾時同。一身作客如張儉。四海何人是孔融。野寺鶯花春對酒。河橋風雨夜推篷。機心已共沙鷗靜。惟有家山在夢中。

蕭

磁字孟勤。泰和人。宣德丁未進士。累官太子少師。戶部尙書。

送李佑之赴陝西參議

十載含香侍上台。旬宣分陝用奇才。黃河九曲天邊落。華岳三峰馬上來。長樂月明鐘響靜。樊川春漲水波洄。當年召伯留遺澤。會看甘棠到處開。

王

清字一寧。合肥人。世襲濟寧衛指揮。陞廣東都指揮。死寇難。

塞上感懷

西風關外雪初晴。懷古思鄉百感生。玉帳枕戈人萬里。鐵衣傳箭夜三更。夢回絕域烏桓地。戰罷空山敕勒營。烽火微茫天去遠。月中鴻雁送秋聲。

郭

登字元登。武定侯諸孫。景泰初官都督僉事。守大同。以功封定襄伯。英廟復辟。謫戍甘肅。成化初復爵。贈侯。諡忠武。○定襄山王楸樹。詠梟諸篇。盛推衆口。然才力恣肆。或非正聲。茲擇

其尤雅者。

題蔣廷暉小景

我家南山下，柴門別經久。不知今春來，新添幾株柳。清江閑釣竹，鷗鷺還來否。對此忽相思，長歌獨搔首。

送岳季方還京

登高樓，望明月。明月秋來幾圓缺，多情只照綺羅筵。莫照天涯遠行客，天涯行客離鄉久。見月思鄉搔白首，年年長自送行人。折盡邊城路旁柳，東望秦川一雁飛。可憐同住不同歸，身留塞北空彈鋏。夢繞江南未拂衣，君歸復喜登臺閣。風裁稜稜尙如昨，但令四海歌昇平。我在甘州貧亦樂，甘州城西黑水流。甘州城北黃雲愁，玉關人老貂裘敝。苦憶平生馬少游。皇明詩選載末四語作斷句，明詩綜因之。然通體纏綿有情不迂不促，故仍用原本。

甘州卽事

黑河如帶向西來，河上邊城自漢開。山近四時常見雪，地寒終歲不聞雷。牦牛互市番氓出，宛馬臨關漢使回。東望玉京將萬里，雲霄何處是蓬萊。

保定塗中偶成

白壁何從摘舊瑕，纔開羅網向天涯。寒窗兒女燈前淚，客路風霜夢裏家。豈有酖人羊叔子，可憐憂國賈長沙。獨醒空和騷人詠，滿耳斜陽噪晚鴉。

張

和字節之崑山人，正統己未進士，官至浙江提學副使。

與朱千戶夜話

客裏相逢感慨深。劍歌時復動悲吟。清尊坐對三更月。紫塞遙馳萬里心。瀚海地荒龍馭遠。交河風急雁書沉。微生愧乏安邊策。北望長天淚滿襟。

陳憲章

憲章字公甫。新會人。正統丁卯舉人。用薦授翰林檢討。諡文恭。從祀孔廟。

冬夜

長夜氣已淒。木棉被重裘。端坐思古人。寒燈耿悠悠。是時病已間。背汗仍未收。學業坐妨奪。田蕪廢耨耰。高堂有老親。遍身無完綢。丈夫庇四海。而以俯仰憂。口腹非所營。菽水吾當求。明日理黃犢。進我南岡舟。

范澄

澄字國清。寶應人。景泰庚午舉人。

送別

酒盡津鼓喧。風生浦帆亂。山迴不見君。夕陽在沙岸。

沈愚

愚字通理。崑山人。

陳宮懷古

景陽宮井積浮埃。三關遺基半綠苔。惆悵後庭花落盡。黑頭江令獨歸來。

陸德蘊

德蘊字潤玉。華亭人。

重過沙河道中

白鶴沙頭水自波。扁舟曾載夕陽過。東風一路蘼蕪綠。添得春愁別後多。

陳

寬字孟賢。吳人。檢討繼之子。

題燕穆之楚江秋曉圖

五更人語覺潮生。估客帆檣候曉行。樹色未分雲夢澤。雞聲已動漢陽城。天空畫角吹霜盡。月落銀河入斗橫。欲問楚南千古事。至今江水為誰清。

王

越字世昌。濬縣人。景泰辛未進士。天順中官右副都御史。巡撫大同。進兵部尚書。論出塞功。因烽火煉成丹。極悲歌感慨之致。然云雅音則未也。至劉原博云。孤臣自恨無容地。逆虜猶存不共天。但取其忠義可矣。

與李布政彥碩馮僉憲景陽對飲

相逢無奈還傷別。尊酒休辭飲幾巡。自笑年來常送客。不知身是未歸人。馬嘶落日青山暮。雁度西風白草新。離恨十分留一半。三分黃葉二分塵。裁上半首為絕句更佳。

蘇

平字秉衡。海寧人。舉賢良方正。不就。乘衡詠繡鞵詩。南陌踏青。春有跡。西廂立月夜無聲。一時以此得名。然此種有累詩品不小。

湘南懷古

江山搖落獨登臨。草色湖南入望深。萬古空留湘女恨。九歌誰識屈原心。霜清楚曉蘭香歇。雲暗巴陵雁

影沉正是客懷消不得。竹枝聲裏斷猿吟。

王

佐佐字廷用。天順已卯舉人。福州衛籍。官訓導。

宮怨

芙蓉帳冷減容光。愁倚熏籠嬾著牀。寒氣逼人眠不得。鐘聲催月下斜廊。似少言外意。而寫情逼真。列朝詩選采夢蕉詩話。謂宮女媚闕。

仙子詩。恐近於傳會也。詩見王廷用集中。

秦

夔夔字廷昭。無錫人。天順庚辰進士。歷官江西右布政。

同金廣信宗器遊番湖

番湖水落秋容冷。碧色澄鮮三萬頃。樓船嗷嘈何處來。十幅蒲帆弄秋影。霜晴九月葭葦枯。芙蓉著花秋滿湖。吳興已遠郭熙老。誰為寫此秋江圖。汀州遠近迷雲樹。東去滄波急如注。康山一髮天際橫。傳是先皇洗兵處。當年血戰湖水黃。日月照耀旌旗光。鼎湖龍去不復返。只有雁鷺飛茫茫。天開大澤雄今古。氣撼東吳及南楚。巴陵洞庭何處邊。目斷潯陽送樓櫓。北風獵獵握雙旌。此行奇絕如登瀛。風波平地不須起。向來魂夢今猶驚。浩歌篷底還搔首。卻憶同行信州守。萍水飄零盡白頭。相逢且醉餘干酒。

李東陽

東陽字賓之。茶陵人。天順甲申進士。歷官少師兼吏部尚書。贈太師。諡文正。○永樂以後詩。

美謂長沙之于何李。猶陳涉之啓漢高。此習氣未除。不免抑揚太過。宜招後人之指擊也。

夜過邵伯湖

蒼蒼霧連空。冉冉月墮水。飄飄雙鬢風。恍惚無定止。輕帆不用楫。驚浪長在耳。江湖日浩蕩。行役方未已。羈棲正愁絕。況乃中夜起。

風雨歎

壬辰七月壬子日。大風東來吹海溢。崢嶸巨浪高比山。水底長鯨作人立。愁雲壓地濕不翻。六合慘淡迷乾坤。陰陽九道錯黑白。烏兔不敢東西奔。里人倉皇神屢變。三十年前未曾見。東村西舍喧呼遍。牒書走報州與縣。山厖谷洶豺虎嗥。萬木盡拔乘波濤。州沈島沒無所逃。頃刻性命輕鴻毛。我方停舟在江臯。披衣踞牀夜復晝。忽掩青袍涕霑袖。舉頭觀天恐天漏。此時憂國況思家。不覺紅顏坐凋瘦。潼關以西兵氣多。蘆笳吹塵塵滿河。安得一洗空干戈。不然獨破杜陵屋。猶能不廢嘯與歌。世間萬事不得意。天寒歲暮空蹉跎。嗚呼奈爾蒼生何。

夜過仲家淺閘

日維乙未月丙戌。青天無雲月東出。舟人喧慙夜濤發。翻沙轉石紛出沒。是時水淺舟在地。牖門崔嵬晝方閉。牖官醉睡夫走藏。倉卒招呼百無計。民船棄死爭赴牖。楫倒檣催動交碎。舟人號咷乞性命。十里呼聲震天地。我時兀坐驚春橈。攬衣而起心徬徨。同行無人僕隸散。獨與船底相低昂。攀崖陟磴不得上。咫

尺如在天一方。流行坎止信有數。向來蔑視淮與江。霜風欺人衣袂薄。呼童酌酒累數觴。燈殘酒醒插亦過。北斗墮地天茫茫。

靈壽杖歌

吾聞武當之山四萬二千丈。半在雲根半天上。不知三十六宮何處稱絕奇。產出靈株非一狀。蛟螭盤擎露頭角。熊經樹顛虎山腳。根蟠節錯相糾纏。含風飽雪經炎寒。九年洪水之水浸不殺。十日之日暴烈何時乾。梯懸磴接跬步不可上。誰采青壁紅琅玕。見之羨者不容口。錫以嘉名曰靈壽。爪之不入行有聲。金可同堅石同久。吾家此物舊所有。神與相扶鬼爲守。自從病足跛曳不得前。已覺山林落吾手。一病經旬不出門。手中此杖嗟猶存。下牀欹足立不定。此時託子以爲命。不顧四體無微疴。但願謝病歸山阿。左扶右策夾以二童子。下可涉園徑。上可凌陂陀。願栽萬本截萬杖。窮崖陰谷生森羅。靈兮壽兮此物倘可致。直遣四海赤子頭俱皤。從橫跌宕能盤硬語。○牧齋詆斥空同緣其常用杜句法也。而萊陵此詩亦極規撫少陵。牧齋偏盛推之渠胸中豈有真是非存耶。

題畫鷹送羅緝熙

大鷹猙獰爪抉石。側目空巖睨秋碧。小鷹偃首俯且窺。威而不揚豈其雌。雌雄起伏各異態。意氣相看出塵壙。獨立羞將衆羽羣。高飛怕有浮雲礙。山寒木落天始風。日色慘澹川原空。人間狐兔自有地。慎勿反擊傷鷓鴣。畫圖彷彿是誰作。宛似懸鞬臂間落。高堂匹練陰風生。萬里炎荒盡幽朔。我生奇氣空峻岫。揮

毫對此不無神。送渠羽翼朝天去。亦是雲霄得意人。

立春日車駕詣南郊

暖香和露繞蓬萊。彩仗迎春曉殿開。北斗舊杓依歲轉。南郊佳氣隔城來。雲行複道龍隨輦。霧散仙壇日滿臺。不似漢家還五畝。甘泉誰羨校書才。

南園秋風

別院臨城輦路開。大風昨夜起宮槐。秋隨萬馬嘶空至。曉送千旂拂地來。落雁遠驚雲外浦。飛鷹欲下水邊臺。宸遊睿藻年年事。況有長楊侍從才。

與顧天錫夜話時天錫謫永州府同知

路轉三湘去更深。潞河西岸瀨東潯。潛鱗自足波濤地。別馬長懷秣飼心。湘女廟前山似黛。柳公亭下石如林。徵科亦是公家事。民力天南恐未禁。

與趙夢麟諸人遊甘露寺

彌篠巖杉處處通。野寒吹雨墮空濛。垂藤路繞千年石。老鶴巢傾半夜風。淮浦樹來江口斷。金陵潮落海門空。關書未報三邊捷。萬里中原一望中。

九日渡江

秋風江口聽鳴榔。遠客歸心正渺茫。萬古乾坤此江水。百年風日幾重陽。煙中樹色浮瓜步。城上山形繞建康。直過眞州更東下。夜深燈火宿維揚。

遊岳麓寺

危峯高蹶楚江干。路在羊腸第幾盤。萬樹松杉雙徑合。四山風雨一僧寒。平沙淺草連天遠。落日孤城隔水看。薊北湘南俱入眼。鷓鴣聲裏獨凭欄。

卷四

莊景字孔暘江浦人成化丙戌進士官翰林授檢討以諫謫官後遷南京吏部郎中天啓初追諡文節

端午食賜粽有感

蓬萊宮中懸艾虎。舟滿龍池競簫鼓。千官曉綴紫宸班。拜向彤墀賀重午。大官角黍菰蒲香。綵繩萬縷雲霞光。天恩勅賜下丹陛。瓊筵侑以黃金觴。東南米價高如玉。江淮餓莩千家哭。官河戍卒十萬艘。總向天廚挽飛粟。君門大嚼心豈安。誰能持此回彫殘。小臣自愧悠悠者。無術救時眞素餐。杜老心事理學人何必專作頭巾語

憶舍弟

天邊聞一雁。杳杳向南徂。今夜西風冷。他鄉小弟孤。五人千里去。九月一書無。欲寄千行淚。憑誰達客途。

一氣揮灑絕
去對偶之迹

戴 縉縉南海人成化丙戌
進士累官工部尙書

楚江旅懷

薄暮過瀟湘。秋空楚水長。黃蘆千里月。紅葉萬山霜。客夢懸雙闕。鄉心逐五羊。羈情誰與晤。勞者若爲傷。

周

瑛瑛字梁石蒲由人成化己
丑進士官至四川右布政

履霜操

父兮兒憎。母兮兒怒。跣天踏地。憊不知其故。父在高堂。兒在郊圻。晨興履霜。踵血淋漓。荷衣不暖。棗食不飽。不卽捐溝壑。念我父母。父本兒愛。母本兒憐。一朝放逐。實兒之愆。維烏有穀。維蟲有羸。父兮母兮。其或歸我。昌黎作過於怨矣。此方是怨而不怒。與昌黎拘幽操一忠一孝。並有千古。

吳

寬寬字原博長洲人成化壬辰賜進士第一授翰
林修撰累官禮部尙書贈太子太保諡文定

賦黃樓送李貞伯

維河有源。星宿同導。河積石思神功。濁流汗漫失故道。積石卻與瀟澗通。平郊脫轡萬馬逸。一夜徑度徐州洪。徐州太守蘇長公。夜呼卒伍登城墉。一身未足捍大患。豈無木柵兼竹籠。戲馬臺旁二十里。築堤橫亘長如虹。高城不浸三版耳。挽回魚鼈仍耆童。防河錄成天有工。黃樓高起城之東。五行有土可制水。底

用四壁塗青紅。太守登樓賓客從。舉杯酌水臨長風。河伯俯首受約束。不敢更與城爭雄。水流滔滔向東去。紆徐演漾殊從容。負薪投壁竟何用。漢家浪築宣房宮。自公去後五百載。水流無盡恩無窮。我生慕公公不逢。安得置我茲樓中。穎濱淮海獨何幸。留得兩賦摩蒼穹。鳳池舍人今李邕。南行別我何忽忽。此邦萬靈日凋瘵。賴爾繼續前賢踪。暇日登高倘能賦。封題須附冥飛鴻。

楊一清一清字應寧雲南安寧州人成化壬辰進士歷官戶部尚書進少師贈太保謚文襄

甘涼道中書事感懷

弧矢威天下。雷霆震域中。大兵方出塞。小醜自相攻。繼絕君王義。宣威將帥功。從今宵旰慮。不復在西戎。不復在西戎言所憂者正多也大臣心事昭然如揭

山丹題壁

關山偏仄人蹤少。風雨蒼茫野色昏。萬里一身難獨任。百年多事共誰論。東風四月初生草。落日孤城早閉門。記取漢兵追寇地。沙場猶有未招魂。

將至寧夏

奉詔西征駐節時。元戎奏凱已先期。苗民自逆三旬命。獫狁何勞六月師。燈火家家開夜戶。弓刀處處卷風旗。益兵稅畝休重論。財賦於今兩不支。

文 林字宗儒長洲人成化壬辰進士官至溫州知府

舟中有懷林待用

渺渺長波映遠空。依依新柳颺春風。相思人在青山外。盡日舟行細雨中。汲黯身爲漢廷重。杜陵詩到錦城工。天王明聖江湖遠。贏得馳驅兩鬢蓬。

王

鏊鏊字濟之。吳縣人。成化乙未。賜進士第三。累官吏部侍郎。進少傅。贈太傅。諡文恪。

贈梁都憲巡撫四川

赤甲白鹽雄作鎮。鐵冠繡斧凜先聲。雪山已爲來時重。黑水應聞去後清。殿上位虛中執法。邊頭人散小團營。憑誰說與蘇明允。畫像無煩記姓名。人散小團營。謂亂萌不作。猶張方平之鎮蜀也。

馬中錫

中錫字天祿。故城人。成化乙未。進士官至左都御史。

晚渡咸陽

野色蒼茫接渭川。白鷗飛盡水連天。僧歸紅葉林間寺。人喚斜陽渡口船。表裏山河猶往日。變遷朝市已多年。漁翁看破興亡事。獨坐秋風釣石邊。

元世祖廟

世祖祠堂帶夕曛。碧苔年久暗碑文。薊門此日瞻遺像。起輦何人識故墳。棹楔半存蒙古字。陰廊尙繪伯

顏軍可憐老樹無花發。白晝鴉鳴到夜分。起輦谷名。元諸陵在焉。○曹潔躬云。用事典實。鑄詞悽惋。可稱絕唱。

邵

寶寶字國賢。無錫人。成化甲辰進士。歷官至南京禮部尙書。謚文莊。

孫翊妻

夫死矣。妾何敢生。夫讐爲重身爲輕。賊尙生。妾何敢死。軍中幸有報恩子。號召如風赴如水。斷賊頭。祭夫墓。白日下高天。何處黃泉路。

乞終養未許

乞歸未許奈親何。帝里風光夢裏過。三月春寒青草短。五湖天遠白雲多。客囊衣在縫猶密。驛騎書來字欲磨。聖主恩深臣分淺。百年心事兩蹉跎。

喬

宇宇字希大。山西樂平人。成化甲辰進士。累官吏部尙書。加少保。謚莊簡。

秋風亭下泛舟

荒亭寥落野煙空。漢武雄才想象中。簫鼓應聲開畫鷁。帆檣飛影動晴虹。山分秦晉羣峯斷。水入河汾兩派通。少壯幾時還老大。不須迴首歎秋風。

王雲鳳

雲鳳字應韶。遼州和順人。成化甲辰進士。官至右僉都御史。

送客

雲氣溟濛雨欲絲。飄飄遊子別離時。愁看陌上青青草。送盡行人總不知。

文

森森字宗嚴。長洲人。成化丁未進士。歷官右僉都御史。江西巡撫。

九日

三載重陽菊。開時不在家。何期今日酒。忽對故園花。野曠雲連樹。天寒雁聚沙。登臨無限意。何處望京華。

沈子山云。語不必深。自然蘊藉。○此詩亦見何大復集。

沈

周周字啓南。長洲人。景泰中。郡守。以賢良應詔。辭不赴。○句如山雨乍來。○句如山中以當畫本。

從軍行

馬上黃沙拂面行。漢家何日不勞兵。匈奴久自忘甥舅。僕射今誰托父兄。雲暗旌旗婆勒渡。月明刁斗受降城。左賢早待長繩縛。莫遣論功白髮生。忘世人有此悲壯之作。諸選本往往遺之。

寫懷寄僧

虛壁疎燈一穗紅。閑階隨處亂鳴蟲。明河有影微雲外。清露無聲萬木中。澤國蒼茫秋水滿。居民流落野煙空。不知誰解拋憂患。獨對青山憶贊公。

史

鑑鑑字明古。吳江布衣。

子昂蘭

國香零落佩纒空。芳草青青合故宮。誰道有人和淚寫。託根無地怨東風。

戴冠

冠字章甫。長洲人。以貢授紹興府訓導。後又有兩戴冠一字仲驪。信陽人。一字南枝。山陰人。

題姚少師畫竹

北地風高卷塞雲。驚沙吹起雁成羣。客邊偶寫龍孫譜。忘卻江南有此君。王湛求云。風人善謔之遺。

莫止

止字如山。無錫人。○句如天闕一聲何處雁。江平千里獨歸舟。風致翫然自遠。

昭君曲

但使邊城靜。蛾眉敢愛身。千年青冢在。猶是漢宮春。

李夢陽

夢陽字天賜。更字獻吉。慶陽人。徙扶溝。弘治癸丑進士。官戶部員外。彈壽寧侯。繫獄。旋釋之。進郎中。代尙書。韓文萃。弟私諡文毅。天啓中。追諡景文。○空同五言古宗法。陳思康樂。然過書林。俊力持之。得免。卒後。子私諡文毅。天啓中。追諡景文。○空同五言古宗法。陳思康樂。然過於雕刻。未極自然。七言古。雄渾悲壯。縱橫變化。七言近體。開合動盪。不拘故方。準之杜陵。幾於具體。故當雄視一代。邈焉寡儔。而錢受之。詆其模擬剽賊。等於嬰兒之學。語至謂讀書種子。從此斷藉。吾不知其爲何心也。○追逐少陵。實有面目。太肖處。集中掃而空之。不欲使摶擊前賢者。得以

藉口

內教場歌

內教場者。李子紀時事而作也。帝自將練兵於內庭。

雕弓豹韃騎白馬。大明門前馬不下。徑入內伐鼓。大同耶。宣府耶。將軍者許耶。一武臣不習威。奈彼四夷。

西內樹旗。皇介夜馳。鳴礮烈火。嗟嗟辛苦。二解

湘妃怨

采蘭湘北沚。擧木澧南潯。淥水含瑤彩。微風託玉音。雲起蒼梧夕。日落洞庭陰。不知篔簹竹。苦惟見淚斑深。

雜詩

稅榷蝕以傾。梁棟誠獨難。流言播四國。周公有疑患。涼颿激頽景。奄忽不可攀。衆羽日繽紛。朱鳥戢其翰。殺身苟無益。去去從所安。傷哉式微詩。千載起予歎。

茅以韜爲席。柏以勁爲薪。吾子憂治世。愚者幸不辰。張置以待兔。雉也蓄其身。物理雖云殊。罹脫各有因。浮沙卷奔藿。朔吹揚驚塵。日暮臨大道。悵望曷能陳。

登山望四海。日夕忽至沉。俯身眺城郭。悔然沾我襟。交路夾芳蘭。逝駟何駸駸。朱樹藹閑榭。奇巧媚荒淫。北里進異舞。高堂呈妙音。織羅振芬芳。朝雲遞嘉吟。不見秋日草。零落愁春心。

衛上別王子

晨風應候至。雞鳴各嚴車。我今游宋中。子當旋舊閭。僕夫理前綬。轅馬悲鳴趨。一別阻秦周。相望萬里餘。首春霜露重。厚汝征衣襦。昔爲同袍士。今在天一隅。故者日以遠。疇能察區區。

土兵行贛州賊作亂。都御史陳金奏調廣西狼兵征之。土兵行所由作也。

豫章城樓饑啄烏。黃狐跳踉追赤狐。北風北來江怒湧。土兵攫人人叫呼。城外之人徙城內。塵埃不見章江塗。花裙蠻奴逐婦女。白奪釵釧換酒沽。父老向前語蠻奴。慎勿橫行王法誅。華林桃源諸賊徒。金帛子女山不如。汝能破之惟汝欲。犒賞有酒牛羊豬。大者陞官佩綬趨。蠻奴怒言萬里入爾都。爾生我生屠我屠。勁弓毒矢莫敢何。意氣似欲無彭湖。彭湖翩翩飄白旗。輕舸蔽水陸走車。黃雲卷地春草死。烈火誰分瓦與珠。寒崖日月豈盡照。大邦魑魅難久居。天下有道四夷守。此輩可使亦可虞。何況土官妻妾俱。美酒大肉吹笙芋。楊用修云。只以諺語近語入詩史。而古不可及。○歸結正論。少陵亦云。此輩少爲貴也。

豆莖行

昨當大風吹雪過。湖船無數冰打破。冰驤崑崙山嶽立。行人駭觀淚交墮。景泰年間一丈雪。父老見之無此禍。鄱陽十日路斷截。廬山百姓啼寒餓。旌竿凍折鞞鼓啞。浙軍楚軍袖手坐。將軍部兵蔽江下。飛報沿江催豆莖。邑官號呼手足皴。馬騾雞犬遺眠臥。前時邊達三千軍。五個病熱死兩個。彎弓值凍不敢發。昔何猛毅今何懦。李郭鄴城圍不下。裴度淮西手可唾。從來強弱不限域。任人豈論小與大。當衢寡婦攜兒哭。秋禾枯槁春難播。縱健徵科何自出。大兒牽纜陸挽馱。似古諺。但質生硬處。正不易到。

明星篇

明星出地一丈高。天門沉沉魚輪動。沙隄露下玉珂寒。直廬雞唱金蓮重。千門萬戶曉鐘發。明星漸高河

漸沒燦爛疑侵翔鳳樓。依稀故抱飛龍闕。鳳樓龍闕帶層城。翠輦朱衣夜夜行。黃昏競奏催花宴。天明猶聽打毬聲。蘭煙桂火輝如日。明星迢迢照不入。百子池頭青草生。長信宮中紫苔集。草色苔香秋復春。此日乘槎若問津。明星曉落宵還見。白髮黃金愁殺人。

漢京篇

漢京臨帝極。複道衆星羅。煙花開甸服。錦繡列山河。山河自古稱佳麗。城中半是王侯第。峻閣重樓夾道懸。雲房霧殿森虧蔽。牧豚賣珠登要津。樊侯亦是鼓刀人。時來叱咤生風雨。奄見吹噓走鬼神。平津結兄蓋侯弟。杯酒相看何意氣。執鞭盡是虎賁郎。守門不數長安尉。長安烽火入邊城。挺劍辭君萬里行。去日千官遮馬餞。歸來天子降階迎。朱弓尙抱流沙月。寶劍常飛瀚海星。不分燕然先勒石。直教麟閣後標名。豈知盛滿多仇忌。可惜繁華如夢寐。地宅田園奪與人。丹書鐵券成何事。霍氏門前狐夜號。魏其池館長蓬蒿。三千食客今誰在。十二珠樓空復高。後車不戒前車覆。又破黃金買金谷。洛陽亭榭與山齊。北邙車馬如雲逐。陰郭豪華真可憐。雲臺將相珥貂連。當時卻怪桐江叟。猶著羊裘伴帝眠。功高自滿千古同病。末以不受爵祿者點破昏庸與李頎漢朝。功臣楊德祖篇歸到魯連蹈海同一作法。

去婦詞

正德元年。戶部尙書韓文。暨內閣師保等。咸相繼去位。李子作此詞也。

孔雀南飛雁北翔。含顰攬涕下君堂。繡幙空留並菡萏。羅袿尙帶雙鴛鴦。菡萏鴛鴦誰不羨。人生一別何由見。只解黃金頃刻成。那知碧海須臾變。賤妾甘爲覆地水。郎君忍作離弦箭。憶昔嫁來花滿天。賤妾郎君俱少年。瑤臺築就猶嫌惡。金屋裝成不論錢。重樓複道天中起。結綺臨春照春水。宛轉流蘇夜月前。萋迷寶瑟煙花裏。夜月煙花不相待。安得朱顏常不改。若使相逢無別離。肯放馳波到東海。薄命難教娣姒知。衰年恨少姑嫜在。長安大道接燕川。鄰里攜壺舊路邊。妾悲妾怨憑誰省。君舞君歌空自憐。郎君豈是會稽守。賤妾寧同會稽婦。郎乎幸愛千金軀。但願新人故不如。深婉可怨矣。

朝飲馬送陳子出塞

朝飲馬。夕飲馬。水鹹草枯馬不食。行人痛哭長城下。城中白骨借問誰。云是今年築城者。但道辭家別六親。寧知九死無還身。不惜身爲城下土。所恨功成賞別人。去年賊掠開城縣。黑山血迸單于箭。萬里黃塵哭震天。城門晝閉無人戰。今年下令修築邊。丁夫半死長城前。城南城北秋草白。愁雲日暮鳴胡鞭。

胡馬來再贈陳子

冬十二月胡馬來。白草颯颯黃雲開。沿邊十城九城閉。賀蘭之山安在哉。傳聞清水不復守。遊兵早扼黃河口。卽看烽火入甘泉。已詔將軍屯細柳。去年穿塹長城裏。萬人齊出千人死。陸海無毛殺氣蒸。五月零冰凍河水。當時掘此云備胡。胡人履之猶坦途。聞道南侵更西下。韋州固原今有無。從來貴德不貴險。英

雄豈可輕爲謨。尙書號令速雷電。抱玉誰敢前號呼。遂令宵旰議西討。茲咎只合歸吾徒。我師如貔將如虎。九重按劍赫斯怒。惜哉尙書謝歸早。不覩將軍報平虜。軒然而來。神勇無敵。

贈何舍人齋詔南紀諸鎮

先皇乘龍去不返。悲風慘澹吹宸極。四海哭若喪慈母。百官狂走天爲黑。憶昨臨危坐御牀。手挈神器歸今皇。密語丁寧肺腑裂。三老親聞眼流血。金縢立剖石室祕。此事難從外人說。吾君謙讓不可得。割哀踐阼弘祖烈。日月重懸萬國朝。雷雨赦過羣方悅。越南海北霹靂動。蠻夷盡奉王正月。此時九道使臣出。舍人亦輟螭頭筆。白馬朝騰蘊北雲。錦帆暮閃江沱日。江沱秋交多烈風。洞庭雲夢俱眼空。巴陵縣令舍人兄。接詔會弟西樓中。童年題詩在高壁。六載不到紗爲籠。南嶽以南惟峻山。苦蒸毒霧何盤盤。天王新令雷電掣。妖蛇不敢啼林端。五溪官長喘喙拜。黔州父老垂淚看。卻瞻蒼梧雲氣黑。斑竹臨江怨幽色。翠華縹緲空冥間。此時此恨誰知得。君不見馬援柱孔明碑。剝落黃蒿裏。千年莓苔待君洗。萬里之行自此始。歸來何以獻天子。

奉送大司馬劉公歸東山草堂歌

東山有草堂。縹緲雲嶠孤。前對祝融峯。下瞰巴陵湖。明公昔時此堂居。麋鹿熊豕當窗趨。洞庭日落風浪湧。倒影射堂堂欲動。慘淡誰聞紫芝曲。獨善不救蒼生哭。先帝親裁五色詔。老臣曾受三朝祿。此時邊徼

多戰聲。曳履謁帝登承明。謝安笑卻淮淝敵。魏相坐測單于兵。九重移榻數召見。夾城日高未下殿。英謀密語人不知。左右微聞至尊羨。自從龍去不可攀。公亦臥病思東山。湘娥含笑倚竹立。山鬼竊窺堂之側。上書苦死只欲歸。聖旨優容意悽惻。內府盤螭縷金織。賜出傾朝皆動色。白金之錠紅票記。寶鈔生硬鴉翎黑。崇文城門水雲白。是日觀者塗路塞。城中冠蓋盡相送。塵埃遮斷長安陌。人生富貴豈有極。男兒要在能死國。不爾抽身早亦得。君不見漢二疏。千載想慕傳畫圖。卽如草堂何處無。祿食覲竊胡爲乎。乃知我公眞丈夫。嗚呼乃知我公眞丈夫。從橫排宕不求合法。自然中節。子由所云千金戰馬。注坡。鷲澗如履平地者也。○英謀密語十四字是孝宗實錄。

送李帥之雲中

黃風北來雲氣惡。雲洲健兒夜吹角。將軍按劍坐待曙。紇干山搖月半落。槽頭馬鳴士飯飽。昔無完衣今繡襖。沙場緩轡行射鵬。秋草滿地單于逃。

送李中丞赴鎮

黃雲橫天海氣惡。前飛鷲鶴後叫鶴。陰風夜撼醫巫閭。曉來雪片如手落。中丞按轡東視師。躬歷險隘揮熊貔。已嚴號令偃鼓角。更掃日月開旌旗。椎牛李牧將士躍。射虎李廣匈奴知。屯田金城古不謬。賣劍渤海今其時。塞門蕭蕭風馬鳴。長城雪殘春草生。低飛鴻雁胡沙靜。遠遁鯨鯢瀚海清。不觀小范擒戎日。誰信胸中十萬兵。北地最工起手。蒼涼沉鬱。神乎老杜。

上元訪杜鍊師

宣王昔時乘八風。御龍遊戲行煙空。馬前兩兩侍玉女。別館多在蓬萊宮。朝天宮中舊時殿。樓臺畫鎖無人見。琉璃井場青苔滿。松柏森森月如練。嗚呼往事難具陳。燈火如山又一春。北斗壇西訪隱淪。我師黃衫白氎巾。坐我更致西樓賓。玉杯澗灩赤瑪瑙。織罽四角銀麒麟。酒肉山堆滿堂醉。仙廚往往來八珍。孝宗之朝五真人。師也磊落當其倫。自言召見親賜食。曾把丹書獻紫宸。如今寂寞看春色。銀魚玉帶無消息。豈惟魚帶無消息。欲語吞聲淚沾臆。勸師對此莫酸辛。世間萬事如轉輪。且將芝草供生計。聊與煙霞作主人。月偏彩雲當牖生。旋呼兩童吹玉笙。聞師妙得逡巡術。百壺倒盡還須傾。古來仙子向誰在。飲者翻垂千載名。名垂千載亦區區。酒闌燈昏夜復徂。不見秦陵草已宿。春生樹啼雙老烏。此時亦應羣帝趨。金燈翠旗光有無。故君之思寫得神靈恍惚

石將軍戰場歌

清風店南逢父老。告我已已年間事。店北猶存古戰場。遺鏃尙帶勤王字。憶昔蒙塵實慘怛。反覆勢如風雨至。紫荆關頭晝吹角。殺氣軍聲滿幽朔。胡兒飲馬彰義門。烽火夜照燕山雲。內有子尙書。外有石將軍。石家官軍若雷電。天清野曠來酣戰。朝廷旣失紫荆關。吾民豈保清風店。牽爺負子無處逃。哭聲震天風怒號。兒女牀頭伏鼓角。野人屋上看旌旄。將軍此時挺戈出。殺敵不異草與蒿。追北歸來血洗刀。白日不

動蒼天高萬里煙塵一劍掃。父子英雄古來少。單于痛哭倒馬關。羯奴半死飛狐道。處處懽聲噪鼓旗。家家牛酒犒王師。應追漢室嫖姚將。還憶唐家郭子儀。沉吟此事六十春。此地經過淚滿巾。黃雲落日古骨白。砂礫慘澹愁行人。行人來折戰場柳。下馬坐望居庸口。卻憶千官迎駕初。千乘萬騎下皇都。乾坤得見中興主。殺伐重開載造圖。姓名應勒雲臺上。如此戰功天下無。嗚呼戰功今已無。安得再生此輩西備胡。
道北歸來二語捫之字字俱起窳稜。○石亨跋扈伏法。臣節有虧。要之戰功不可埋沒。此特表其戰功也。上皇返國實由尙書之守將軍之戰。作者特爲表出。中云還憶唐家郭子儀。以不失臣節愧之也。此作者微意。

玄明宮行

今冬有人自京至。向我道說玄明宮。土木侈麗誰辦此。乃令遺臭京城東。割奪面勢創截巖。出入日月開。岍嶂矯托敢與天子競。立觀忍將雙闕同。前砭石柱雙蟠龍。飛梁逶迤三彩虹。寶構合沓殿其後。儼如山。嶽翔天中。金銀爲堂玉布地。千門萬戶森相通。光景閃爍倏忽異。雲煙鬼怪凡杳濛。以東金榜祠更侈。樹之松檟雙梧桐。溟池島嶼鯉躍。孔雀翡翠兼鸞熊。那知勢極有消歇。前日虎豹今沙蟲。窗扉自開衛不守。人來遊玩搖玲瓏。陛隅龍獸折其角。近有盜換香鑪銅。青苔生泥獍面鎖。野鴿哺子雕花櫳。憶昔此閣握乾柄。帝推赤心閣罔忠。威刑霹靂縉紳毒。自尊奴僕侯與公。變更累朝意叵測。培克四海真困窮。長安奪地塞巷陌。心復黷此閣何蒙。構結擬絕天下巧。搜剔遂盡輸僮工。神廠擇木內苑竭。官阮選石西山空。

夷墳伐屋白日黑。揮汗如雨斤成風。轉身唾罵聞得知。退朝督勞何匆匆。人心嗟怨入骨髓。鬼也孰敢安高崇。峨碑照耀頌何事。或有送男充道童。聞言愴惻黯無答。私痛聖祖開疆功。渠干威福開者誰。法典雖嚴奈怙終。錦衣玉食已叨竊。琳宮寶宇將安雄。何宮無碑鐫護勅。來者但看玄明宮。此爲宦官劉瑾作也。鋪陳盛衰皆託他人之言。聞言愴惻以下。方入自己議論。痛惜祖訓。垂戒後人。是大章法。大文字。○明祖於宮門豎鐵牌。使宦官不許干政。後成祖以建文內豎輪君臣密謀。心甚德之。遂漸予事權。渠干威福。開者誰。蓋指此也。

林良畫兩角鷹歌

百餘年來畫禽鳥。後有呂紀前邊昭。二子工似不工意。吮筆決肯分毫毛。林良寫鳥祇用墨。開縑半掃風雲黑。水禽陸禽各臻妙。挂出滿堂皆動色。空山古林江怒濤。兩鷹突出霜崖高。整骨刷羽意勢動。四壁六月生秋颺。一鷹下視睛不轉。已知兩眼無秋毫。一鷹掉頭復欲下。漸覺振翮風蕭蕭。匹綃雖慘淡。殺氣不可滅。戴角森森爪拳鐵。迴如愁胡背欲裂。朔風吹沙秋草黃。安得臂爾騎駟鐵。草間妖鳥盡擊死。萬里晴空灑毛血。我聞宋徽宗。亦善貌此鷹。後來失天子。餓死五國城。乃知圖畫小人藝。工意工似皆虛名。校獵馳騁亦未事。外作禽荒古有經。今王恭默罷游晏。講經日御文華殿。南海西湖馳道荒。獵師虞長皆貧賤。呂紀白首金爐邊。日暮還家無酒錢。從來上智不貴物。淫巧豈敢陳王前。良乎良乎。寧使爾畫不直錢。無令後世好畫兼好畋。從畫說到獵。從獵開出議論。後畫獵雙收。何等章法。筆力亦如神龍蜿蜒。捕捉不住。

鄭生至自泰山

昨汝登東岳。何峯是絕峯。有無丈人石。幾許大夫松。海日低波鳥。巖雷起窟龍。誰言天下小。化外亦王封。

陳語須此
翻用法

泰山

俯首無齊魯。東瞻海似杯。斗然一峯上。不信萬山開。日抱扶桑躍。天橫碣石來。君看秦始後。仍有漢皇臺。

四十字有包絡乾坤之
概。可以作泰山詩矣。

浮江

浮江晴放舸。挂席曉須風。日倒明波底。天平落鏡中。開窻問赤壁。捩柁失吳宮。萬古滔滔意。潯陽更向東。

明遠樓春望

貢院初開閣。春陰獨倚欄。柳邊千艦聚。花裏萬家殘。風雨江聲壯。兵戈地色寒。斷腸沙雁北。羣起向長安。

蔣仲舒云。
含愁無限。

朱仙鎮廟

宋墓莽岑寂。岳宮今在茲。風霜留檜柏。陰雨見旌旗。百戰回戈地。中原左袵時。土人嚴伏臘。偏護向南枝。

得何子過湖南消息

及遇荆門信。洞庭秋已淒。湘江饒苦竹。幾聽鷓鴣啼。馬援留銅柱。王褒祀碧雞。湖南衝瘴癘。藥物去曾攜。

讀直道陳公祚遺事

上主能容直。當言敢顧身。累朝傳諫疏。萬死作歸人。古廟穠花晚。孤墳勁草春。從來淹沒士。特筆在詞臣。

野風

山鳴野風至。漢水亦蕭蕭。月混魚龍醒。雲蒸豺虎驕。有家驚節物。不寐想前朝。萬古英雄跡。江城夜寂寥。

出塞

黃沙百草莽蕭蕭。青海銀州殺氣遙。關塞豈無秦日月。將軍獨數漢嫖姚。往來飲馬時尋窟。弓箭行人各在腰。晨發靈州更西望。賀蘭千嶂果雲霄。

秋望

黃河水遶漢邊牆。河上秋風雁幾行。客子過壕追野馬。將軍弣箭射天狼。黃塵古渡迷飛輓。白月橫空冷戰場。聞道朔方多勇略。只今誰是郭汾陽。王元美云。雄渾流麗。

潼關

咸東天險設重關。閃日旌旗虎豹閑。隘地黃河吞渭水。炎天白雪壓秦山。舊京想像千官入。餘恨逡巡六國還。滿眼非無棄繻者。寄言軍吏莫隳顏。

靈武臺

環縣城邊靈武臺。肅宗曾此辟蒿萊。二儀高下皇興建。三極西南玉璽來。衣白山人經國計。朔方孤將出羣才。可憐一代風雲際。不勸君王駕鶴迴。告肅宗之闕於子職也。語微而顯。

艮嶽篇

宋家行殿此山頭。千載來人水一邱。到眼黃蒿元玉砌。傷心錦纜有漁舟。金縉社稷和戎日。花石君臣棄國秋。漫倚南雲望南土。古今龍戰是中州。人知南渡之庸懦。而不知覆亡之禍原於徽宗君臣之宴樂也。五六語藏得議論。

臺寺夏日

古臺高並鬱岌嶷。斷塔稜層鎖寂寥。積雪洞門常慘慘。炎天松柏轉蕭蕭。雲雷畫壁丹青壯。神鬼虛堂世代遙。惆悵宋宮偏泯滅。二靈哀怨不堪招。

楚望望襄中形勢

楚望峯頭望楚雲。遙憐紫蓋紫陽君。廬荒不斷盤龍氣。碑滅猶存墮淚文。地轉江淮浮遠戍。水通巴峽暫雄軍。里名冠蓋非吾事。願訪鹿門麋鹿羣。

送毛監察還朝是時皇帝狩於楊河

楚生臨水送將歸。黎子當筵賦式微。天下汝爲真御史。百年吾是舊漁磯。沙寒白日蓬科轉。風起黃河木葉稀。此去有書應力上。太平天子本垂衣。

別徐子禎卿得江字

我愛南州徐孺子。明瑤美璧世無雙。新從北極看南極。便自吳江下楚江。日落鷓鴣啼廟口。水清斑竹映船窗。禰衡王粲俱黃土。千載何人復此邦。

限韻贈黃子

禁垣春日紫煙重。子昔爲雲我作龍。有酒每邀東省月。退朝曾對掖門松。十年放逐同梁苑。中夜悲歌泣孝宗。老體幸強黃犢健。柳吟花醉莫辭從。

秋懷

慶陽亦是先王地。城對東山不啻墳。白豹塞頭惟皎月。野狐川北盡黃雲。天清障塞收禾黍。日落谿山散馬羣。回首可憐鼙鼓急。幾時重起郭將軍。苑西遼后洗妝樓。檻外芳湖靜不流。亂世君臣那在眼。異時松柏自深愁。雕闌玉柱留天女。錦石秋花隱御舟。萬古中華還此地。我皇親爲掃神州。

鄱陽湖十六韻

太祖平陳日。樓船下此湖。波濤留壯色。天地見雄圖。水上開黃屋。雲中下赤烏。士猶詢後載。戈已倒前途。力屈鯨鯢仆。聲回雁鷺呼。橫江收玉筍。跨海定金符。文軌遙通楚。梯航訖至吳。虎賁雖莫敵。龍戰豈全辜。

血染猶丹草。骨沉空白蕪。汀洲夜寂寂。霜月鬼嗚嗚。殺氣龜鼉徙。腥風鳥嶼孤。罨人拾古鏃。艇客慨秋菰。偉彼高光烈。還將蕭鄧須。英謀協睿算。勇奮想長驅。劍瘞神仍王。舟焚勢與徂。康山巍廟在。忠武激頑夫。

曉鶯

睨皖夢中迷。流鶯碧樹西。起來紅日照。已度別枝啼。

塞上

天設居庸百二關。祁連更隔萬重山。不知誰放呼延入。昨夜楊河大戰還。

夏口夜泊別友人

黃鶴樓前日欲低。漢陽城樹亂烏啼。孤舟夜泊東游客。恨殺長江不向西。

汴京元夕

中山孺子倚新妝。鄭女燕姬獨擅場。齊唱憲王春樂府。金梁橋外月如霜。

聖節聞駕出塞

千官北首望龍旂。萬國車書集鳳闈。八駿穆王秋色遠。幾時親擁白狼歸。

卷五

邊

貢貢字廷實。歷城人。弘治丙辰進士。歷官至南京戶部尚書。○華泉邊幅較狹。而風人遺韻。故自不乏。李何邊徐並名。有以也。

再送王文熙

夜久河漢橫。春堂別燈黯。風淒鳥初動。露重花猶斂。明發不在茲。重關爲誰掩。

贈尙子

意氣憑陵一當百。關西儒生五陵客。少年學書復學劍。老大蹉跎雙鬢白。門下諸生半賜麻。閨中小婦猶炊麥。布衣束來謁天子。春日醉臥長安陌。陌頭花絮夕紛紛。瓊閣如天隔紫雲。浩歌翩然卻歸去。眼底誰是平原君。

送馬敬湖赴河南提學

征馬帶落日。出門君已遙。層城不隔夢。夜夜蘆溝橋。蘆溝橋邊車簇簇。故人都在城南宿。誰令相見轉多情。翻恨遲行不如速。江漢風煙遲早春。關山雨雪暗邊塵。臨歧莫動殊方感。余亦東西南北人。

運夫謠送方文玉督運

運船戶。來何暮。江上旱風多。春濤不可渡。裏河有閘外有灘。斷篙折纜腰環環。夜防鼠。日防漏。糧冊分明算升斗。官家但恨倉廩貧。不知淮南人食人。官家但知征戍苦。力盡誰憐運船戶。爾勿哀。司農使者天邊來。

出郭將訪希準郡伯薄暮而返卻寄

駕言江口出，卻至水西還。遠道空回首，重門欲上關。斷雲低白雁，斜日近青山。欲採瑤華贈，仙舟不可攀。

留別張西盤大參

滿酌豈辭醉，未行先憶君。山城稀見菊，關樹不開雲。地入河源渺，天連塞日曛。那堪北來雁，偏向別時聞。

關樹不開雲，更勝楚雲高，不落句。

送都玄敬

驅馬別君處，秋陰當暮生。林柯無靜葉，江雁有歸聲。綠水闔門道，青山建業城。未能同理楫，延佇獨含情。

幽寂

幽寂耽蓬戶，淒涼懷舊吟。鶯啼非故國，草色亂春心。落日黃雲暮，陰風碧海深。嗷嗷北來雁，二月有歸音。

人日有懷喬白巖侍郎

去年人日題詩處，鄭氏茅堂春可憐。出谷早鶯啼恰恰，映風寒竹倚娟娟。隨鑾並入青雲上，解珮同歸素雪前。此日寂寥驚旅食，坐看庭月撫流年。

以去年領起，以此日作收。章法本唐人韋端己憶昔詩。

謁文山祠

丞相英靈迥未消，絳帷燈火颯寒飈。黃冠日月胡雲斷，碧血山河龍馭遙。花外子規燕市月，水邊精衛浙江潮。祠堂亦有西湖樹，不遣南枝向北朝。

後半神到，用信國詩此爲第一。○起句及三四臥子改本。

重贈吳國賓

漢江明月照歸人。萬里秋風一葉身。休把客衣輕浣濯。此中猶有帝京塵。婉而擊。視素衣化。爲緇。用意各別。

嫦娥自註時外舅胡觀察謝政家居寄此通慰

月宮秋冷桂團團。歲歲花開只自攀。共在人間說天上。不知天上憶人間。

迎鑾曲

弓如滿月向江開。箭插寒潮卷浪回。水上鼉鼉莫深避。吾皇元爲射蛟來。

顧璘字華玉。先世吳縣人。徙南京。弘治丙辰進士。歷官至南京刑部尙書。

度楓木嶺

初指山拂天。飛鳥不可度。艱苦躡危磴。卽是我行路。百折頻攀援。十步九回顧。峻嶒忽在下。衣襟帶雲霧。倒景猶照人。平地黯將暮。東北望故鄉。江流莽傾注。長風萬里來。獨立難久佇。

庚辰元日

諸侯玉帛會長安。天子南巡歷壯觀。共想正元趨紫殿。翻勞邊將從金鞍。滄江飲馬波先靜。黃竹回鑾雪未乾。北極巍巍天咫尺。五雲長護鳳樓寒。應是寧庶人已擒。而武宗猶巡遊不返。故有此作。

歸自灌陽望湘山口號

十日別湘山見如故人面何況石頭城是儂舊鄉縣

王守仁

守仁字伯安餘姚人弘治己未進士授兵部主事忤劉瑾廷杖謫貴州龍場驛丞旋復官歷仕至左僉都御史巡撫南贛平宸濠擢南京兵部尙書封新建伯贈侯諡文成從祀孔廟

登泰山

曉登泰山道行行入煙霏陽光散巖壑秋容淡相輝長風吹海色飄颻送天衣峯頂動笙樂青童兩相依振衣將往從凌雲忽高飛揮手若相待悵望未能歸太白

登閱江樓

絕頂樓荒舊有名高皇曾此駐龍旌險存道德虛天塹守在蠻夷豈石城山色古今餘王氣江流天地變秋聲登臨授簡誰能賦千古新亭一愴情

龍潭夜坐

何處花香入夜清石林茅屋隔溪聲幽人月出每孤往棲鳥山空時一鳴草露不辭芒屨濕松風偏與葛衣輕臨流欲寫猗蘭意江北江南無限情

何景明

景明字仲默信陽人弘治壬戌進士官至陝西提學副使○北地詩以雄渾勝信陽詩以秀朗勝同是憲章少陵而所造各異薛君采云俊逸終憐何大復麤豪不解李空同任意抑揚

詎爲定論○洪宣以後詩教日衰雖李西涯起而振之終未能力挽流俗向微李何二家蛙聲紫色纏繞壇坫流極何所底耶凡信口揜摭者其論吾不敢取

塘上行

蒲生寒塘流日與浮萍儔。風波搖其根，飄轉似客遊。客遊在萬里，日夕望故州。鸚鵡鳴歲暮，蟋蟀知凜秋。暑退厭絲絡，寒至思重裘。佳人不與處，圓魄忽已周。房櫳淒鳴玉，紈素誰爲收。白雲如車蓋，冉冉東北浮。安得雲中雁，尺帛寄離愁。

種麻篇

種麻冀滿邱，種葵冀滿園。孤生易憔悴，獨立多憂患。當行思故旅，當食思故歡。先機失所豫，臨事徒嗟歎。升蕭艾乃至，鉏桂致傷蘭。物理有相附，疇能識其端。斷金俟同志，抱玉難自宣。交結良匪易，君當圖未然。

陳臥子云：陳思君子之遺。

擣衣

涼颿吹閨闥，夕露淒錦衾。言念無衣客，歲暮方寒侵。皓腕約長袖，雅步飾鳴金。寒機裂霜素，繁杵叩清砧。哀音緣雲發，斷響隨風沉。顧影惜流月，仰盼愁橫參。路長魂屢徂，夜久力不任。君子萬里身，賤妾萬里心。燈前揮妙匹，運思一何深。裁以金剪刀，縫以素絲鍼。願爲合歡帶，得傍君衣襟。陳臥子云：蕙心蘭質，綺羅也。時

詠懷

寂寂沅湘流，長江上有楓。青蕙綠廣隰，綠蘅被洲中。揚舲泝煙沚，遙瞻二妃宮。二妃何婉孌，寒馨振微風。

解珮遺下女。將以明我衷。光彩不易合。精誠渺難通。浮雲蔽江臯。白日忽已晚。還顧蒼梧原。何時翠華返。

立春日作

藹藹春候至。天氣和且清。端居撫流化。允愜靜者情。浮陽起叢壑。流煙散孤城。岸條發潛穎。園卉含初榮。寫襟曠明霽。覽物紆游行。目悅雙飛雉。耳感孤鳴鶯。形運自相代。神理誰爲名。往規與時逝。來慮隨年并。心存漢陰灌。躬學南陽耕。疏還念知止。莊論持達生。自非秉昭曠。能不嬰世營。

送崔氏

飄飄山上葛。纍纍田中瓠。苟非同根蒂。纏綿安得固。人情易反復。結交有新故。嗟哉夙昔好。乖棄在中路。明珠倘無因。按劍不我顧。深言匪由衷。白首爲所誤。亮君勗恆德。永副平生慕。

泊雲陽江頭玩月

扁舟泊沙岸。皓月出翠嶺。開窗鑑清輝。照我孤燭冷。高林散疎光。遠渚接餘景。縱橫銀漢迴。三五玉繩耿。弦望幾更易。客行尙殊境。佳期邈山岳。端坐令人省。

姜子嶺至三岔

出嶺上雲霓。入谿下煙嵐。高高不可極。杳杳詎能探。朱崖秀夏木。石壁映寒潭。千林覽蔥蒨。百丈窺澄涵。崩奔谷響赴。隱曜川光含。登陟力不辭。險阻情已諳。潛澗羨垂綸。越巘思停驂。振策岷峨西。揚帆江漢南。

臨深匪忘懼。履坦但懷慚。

青石崖棧

側行青石棧。誰能久延佇。斷板連曳雲。噴泉灑飛雨。迅流西回激。峻坂東折屢。隕岸互傾欹。危梁裊撐拄。飲猿駭游鱗。立馬接翔羽。慎爾千金軀。永念垂堂語。信陽五言古有三謝體有少陵體此連上章乃少陵體也

俠客行

朝入主人門。暮入主人門。思殺主讐謝主恩。主人張鏡夜開宴。千金爲壽百金錢。秋堂露下月出高。起視廡中有駿馬。匣中有寶刀。拔刀躍馬門前路。投主黃金去不顧。生氣空湧音節亦健勁

秋江詞

煙渺渺。碧波遠。白露晞。翠莎晚。泛綠漪。兼葭淺。浦風吹帽寒髮短。美人立江中流。暮雨帆檣江上舟。夕陽簾櫳江上樓。舟中采蓮紅藕香。樓前踏翠芳草愁。芳草愁。西風起。芙蓉花。落秋水。江白如練。月如洗。醉下煙波千萬里。美人娟娟隔秋水。風度似之溫飛卿樂府過於旖旎詩格轉不逮也。一本節去末二語更有餘韻。

明月篇

僕始讀杜子七言詩。愛其陳事切實。布詞沈著。鄙心竊效之。以爲長篇聖於子美矣。旣而讀漢魏以來歌詩。及唐初四子者之所爲。而反覆之。則知漢魏固承三百篇之後。流風猶可徵焉。而

四子者雖工富麗去古遠甚至其音節往往可歌乃知子美詞固沉著而調失流轉雖成一家語實則歌詩之變體也夫詩本性情而發者也其切而易見者莫如夫婦之間是以三百篇首乎關雎六義始乎風而漢魏作者義關君臣朋友辭必托諸夫婦以宣鬱而達情焉其旨遠矣由是言之子美之詩博涉世故而出於夫婦者常少致兼雅頌而風人之義或缺此其調或反在四子下與暇日爲此篇意調若髣髴四子而才質佹弱思致庸陋故摛詞蕪紊無復統飭姑

錄之以俟審音者裁割焉

不可不知此論○新城王阮亭論詩云接迹風人明月篇何耶妙悟本從天王楊盧駱當時體莫逐刀圭誤後賢真不被前人瞞過

長安月。離離出海嶠。遙見層城隱。半輪漸看阿閣銜。初照激灑黃金波。團團白玉盤。青天流影披紅蕊。白露含輝汎紫蘭。紫蘭紅蕊西風起。九衢夾道秋如水。錦幌高褰香霧濃。瑣闌斜映輕霞舉。霧沉霞落天宇開。萬戶千門月明裏。月明皎皎陌東西。柏寢岩臺望不迷。侯家臺榭光先滿。戚里笙歌影乍低。濯濯芙蓉生玉沼。娟娟楊柳覆金隄。鳳凰樓上吹簫女。蟋蟀堂前織錦妻。別有深宮閉深院。年年歲歲愁相見。金屋螢流長信階。綺櫳燕入昭陽殿。趙女通宵侍御牀。班姬此夕悲團扇。秋來明月照金微。榆黃沙白路逶迤。征夫塞上行。憐影少婦窗前想畫眉。上林鴻雁書中恨。北地關山笛裏悲。書中笛裏空相憶。幾見盈虧淚沾臆。紅閨貌減落春華。玉門腸斷逢秋色。春華秋色遞如流。東家怨女上妝樓。流蘇帳卷初安鏡。翡翠簾開自上鉤。河邊織女期七夕。天上嫦娥奈九秋。七夕風濤還可渡。九秋霜露迥生愁。九秋七夕須臾易。盛

年一去真堪惜。可憐揚彩入羅幃。可憐流素凝瑤席。未作當壚賣酒人。難邀入座撥琴客。客心對此歎蹉跎。烏鵲南飛可奈何。江頭商婦移船待。湖上佳人挾瑟歌。此時凭闌垂玉箸。此時滅燭斂青蛾。玉箸青蛾苦緘怨。緘怨含情不能吐。麗色春妍桃李蹊。遲輝晚媚菖蒲浦。與君相思在二八。與君相期在三五。空持夜被貼鴛鴦。空持暖玉擎鸚鵡。青衫泣掩琵琶絃。銀屏忍對箜篌語。箜篌再彈月已微。穿廊入闥靄斜暉。歸心日遠大刀折。極目天涯破鏡飛。

易水行

寒風夕吹易水波。漸離擊筑荆卿歌。白衣灑淚當祖路。日落登車去不顧。秦王殿上開地圖。舞陽色沮那敢呼。手持匕首摘銅柱。事已不成空罵倨。吁嗟乎。燕丹寡謀當滅身。田光自刎何足云。惜哉枉殺樊將軍。
三語千古斷案。

大梁行

朝登古城口。夕藉古城草。日落獨見長河流。塵起遙觀大梁道。大梁自古號名區。富貴繁華代不殊。高樓歌舞三千戶。夾道煙花十二衢。合沓輪騶交紫陌。鳴鐘暮入王侯宅。紅妝不讓掌中人。珠履皆爲門下客。片言立賜萬黃金。一笑還酬雙白璧。帶甲連營殺氣寒。君王推轂將登壇。彎弓自信成功易。拔劍那知報怨難。已見分符連楚越。更聞飛檄救邯鄲。一朝運去同衰賤。意氣雄豪似驚電。楊花飛入侯嬴館。草色淒

迷魏王殿。萬騎千乘空雲屯。綺構朱甍不復存。夜雨人歸朱亥里。秋風客散信陵門。川原百代重回首。宋寢隋宮亦何有。遊鹿時銜內苑花。行人尙折繁臺柳。繁臺下接古城西。春深桃李自成蹊。朝來忽見東風起。薄暮飛花滿故隄。

歲晏行

舊歲已晏新歲逼。山城雪飛北風烈。徭夫河邊行且哭。沙寒水冰凍傷骨。長官叫號吏馳突。府帖連催築河卒。一年徵求不少蠲。貧家賣男富賣田。白金縱有非地產。一兩已值千銅錢。往時人家有儲粟。今歲人家飯不足。飢鶴翻飛不畏人。老鴉鳴噪日近屋。生男長成聚比鄰。生女落地思嫁人。官家私家各有務。百歲豈止療一身。近聞狐兔亦徵及。列網持罾徧山城。野人知田不知獵。蓬矢桑弓射不得。嗟吁今昔豈異情。昔時新年歌滿城。明朝亦是新年到。北舍東鄰聞哭聲。

隴右行送徐少參

隴右地。長安西行一千里。秦日長城號塞垣。漢時故郡稱天水。聖朝掃盪無烽煙。射獵之地爲桑田。熟羌賣馬嘗入塞。將軍遊騎不出邊。知君風采古遺愛。揚策傳符度關內。父老三秦望節來。犬戎諸夷遮馬拜。開藩分道鎮邊塵。居守巡行歷幾春。熊軾朱幡今岳伯。豸冠白筆舊臺臣。瓦亭之西半山谷。土室陰陰連板屋。落月孤城清渭源。寒雲古磧黃河曲。十年此地曾遊歌。別來風物今如何。竹花秋臨烏鼠穴。楊葉夕

渡魚龍波。回看萬里風雲色。少小趨庭淚沾臆。相送悲吟不盡情。關山隴坂高無極。

津市打魚歌

大船峨峨繫江岸。鮎魴鱗鱗收百萬。小船取速不取多。往來拋網如擲梭。野人無船住水滸。織竹爲梁數如罟。夜來水長沒沙背。津市家家有魚賣。江邊酒樓燕估客。割髻斫鱠不論百。楚姬玉手揮霜刀。雪花錯落金盤高。鄰家思婦清晨起。買得蘭江一雙鯉。從從紅尾三尺長。操刀具案不忍傷。呼童放鯉激波去。寄我素書向郎處。

吳偉飛泉畫圖歌

長安獨過田子舍。留我一玩飛泉畫。絕壁如聞風雨來。晴天安得蛟龍掛。吳生跌宕得畫理。潦草落筆皆可喜。飛泉卻出沓嶂間。山卽真山水真水。客堂六月生晝寒。耳中髣髴高江灘。源潭窈窕不可測。波浪洶湧多奇觀。泉邊二老顏色異。偶坐似是莊與惠。萬里誰論到海心。百年詎識臨淵意。偉哉田子今儒宗。文標南指匡廬峰。不須對此更惆悵。會觀瀑布青天上。杉風松日隔縹緲。雲瀧雪瀨何雄壯。我常夢往神空向。豈無吳生好手筆。爲我寫寄廬山障。

胡人獵圖歌

邊沙蕭蕭天北風。高林晝屯鞍馬雄。胡人裝束身手健。真與此圖形貌同。冬寒獵傍長城窟。城下平原日

將沒呼鷹放犬無不爲。數騎彎弓競馳突。月高琵琶海西城。拂廬雪乾氍毹輕。金鍾虜酒亦易醉。玉腕胡
騮驕不行。白髮老胡黃戰裙。抽箭仰視天山雲。衆中若認射鵬手。漢家誰是李將軍。

皇陵

陵闕皇靈闕。山河王氣遙。萬年龍虎抱。每夜鬼神朝。玉盃留天地。金燈照寂寥。如看翠華度。縹緲在青霄。
足繼行次
昭陵之作

武關

北轉趨劉垵。西盤出武關。微茫一線路。迴合萬重山。天地幾龍戰。風雲惟鳥還。關門鎖溪水。日夜送潺湲。
峽中

自昔偏安地。於今息戰侵。江穿巫峽隘。山鑿鬼門深。濁浪魚龍黑。寒天日月陰。夜猿啼不盡。淒斷故鄉心。
昭烈廟

漂泊依劉計。間關入蜀身。中原無社稷。亂世有君臣。峽路元通楚。岷江不向秦。空山一祠宇。寂寞翠華春。
黃清甫云。匪直
個詞。亦存名教。

登樓鳳縣作

近訊中原使。兼登萬里樓。朝廷仍北極。行在且南州。峽斷風雲隔。江通日月流。如聞乘八駿。早晚向崑邱。

此爲武宗
南幸而作。

懷沈子

沈生南國去。別我獨悽然。落月清江樹。歸人何處船。十年安陸舍。數口太湖田。想到鄉園日。生涯亦可憐。

答望之

念汝書難達。登樓望欲迷。天寒一雁至。日暮萬行啼。饑饉饒羣盜。徵求及寡妻。江湖更搖落。何處可安棲。

送賈郡博之階州

十載一儒官。西行路復難。羌夷應俎豆。邊徼有衣冠。隴坂盤雲上。秦城向斗看。好音懷萬里。早晚報長安。

得王子衡贛榆書

萬里一書劄。逾年傳帝都。竄身天地遠。垂淚海雲孤。柳送燕臺駿。花留漢殿臯。赤霄終道路。白髮且江湖。

雨夜

院靜聞疎雨。林高納遠風。秋聲連蟋蟀。寒色上梧桐。短榻孤燈裏。清笳萬井中。天涯未歸客。此夜憶江東。

送曹端卿謫尋甸

逐客滇南郡。雲天此路長。高秋行萬里。落日淚千行。作賦投湘水。題書寄夜郎。殊方氣候異。去矣慎風霜。

關門

虎衛關門迥。龍沙塞曲深。風雲時有氣。日月晝常陰。中使西來訊。千官北望心。天寒漢宮闕。翠蓋憶春臨。
送彭總制之西川

蜀道青天上。岷山赤日西。九重連授鉞。萬里動征鼙。開府松杉靜。懸軍玉壘低。知公安蜀計。諸葛大名齊。
楊用修云。森嚴莊重。

安莊道中

處處人家空薜蘿。幾年凋弊擾干戈。山過白水峯巒峻。路入盤江瘴癘多。嶺徼土風連百粵。郊原人語雜諸羅。側身西望看銅柱。此地曾經馬伏波。

岳陽

楚水滇池經萬里。使車重喜過巴邱。千家樹色浮山郭。七月濤聲入郡樓。寺裏亭臺多舊主。域中冠蓋半同遊。明朝又下章華路。江月湖煙綰別愁。

送雷長史

彤管先朝隨帝子。白頭今日奉王孫。漢庭亦羨相如美。楚客重看賈傅尊。花下圖書開玉殿。日高琴瑟在朱門。十年亭閣淮西宴。腸斷梁王雪夜樽。
可匹空中。夜悲歌之詠。

送衛進士推武昌

少年佐郡楚城居。十郡風流盡不如。此去且隨彭蠡雁。何須不食武昌魚。仙人樓閣春雲裏。估客帆檣晚照餘。大別山前漢江水。畫簾終日對清虛。明秀

送陸舍人使吳下

柳拂清江畫鷁飛。節旄更喜便南歸。迴風樹裏吹官騎。返照河邊上客衣。北固樓臺秋寺徧。長洲花草故宮非。登臨莫怪多詞賦。吳下才人是陸機。

武昌聞邊報

傳聞曠騎近長安。北伐朝廷已命官。路遠居庸烽火暗。城高山海戍樓寒。一時邊將當關少。六月王師出塞難。先帝恩深能養士。請纓誰爲繫樓蘭。

懷寄邊子

汝從元歲侍君王。誰念先朝老奉常。一出雲霄空悵望。十年歧路各蒼茫。春天縹緲金莖露。晝日氤氳紫殿香。獨有揚雄尙陪從。白頭抽筆賦長楊。

得獻吉江西書

近得潯陽江上書。遙思李白更愁予。天邊魍魎窺人過。日暮鼃鼃傍客居。鼓柁襄江應未得。買田陽羨定何如。他年淮水能相訪。桐柏山中共結廬。神來之作。不以工拙論。所謂章法之妙。不見句法者。○信陽謂不讀唐以後詩。然買田陽羨自屬唐以後事。可知只是議論之

高。

劉德徵上陵還有贈

仙郎昨日五陵歸。駿馬朝回獨掩扉。已向西山瞻帝寢。更從北極眺王畿。霜鐘澗壑流清漢。玉殿松杉眇翠微。先帝侍臣零落盡。泰園宮草日霏霏。

登樓觀閣時王令明叔邀張用昭段德光王敬夫康德涵四子同遊

峻閣含風落照孤。憑高千里視平蕪。鳳笙錦曲春縹緲。瑤草金光晝有無。采藥幾時尋碧海。種桃無復問玄都。五陵冠劍豪遊地。猶是長安舊酒徒。

秋興

漢水東馳入楚來。長沙秋望洞庭開。江清樓閣中流見。日落帆檣萬里回。去國尙思王粲賦。逢時空惜賈生才。湘南兩度曾遊地。惆悵煙花暮轉哀。

前歲今皇新御極。鳳銜恩詔出明廷。孤槎奉使日南國。萬里題詩天畔亭。地入金沙江浩浩。風連銅柱海冥冥。昆明亦在滇城裏。池上虛疑織女星。

鮭魚

五月鮭魚已至燕。荔枝盧橘未能先。賜鮮徧及中璫第。薦熟應開寢廟筵。白日風塵馳驛騎。炎天冰雪護

江船銀鱗細骨堪憐。汝玉筍金盤敢望傳。賜及中瑤而寢廟未薦則波及臣家益無望矣中含

長安

白雲望不盡。高樓空倚闌。中宵鴻雁過。來處是長安。忠愛

竹枝詞

十二峯頭秋草荒。冷煙寒月過瞿塘。青楓江上孤舟客。不聽猿聲亦斷腸。

送韓汝慶還關中

華岳雲臺萬里情。高秋落日眺秦城。黃河一線通滄海。身在仙人掌上行。

別相餞諸友

雙井山邊送客時。滿林風雪倍相思。西行萬里遙回首。太華終南落日遲。只寫景而離情自見得唐賢三昧矣

王廷相廷相字子衡。浚川人。弘治壬戌進士。歷官至兵部尙書。加太子太保。諡肅敏。

赭袍將軍謠

萬壽山前播大鼓。赭袍將軍號威武。三邊健兒猛如虎。左提戈。右張弩。外廷言之赭袍怒。牙旂閃閃軍門開。紫茸罩甲如雲排。大同來。宣府來。即空同內教場歌意。

秋日巴中旅行

巴東秋氣早。行客已悽悽。江險深三峽。雲寒暗五溪。中原無雁至。異國足猿啼。況近烏蠻塞。連年尚鼓鼙。

登臺

古人不可見。還上古時臺。九月悲風發。三江候雁來。浮雲通百粵。寒日隱蓬萊。逐客音書斷。憑高首重回。

初見白髮

日日風塵色。勞勞簿領身。不知清鏡裏。已作二毛人。

宮怨

夜輦昭陽月。春筵上苑花。不成供奉日。枉自學琵琶。

古陵

古陵在蒿下。啼鳥在蒿上。陵中人不聞。行客自惆悵。
可當蒿里曲。故作曠達語。倍悽惋。

卷六

徐禎卿

禎卿字昌穀。吳縣人。弘治乙丑進士。官國子博士。○迪功詩。大不及李。高不及何。而丰骨超然。故應鼎足。○朱錫鬯云。人所應有。盡無。迪功是也。三人分量自見。○錢牧齋左

無不盡。無空同是也。人所應有。盡無。迪功是也。三人分量自見。○錢牧齋左。吳下。而排斥北地。王阮亭以文章。江左。煙月揚州。二語為吳體之卑。卑者彼此皆屬。偏見北地。自

有異人。吳體。非必卑也。

雜謠

夫爲虜妻爲囚。少婦出門走。道逢爺娘不敢收。東市街。西市街。黃符下。使者來。狗棘棘。雞鳴飛上屋。風吹門前草。蕭蕭陳臥子云此紀正德五年八月之變。

留別邊子

我車駕言邁。將子城之隅。豈無他人親。媿心自知。握手一爲歎。忽忽從此辭。驅車何迢迢。迢迢復遲遲。匪我車輪遲。行子有所思。登高望河水。河水何瀾瀾。褰裳欲涉之。俛首以踟躕。孤楊生河干。嫋嫋何參差。民生失儔匹。惻爾令心悲。褰裳欲涉下忽著比體此古人章法。

寄華玉

去歲君爲薊門客。燕山雪暗秦雲白。馬上相逢脫紫貂。朝回沽酒城南陌。燕山此日雪紛紛。祇見秦雲不見君。胡天白雁南飛盡。千里相思那得聞。

送士選侍御

壯士樂長征。門前邊馬鳴。春風三月柳。吹暗大同城。蘆溝橋下東流水。故人一尊情未已。胡天飛盡隴頭雲。惟見居庸暮山紫。羨君鞍馬速流星。予亦孤帆下洞庭。塞北荆南心萬里。佩刀長揖向都亭。

青門歌送吳郎

吳郎醉嗜長安酒。落魄自言爲客久。走馬頻看上苑花。回鞭幾折青門柳。青門瞳瞳魚鑰開。乳燕遊絲相逐來。柳下雕鞍留別袂。花間酒盞覆蒼苔。浮雲去去辭城闕。芳草連天那可歇。野店春風聽早鶯。關河曉樹懸新月。千里淮流雙畫橈。廣陵驛前逢暮潮。落日帆歸揚子渡。青山家對伯通橋。吾家流水元非隔。宛轉胥臺通巷陌。草長難尋仲蔚居。林深不辨陶潛宅。清溪屋下可垂綸。復有萋羹足獻親。君歸倘食冰絲鱠。爲念羈棲塞北人。

從吳學士姪奎觀模米襄陽山水圖并學士題識

昔上黃鶴樓。西望襄陽隄。襄陽草樹淡於染。清猿落日令人迷。歸來復見襄陽畫。銀海珠源恍餘派。楚山沉沉煙霧高。淋漓七澤翻波濤。漁舟賈舶入點綴。竹林楓樹懸江臯。白雲縹緲蒼梧遙。旖如湘君垂素旄。我欲乘雲向空舉。拄杖呼雲雲不起。山中薜蘿不可親。悵望伊人隔秋水。延陵學士襄陽儔。對此踟躕搔白頭。碧山心期竟已矣。回首歲月成荒邱。猶有篇章未磨滅。教人空憶舊風流。

古意

空爲郢中客。不見郢中吟。美人高堂上。自奏山水音。帝子葬何處。瀟湘雲正深。寂寥誰共賞。江上獨傷心。

彭蠡

茫茫彭蠡口。隱隱鄱陽岑。地湧三辰動。江連九派深。揚舡武昌客。興發豫章吟。不見垂綸叟。煙波空我心。

在武昌作

洞庭葉未下。瀟湘秋欲生。高齋今夜雨。獨臥武昌城。重以桑梓念。淒其江漢情。不知天外雁。何事樂長征。

李舒章云。八句竟不可斷。○五言律皆孟襄陽遺法。純以氣格勝人。

長陵西望泰陵

昔送宮車出。長悲西雍門。今來寒食節。獨望霸陵園。杳杳仙城閉。萋萋封樹繁。當時侍從客。慟哭幾人存。

隔句對。泯然無痕。忠愛之意溢於言表。

送范靜之遷威州

吾憐范巨卿。悃悞不邀名。作吏竹林下。清風訟獄平。與君同得罪。獨竄夜郎城。萬里巴江水。相思猿狖鳴。

酬邊太常於燕山見憶之作

故人惠思我。百里寄瑤音。獨在山中宿。松齋清道心。霜鐘流夜壑。曲澗入幽琴。寂寞悲千古。橋陵梓櫟深。

送友人還吳

陽月隨陽鳥。遙從塞上來。北人江北望。不見隴頭梅。坐下楊朱淚。吟爲莊舄哀。聊傳數行札。千里送君回。

月

故園今夜月。迢遞向人明。只自懸清漢。那知隔鳳城。氣兼風露發。光逼曙烏驚。何事江山外。能催白髮生。

送盛斯徵赴長沙

昔愁越嶲千峯仄，轉入巴渝萬里賒。豈料聖恩憐賈誼，猶煩佐郡出長沙。蠻中瘴遠三湘水，江畔春逢十月花。遙聽岳陽樓上笛，可能迴首憶京華。送人每以忠愛勉之，此立言之體。

送耿晦之守湖州

遠下吳江向雪川，高秋風物倍澄鮮。鳩鵲菰葉翠相亂，錦石遊鱗清可憐。郵渚頻搥津吏鼓，漁歌唱近使君船。吳興峴山足勝事，漢水襄陽空昔賢。不點湖州故實，而山水清遠宛然在目。高季迪疎柳一旗江上酒，亂山孤棹道中詩，自是佳句，然不必定是湖州詩也。

贈別獻吉

爾放金雞別帝鄉，何如李白在潯陽。日暮經過燕趙客，解裘同醉酒壚旁。徘徊桂樹涼颿發，仰視明河秋夜長。此去梁園逢雨雪，知予遙度赤城梁。

古宮詞

興慶池頭漏未闌，梨園子弟曲將殘。花前更奏涼州伎，無那西宮月色寒。

春思

渺渺春江空落暉，行人相顧欲霑衣。楚王宮外千條柳，不遣飛花送客歸。

濟上作

兩年爲客逢秋節，千里孤舟濟水旁。忽見黃花倍惆悵，故園明日又重陽。唐語不必深而情深，人身分如此。

安南歌送沈使君

借問炎交路若何，片帆南指廣州過。知君怕見桄榔樹，近嶺猿聲日漸多。
烏蠻灘上煙水聲，伏波廟前秋月明。夜半津人挽舟上，夷歌偏動望鄉情。

送蕭若愚

送君南下巴渝深，予亦迢迢湘水心。前路不知何地別，千山萬壑暮猿吟。與何大復太華終南之篇可云雙美。

殷雲霄

雲霄字近夫，壽張人。弘治乙丑進士，官南工科給事中。

春望

二月澄江春水深，北孤山頭雲陰陰。北孤山頭雲作雨，我欲渡江愁我心。

孟洋

洋字望之，信陽人。弘治乙丑進士，官至南京大理寺卿。

煙

湘流落日外，沙迥暮生煙。杳杳千峯失，霏霏萬壑連。鵲翻知浦樹，人語辨江船。暗裏猿聲起，愁深夜不眠。

王韋

韋字欽佩，上元人。弘治乙丑進士，官至太僕少卿。

閣試春陰詩

皇都三月春正深。東風釀暖淑氣侵。曙光溟濛露華滿。輕雲閣日天沉沉。野色垂垂十餘里。草綠柔茵低
迤邐。半空落絮濕未揚。百丈游絲寒不起。鶉鳩枝上相踏鳴。若與此景偏多情。空庭簾捲晝亦暝。隔牆惟
見桃花明。小院門閑鶯自語。畫棟泥香燕初乳。苔花蒼潤上簾櫳。濛濛經雨還未雨。含情佇立憑闌干。遠
峯漠漠登樓看。碧窗窈窕銀屏冷。金帳促回翠袖單。簷影頻移暝雲動。曲枕悠然醒午夢。起來小立傍閑
塔。花霧襲衣寒氣重。末二語李西涯批其卷云如有神助。

柳枝詞

渭水西來萬里遙。行人歸去水迢迢。垂楊不繫離情住。只送飛花過渭橋。

鄭善夫

善夫字繼之。閩縣人。弘治乙丑進士。除禮部主事。以諫南巡杖闕下。尋乞歸。用薦起南京刑部郎中。改吏部。○少谷以杜爲師。然過於質直。去風雅或遠。

初離京邑留別諸同志

驅車遵城闌。振策率廣路。仰盼孤雲征。俯見波流沔。感念平生歡。豈以杯酒故。羣居不自察。相失增怨慕。
川河引舟楫。陵陸曠煙霧。重覲難可尋。努力敷襟素。

送蘇侍御從仁使蜀

驄馬今何去。玄冥歲已殘。風雲行劍閣。鉦鼓動松潘。事在西戎部。功虧舊將壇。懷柔亦邊略。要識聖恩寬。

秋夜

七月欲盡天氣清。殘月未上江猶明。流螢渡水不一點。玄蟬咽秋無數聲。獨客尙未送貧賤。四方況是多甲兵。立罷西風夜無寐。吳歛孌孌感人情。類唐似杜

權歌

青螺江頭遊子吟。黃金臺上秋雲深。風塵一別一萬里。美人駕車傷我心。

孫一元一元字太初不知何許人或曰安化王孫也自號太白山入晉西入華南入衡東登岱又南入吳終於吳興

訪樵者

遠尋山中樵。不識山中路。隔林伐木聲。遙憶林深處。不晤竟空歸。日墮西陵樹。

晚霽

晚來雨初霽。煙火隔林微。一徑牛羊入。孤村桑柘稀。長天下遠水。積霧帶巖扉。月黑聞人語。溪南種樹歸。

韓邦靖邦靖字汝慶朝邑人正德戊辰進士除工部員外以直言繫錦衣獄奪官後起山西左參政

關中

不得秦中信。今傳關內兵。饑荒失撫御。盜賊遂縱橫。渭北何由定。商南豈可行。不知今日將。誰是漢長城。

張含含字愈光永昌人正德丁卯中雲南鄉試

己亥秋月寄楊升庵

金馬秋風十載餘。芙蓉深巷閉門居。登樓莫作依劉賦。奉使曾傳諭蜀書。臥病可憐天一柱。獨醒無奈楚三閭。比來消息風塵斷。白首滄江學釣魚。

胡纘宗纘宗字孝思。鞏昌人。正德戊辰進士。歷官至右副都御史。乘輿幸楚。纘宗作詩紀事。為人告訐。下獄尋放歸。

登天柱閣

與客上江樓。橫江山欲浮。雲當天柱出。月傍小孤流。帆外收吳楚。尊前落斗牛。瀾漫忽千里。倚檻思悠悠。

戴冠冠字仲鸞。信陽人。正德戊辰進士。授戶部主事。以建言貶廣東烏石驛丞。起官終山東提學副使。

立春日舟中題

作客尙無地。他鄉空復春。舟中兒女大。天末歲時新。樂事喧殊俗。羈愁滯遠人。椒盤懷故里。腸斷白頭親。

駱用卿用卿字原忠。餘姚人。正德戊辰進士。官兵部員外郎。

題韓信廟

逐鹿中原漢力微。登壇頻蹙楚軍威。足當躡後猶分土。心已猜時尙解衣。畢竟封侯符蒯徹。幾曾握手到

陳豨。英魂漫灑荒山淚。秋草長陵久落暉。李獻吉云。此題淮陰廟絕唱也。○三四極寫漢高詭詐而淮陰之冤自在言下遇之。

楊慎慎字用修。新都人。正德辛未賜進士第一。授翰林修撰。以議大禮泣諫。杖謫永昌。天啓初追諡文獻。○升庵以高明伉爽之才。宏博絕麗之學。隨題賦形。一空依傍。于李何諸子外。拔戟

自成一隊。五言非其所長。以過於穠麗。失穆如清風之旨也。

宿金沙江

往年曾向嘉陵宿。驛樓東畔闌干曲。江聲徹夜攪離愁。月色中天照幽獨。豈意飄零瘴海頭。嘉陵回首轉悠悠。江聲月色那堪說。腸斷金沙萬里樓。

三岔驛

三岔驛。十字路。北去南來幾朝暮。朝見揚揚擁蓋來。暮看寂寂迴車去。今古銷沉名利中。短亭流水長亭樹。

錦津舟中對酒別劉善充

錦江煙水星橋渡。惜別愁攀江上樹。青青楊柳故鄉遙。渺渺征人大荒去。蘇武匈奴十九年。誰傳書札上林邊。北風胡馬南枝鳥。腸斷當筵蜀國絃。五言近體。有江花與江草異國看春生句。同一悽惋。

賦得千山紅樹圖送楊茂之

蕭郎雅工金碧畫。愛畫碧雞與金馬。畫作千山紅樹圖。行色秋光兩瀟灑。搖落深知宋玉悲。登山臨水送將歸。丹林初曉清霜重。紫谷斜陽赤燒微。故人辭我故鄉去。滇樹遙遙接巴樹。桑落他山共醉時。楓香客路消魂處。白首遐荒老未還。流波落木慘離顏。錦城紅樹那能見。千里隨君夢裏攀。才人遠窺千古恨事。讀數詩令人百端交

垂楊篇

靈和殿前豔陽時。忘憂館裏光風吹。千門萬戶旌旗色。九陌三條雨露滋。蒼涼苑日籠燕甸。縹緲宮雲覆京縣。芳樹重重歸院迷。飄花點點臨池見。臨池歸院總仙曹。應制分題競彩毫。詔乘西第將軍馬。詩奪東方學士袍。金明綠暗留煙霧。舊燕新鶯換朝暮。只知眉黛爲君顰。肯信腰肢有人妬。從此沉淪萬里身。可憐憔悴幾經春。支離散木甘時棄。攀折荒亭委路塵。搖落秋空上林遠。婆娑生意年華晚。腸斷關山明月樓。一聲橫笛清霜坂。

送余學官歸羅江

豆子山。打瓦鼓。陽坪關。撒白雨。白雨下。娶龍女。織得絹。二丈五。一半屬羅江。一半屬玄武。我誦綿州歌。思鄉心獨苦。送君歸羅江浦。全用綿州歌。後只綴四語送行。另是一格。

塞垣鷓鴣詞

秦時明月玉弓懸。漢塞黃河錦帶連。都護羽書飛瀚海。單于獵火照甘泉。鶯閨燕閣年三五。馬邑龍堆路十千。誰起東山安石臥。爲君談笑靖烽煙。

送彭幸庵尙書致仕

憶昔西征歌采薇。雪山萬里駐驂騑。總戎全蜀風雲陣。紀績成周日月旂。諸葛蔓菁遺壁壘。陶潛松菊舊

柴扉前賢出處眞相似。雅志如公兩不違。

春興

最高樓上俯晴川。萬里登臨絕塞邊。碣石東浮三絳色。秀峯西合點蒼煙。天涯遊子懸雙淚。海畔孤臣謫九年。虛擬短衣隨李廣。漢家無事勒燕然。義勇之氣。至欲託之從軍。讀者可以悲其志矣。

天上風雲此際多。山中日月竟如何。爭傳鳴鳳巢阿閣。又見飛鴻出尉羅。宣室鬼神思賈誼。中原將帥用廉頗。難教遲暮從招隱。擬把生涯學醉歌。

柳

垂楊垂柳管芳年。飛絮飛花媚遠天。金距鬪雞寒食後。玉蛾翻雪暖風前。別離江上還河上。拋擲橋邊與路邊。遊子魂銷青塞月。美人腸斷翠樓煙。帶六朝格。八句皆對。又體中之變者。杜老風急天高一章其開先也。

懷歸

星橋南望沉犀渚。雪嶺西連抱珥河。關塞渺茫魂夢隔。山川迢遞別離多。汀洲春雨寥芳杜。茅屋秋風帶女蘿。心事未從詹尹卜。生涯聊聽爨童歌。

武侯廟

劍江春水綠沄沄。五丈原頭日又曛。舊業未能歸後主。大星先已落前軍。南陽祠宇空秋草。西蜀關山隔

暮雲正統不慙傳萬古。莫將成敗論三分。古來武侯廟詩以此章爲最情韻聲律無一不合也。或云此升庵錄元人作。

涪江泛舟

明月沉清露。秋風起白雲。蘭橈乘溜急。木葉下江聞。爽籟金懸奏。遙峰翠積氛。碧潭留雁影。錦泖散虹文。旅望隨天豁。幽阿與歲分。登臨知自好。寂寞共誰云。

江陵舟中贈田李二子

落月寒沙夜未分。玉簫金管醉中聞。明朝回首沉江路。愁聽清猿和白雲。

常

倫字明卿沁水人正德辛未進士除大理評事

望山有懷故人

羈步局重城。流觀狹四野。高高見西山。鄉愁冀傾寫。天際望不極。延佇一瀟灑。落葉歸故根。山雲滿楸檟。無情尙有適。何以慰離者。

過韓信嶺

漢代推靈武。將軍第一人。禍奇緣躡足。功大不容身。帶礪山河在。丹青祠廟新。長陵一杯土。寂寞亦三秦。

周

在字善卿太倉州人正德甲戌進士官至浙江右參政

閨怨

江南二月試羅衣。春盡燕山雪尚飛。應是子規啼不到。故鄉雖好不思歸。不告征人不返而歸怨於子規寄情一何微婉。

薛

蕙字君采。亳州人。正德甲戌進士。官吏部員外郎。以議大禮下獄。尋復職。未幾罷歸。○西原詩力追雅音。故不落凡近語。覽者勿以才情求之。

效阮公詠懷

飄風振玄幕。若木零朱華。六龍匿西山。濛汜揚頰波。翩翩市中子。於心太回裘。不見顛顛色。但聞慷慨歌。卑辱誠未遠。禍亂豈在多。人人各懷私。安能顧其他。已矣勿重陳。嗟予可奈何。守身慎微語。可作箴銘。生才良不幸。處世誠獨難。揚蛾興妬階。懷璧賈罪端。靈均既見放。韓非亦自殘。奉身失所從。慷慨使我歎。

雜詩

富貴使心惑。嗜欲致行妨。宴安損性靈。美疢生膏肓。吾觀古來士。高躅互相望。首路或暫同。中道何蒼黃。班生嗣前列。馬融遁遠方。藉梁奄爲累。附竇終自戕。通人識尙爾。咄咄可悲傷。文人末路。汗行戕生。皆富貴之念中之也。班固馬融。朗然前鑒。猶有借學術以附權門者。

贈孟望之

踟躕郊野外。白日匿西山。行人去有期。安得久周旋。請爲遊子吟。與子結纏綿。憂來動人心。惻愴不能言。言念平生友。意氣非徒然。行役不足辭。貧賤非所憐。君其篤明信。慰我心悄悄。

月夜坐憶

明月三五時。流光千里外。虛館風泠泠。寒墀霜靄靄。不見南樓客。徒憶西園蓋。歡酒無盈觴。憂襟有餘帶。沉吟靜夜思。緬邈佳人會。

答王允升省中對雨見憶之作

康樂愁霖唱。平原苦雨詩。故人歌此曲。贈我慰相思。薜荔垂青閣。芙蓉泛綠池。今朝一尊酒。最恨不同持。

昭王臺

燕昭無故國。薊野有空臺。寂寞黃金氣。淒涼滄海隈。儒生終報主。亂世始憐才。回首征塗上。年年此地來。
亂世始憐才。是今急而求子注脚。

草堂

蕭蕭寒雨對高秋。寂寂空牀擁敝裘。歸去鈞天頻有夢。挽回滄海獨無謀。平生頗詫任公子。末路方思馬少游。珍重故人招隱意。草堂南郭可淹留。

孫氏沱西別業

巴陵西來沱水深。水邊樓閣長陰陰。鼃鼃夜出洞庭岸。虎豹晝啼雲夢林。鼓枻乍逢漁父笑。舉舟時聽越人吟。卜居何日從公去。擬向桃花處處尋。

送楊石齋

社稷功成後。山林避寵年。遭逢誰可竝。出處獨超然。反側當前日。經綸邁昔賢。殷憂興聖主。至治格皇天。凶豎同摧朽。蒼生盡解懸。廟謨隨指顧。臣節見周旋。智勇千夫敵。勳勞百辟先。賞仍虛裂土。名已重凌煙。握璽慚周勃。揮金緬魯連。急流嫌盛滿。介石慕貞堅。許國心恆切。還鄉興偶牽。留侯初相漢。樂毅免辭燕。異渥絲綸數。高風進退全。草停黃閣詔。花簇錦江船。水檻星橋側。茅堂雪嶺邊。雲霞深綠野。卉木富平泉。事業存鐘鼎。儀型照簡編。累朝瞻翊戴。四海憶陶甄。白首歸休記。青春送別筵。衣冠望行色。端不異登仙。

送周子賢按貴州

萬里牂牁路。炎州百粵南。懸梯穿鳥道。流沫下龍潭。赤坂鼉鼉出。玄崖日月含。虹霓蒸海氣。煙霧灑春嵐。飛獮緣篁竹。垂猿墮石楠。橘花香細細。藤刺綠毳毳。嶺外青驄馭。臺中白筆簪。秦冠高鐵柱。漢節照金函。行邁應多暇。登臨素所耽。江山吟謝客。物色助清談。送遠多無緒。憂時且不堪。安危廷諍地。遲子促朝參。

許宗魯宗魯字伯誠咸寧人正德丁丑進士官至副都御史巡撫遼東

東岳

秩祀嚴東土。明禋冠五宗。金函神鬼籙。玉簡帝王封。海湧中宵日。巖留上古松。何當凌巖嶽。飛舉跨蒼龍。遼左雪中登樓

歲杪崇朝雪。天涯絕塞城。凍雲連海色。枯木助風聲。懷土情無已。登樓賦未成。梅花南國思。笛裏暮愁生。

登齊山樓

近郭危樓俯碧湍。倦遊孤客倚朱欄。淮淝山色尊前出。吳楚江流畫裏看。旅思逢秋增短鬢。鄉心隨雁過長安。黃花白酒登高日。玉笛金笳起暮寒。對結體每防收束不住。此故別於中間對偶。

班婕妤

妾命由來薄。君恩豈異同。自憐團扇冷。不敢怨秋風。

王廷陳

廷陳字稚欽。黃岡人。正德丁丑進士。授吏科給事中。諫南巡。謫裕州知州。尋下獄。免歸。

矯志篇

蛟龍雖困不資凡。魚鸞驚雖孤不匹。鸞雖有香草。當戶必除。雖有仁人在敵。必誅。狐白雖美。炎暑必置。舟車之用。易地則棄。蘭蕙不采。無異蓬蒿。干將不試。世比鉛刀。以驥捕鼠。曾不如狸。餓夫獲璧。不如得糜。郭生純臣。魯連高士。彼乃登臺。此乃蹈海。寧直見伐。無爲曲全。寧渴而死。不飲盜泉。

詠懷

民食美。芻豢鳴。鳶鳶甘。臭陳。西子豈不都。魚鳥不見親。萬類殊所嗜。物豈慕非倫。箕畢各有好。況此世上羣。情欲孰爲正。參差何可均。黜智任自然。悠悠葆天真。

聞箏

花月可憐春。房櫳映玉人。思繁織指亂。愁劇翠蛾顰。授色歌頻變。留賓態轉新。曲終仍自敍。家世本西秦。
佛衍十五嫁
王昌之作。

敖英英字子發清江人正德辛巳進士官至河南右布政使

塞上曲

無定河邊水。寒聲走白沙。受降城上月。暮色隱悲笳。玉帳旄頭落。金徽雁陣斜。幾時征戰息。壯士盡還家。

輞川謁王右丞祠

蜀棧青騾不可攀。孤臣無計出秦關。華清風雨蕭蕭夜。愁絕江南庾子山。
爲右丞辨冤語極含蘊

蔡

羽羽字九達吳縣人國子生授南翰林院孔目

思田園

南方藝樹早。嘉蔬當及時。王官鑿冰罷。忽起田園思。東郊織臺笠。西郭編茅茨。田家不辛苦。衣食更待誰。曳裾京華塵。徒自墮四支。三江綠煙起。何時佇杖藜。

曉起

竹色衣全綠。林光露未晞。隴猿催夢曉。寒月墮煙微。別恨琴中語。流年暗裏歸。悠悠花上蝶。故故作雙飛。

文徵明徵明初名璧以字行更字徵仲長洲人以歲貢入京用薦授翰林院待詔卒私諡貞憲○待詔嘗有句云湖上修眉遠山色風前薄面小桃花亦廣平之賦梅花也

新秋

江城秋色淨堪憐。翠柳鳴螭鎖斷煙。南國新涼歌白苧。西湖夜雨落紅蓮。美人寂寞空愁暮。華髮凋零不待年。莫去倚欄添悵望。夕陽多在小樓前。

滄浪池上

楊柳陰陰十畝塘。昔人曾此詠滄浪。春風依舊吹芳杜。陳迹無多半夕陽。積雨經時荒渚斷。跳魚一聚晚風涼。渺然詩思江湖近。更欲相攜上野。

王

寵字履吉。吳縣人。貢入太學。圭臬顏謝。痕跡未融。然爾時吳中詩格以貢士爲最。七言律亦頗沉鬱。或者必以摹古短之。何也。

巨發胥口經湖中瞻眺

瀛壖委菹藪。地嶮隘山川。渾沌自太古。漭泆開吳天。仰飲延池津。俯灌東南偏。龍宮謁瑰麗。蛟室闕幽玄。孕化晨陽吐。涵虛宵象懸。洪流既瀾沛。列嶂亦迴延。靈標海上闕。石秀鏡中蓮。開冬眷肅氣。落木浩無邊。黃鵠展奇翼。八表恣周旋。倘遇浮邱公。敝造蓬萊巔。

夙有邱壑尙。緬懷鸞鶴蹤。揚帆忽天矯。赤水驂虬龍。五湖寫杯掌。三州盪雲胸。金屏匝地軸。玉鏡開天容。丹邱駐日月。瑤草連春冬。絳氣恣縈薄。青霞何復重。仙人蛻化處。千載空芙蓉。靈境指顧間。行當往追從。
極意造句。擬之鑄金錯采。

入消夏灣

千山翫迴轉。雙闕開嶙峋。圍作玉鏡潭。流水桃花春。雞犬自甲子。衣冠乃秦民。表裏重湖阻。丹青四望勻。孤峯表日觀。羣嶂摩天垠。波光別駘宕。霞采相鮮新。疑觴王母池。誤攀織女津。海鷗戲蘭薄。游鯈瑩心神。牙橋悲昔幸。玉輦罷今巡。榮華無常境。山水有天真。塵纓聊以濯。慚爾權歌人。

送錢太常元抑祠祭顯陵

江漢朝百靈。絳節集鄢郢。興園奠其陽。虹蜺熠光景。象設開天庭。環衛森五嶺。齋房產金芝。玉醴出金井。神遊駕虛無。劍舄存遺影。灑掃祠官虔。七鬯皇情耿。太常典秩宗。精白一心秉。龍顏授玉册。殿上親祇領。玄端佩衝牙。陟降瑤壇靜。風清靈旗翻。天赤御氣罔。山河扶棟梁。虎旅肅藩屏。還軺告成命。弭節指俄頃。備聞古夔龍。密勿金華省。彷彿弘治風。廷論多骨鯁。我輩飽藜藿。散髮從箕穎。肅肅穆穆得漢郊祠歌一體

南都

錦纜牙檣萬里遊。天吳海若翼王舟。襄城七聖空迷轍。弱水三山未穩流。邊塞風雲連朔漠。重臣節鉞自公侯。兩京角立分形勢。居重還須控九州。羽檄時聞江彬輩節鉞自擅而帝遊幸無度失居重馭輕之勢草莽臣怒然憂之此詩史也

秋懷

鳳管龍簫清且悲。南徐北固自逶迤。海門直指聯三象。日馭巡行逼九疑。入計衣冠輕璽綬。防秋兵馬偃

旌旗長卿諫獵無消息。悵望江湖有所思。

亦武宗幸京口時作。

金

鑾字在衡隴西
鑾人寓居金陵

泊淮上

愁輕遊冶興。老重別離情。野戍寒更盡。河橋春水生。斷雲疎雁影。殘月亂雞聲。明發應千里。蕭蕭過楚城。

除夕

還憶去年辭白下。卻憐今夕在黃州。空江積雪添雙鬢。細雨疎燈共一樓。世難久拚魚雁絕。家貧常爲稻粱謀。歸來故舊多凋喪。愁對東風感舊遊。

明詩別裁

卷七

高叔嗣叔嗣字子業祥符人嘉靖癸未進士官至湖廣按察使○蘇門五言冲淡得章蘇州體王元美評云如高山鼓琴沉思忽往木葉盡脫石氣自青良然○王敬美云徐昌穀高子業二君詩有不同而皆巧於用短徐以高韻勝高以深情勝更千百年李何有時廢興二君必無絕響

再調考功作

引疾三上書微願不克諧。徒官復在茲。心迹一何乖。軒裳日待旦。閭闔凌雲排。入屬金馬籍。出與羣龍偕。積賤詎有基。履榮誠無階。但惜平生節。逾久浸沉埋。既妨來者途。誰明去矣懷。鳥迷思故林。水落存舊涯。惟當尋素業。歸臥守荆柴。謹微葆真不躁進不妨賢卓然想其風槩○入理不腐善學大謝

古歌

荆和當路泣。良璞爲誰明。茫然大楚國。白日失兼城。燕石十襲重。魚目一笑輕。古來多感歎。今予益吞聲。

敘懷

伊昔追弱冠。奮足參賢豪。衣褐出下國。脫輓造中朝。聖期開九五。河清在一朝。升龍假玄淵。鳴鳳託芳條。五從宰府辟。連荷公叔招。名過有瑕類。道在無矜驕。猶全不肖軀。解冕未逍遙。

答谷司僕見問

幸自返中園。非關逃微祿。方因疾病餘。黽勉供樵牧。春至東郭田。夏來北林木。時從遠原上。日縱平郊目。野老逢與言。道書間能讀。何能共世人。無事相追逐。勞君問出處。日暮掩茅屋。

簡袁永之獄中

本同江海人。俱爲軒冕誤。子抱无妄憂。余有多言懼。昔來始青陽。今此已白露。豈乏速進階。苟得非予慕。罪至欲何言。直以愚慵故。衆女競中閨。獨退反成怒。追誦古時人。蒙冤誰能訴。皇心肯照微。與子齊歸路。病起偶題

送別德兆武選放歸

空齋晨起坐。權遊罷不適。微雨東方來。陰靄倏終夕。久臥不知春。茫然怨行役。故園芳草色。惆悵今如積。燕郊秋已甚。木葉亂紛紛。失路還爲客。他鄉獨送君。罷歸時共惜。棄置古常聞。莫作空山臥。令人望白雲。分水嶺晚行

寒食定興道中

客興日無奈。兵荒歲屢加。少年曾許國。多難更移家。遠水通春騎。孤城起暮笳。憑高一回首。何處是京華。二月鶯花少。千家雨雪霏。可憐值寒食。猶未換征衣。積水生空霧。高城背落暉。忍看楊柳色。從此去王畿。

徐

階三。階字子升。華亭人。嘉靖癸未。賜進士第。累官少師。吏部尙書。贈太師。諡文貞。

送司封仲芳楊子赴留都

哲人重道義。朝貴不足糜。丈夫志四方。遠適非所悲。如何與子別。悵悵不忍辭。古道日淪替。羣諛紛追隨。子獨諒迂僻。經訓相麴規。去住忽以異。麗澤安所資。頽波無停流。靈耀亦西馳。感此重念子。何以慰爾知。至理不外得。吾心實吾師。願言勵操存。千里同襟期。

橫溪爲彭允禎賦

橫溪東去水迢迢。虛閣重簷共寂寥。山外夕陽低度鳥。雨餘春渚暗通潮。寒空落葉書聲靜。秋草孤帆客夢遙。欲徙石湖湖上石。爲君乘月更吹簫。

鄭

旦。旦字希周。歙縣人。嘉靖癸未。進士。官至浙江右布政使。

曉發洱海夕次濱川

天高野曠瘴煙收。風急霜繁落木秋。箐道千盤臨戍堡。山城百雉入邊州。諸蕃樂歲休戎馬。孤館頻年望斗牛。夜半角聲吹激烈。紛紛涼月照人愁。

張時徹

時徹字唯靜。鄞縣人。嘉靖癸未。進士。官至南京兵部尙書。

采葛篇

種葛南山下。春風吹葛長。二月吹葛綠。八月吹葛黃。腰鎌逝采掇。織作君衣裳。經以長相憶。緯以思不忘。出入君篋笥。長得近輝光。層冰布河水。中野皓凝霜。吳羅五文采。蜀錦雙鴛鴦。君恩當斷絕。歎息摧中腸。中腸日以摧。葛葉日以衰。願留枯根株。化作萱草枝。古樂府語意

初秋

一聲漁唱海天秋。素練初飛白鷺洲。亦有芙蓉自開落。何人解識漢宮愁。

蘇

祐字允吉。濮州人。嘉靖丙戌進士。官至兵部左侍郎。宣大總督。

九日

落木驚風候。淹留感歲華。陰雲連紫塞。清淚對黃花。八駿周京馬。孤蓬漢使槎。高臺予懶上。不爲苦思家。

予告歸入倒馬關作

南風吹雨傍關來。關上千峯畫角哀。老去尙憐金甲在。生還重見玉門開。鷓鴣絃謾引思歸調。虎節空慚上將才。聖主恩深何以報。車前部曲重徘徊。

塞下曲

將軍營外月輪高。獵獵西風吹戰袍。鬢髮無聲河漢轉。露華霜氣滿弓刀。

華

察院。○學士。五言。沖淡。有陶韋風。然垢氣已離。未穿溟滓。

秋日觀稼樓曉望

日出天氣清。山中悵幽獨。登高一眺望。風物淒以肅。流水映郊扉。炊煙散林屋。秋原一何曠。薄陰翳荒竹。時聞鳥雀喧。因念禾黍熟。悠悠沮溺心。千載猶在目。王摩詰云。雀喧禾黍熟。此衍作十字。便不及古人。

宿玉陽山房

返照明溪梁。深松晦夕景。巖臥符夙期。雲陰石牀冷。因投物外心。遂入清虛境。天寒木葉疎。月照山房靜。然燈獨不寐。秋宵一何永。明發從此辭。白雲鎖蒼嶺。

游善卷碧仙巖

落日下空門。齋鐘出林莽。偶茲叩精廬。再宿翠微上。舊游不知處。但見松杉長。巖虛露氣清。坐覺心魂爽。月白山窗高。夜靜風泉響。遂令寤寐中。超然脫塵網。雲壑永棲遲。願言稅歸鞅。

五月望夜與諸君山中再酌

仲夏苦晝永。薰風起將夕。圓景海上來。照此山中客。坐令微暑消。兼使衆累釋。興至時命觴。露下復移席。因就水竹居。遂同魚鳥跡。盤遊豈忘返。翫物聊自適。臺空人影疎。夜靜潭氣白。參差樹杪峯。歷歷辨咫尺。超然悟真境。萬物一虛寂。

山臺曉望懷王僅初不至

初日照臺上，興來成獨遊。天高宿霧盡，木落空山秋。曉色侵殘鬢，新寒上故裘。吳門隔煙水，悵望空悠悠。

惠山寺與施子羽話別

看山不覺暝，月出禪林幽。夜靜見空色，身閑忘去留。疎鐘隔雲度，殘葉映泉流。此地欲爲別，諸天生暮愁。

夜靜見空色五字入微然鍾譚專取此種便與詩道日遠

陸

粲字子餘長洲人嘉靖丙戌進士官工科給事中坐劾張桂謫都勻驛丞遷知永新縣

贈別王直夫

威鳳天際翔，潛虬澤中蟠。嚴子時閉肆，貢公乃彈冠。顯晦豈必同，各以性所安。子行樹遠績，奮身青雲端。鄙人棲蓬藿，蹇拙聊自完。丈夫志千載，飛沉何足歎。相期保貞素，歲晚同金蘭。

袁

袞字永之吳縣人嘉靖丙戌進士官刑部主事謫戍湖州後用薦起官至廣西提學僉事

送陳德夫使魯

帝曰封同姓，皇華遣使臣。河山藏漢誓，寶玉展周親。殿說靈光古，經傳孔壁新。余生好文獻，一爲訪先民。

自柳至平樂道中書事

遠觸蒼梧瘴，初乘灘水槎。蚺蛇晴掛樹，射蠖晝含沙。屋覆湘君竹，山開蜀帝花。夷堅收未盡，博物待張華。

大駕視牲南郊

大路調仙馭。朱旗列禁城。帝牛三月繫。田燭九衢明。日並龍旒出。山將彩仗迎。橫汾卑漢詠。禋祀達皇情。
秋興

仙仗行宮舊內居。花間往往駐鸞輿。徒聞漢帝橫汾曲。不見長卿諫獵書。天子射蛟開水殿。奚官牧馬遍郊墟。兼葭首宿秋無限。悵望煙雲萬里餘。

王慎中

慎中字道思。晉江人。嘉靖丙戌進士。官至河南參政。○遵巖以古文傳。然五言古亦窺顏謝堂廡。無一淺語滯語。

登金山口絕頂

地紀控西界。靈山巨北甸。足弱步屢憇。崖峭石猶踐。枝樛迺能援。葛脆不可挽。當其意象開。豈復慮高蹇。瞻峰皆崩旒。陟澗數迴緬。稍覺天地寬。卽看雲煙變。石竇芝自榮。林罅雪尙泫。興闕無近尋。登高有遠見。周圻蠱五雲。易水通一線。微茫燕趙區。歷歷皆可辨。長嘯發靈籟。倦坐席苔蘚。氛垢苟不嬰。沉慮斯可遣。

遊白鹿洞

素嬰邱壑情。况秉英賢想。寤寐懸宿心。遊盤得茲賞。重陰始晦蒙。杲杲旋開朗。攬勝據巉巖。探奇歷榛莽。境閑百慮空。意愜二儀廣。野色浮巾衣。秋容成物象。菊含露下英。泉作山中響。柔葉稍朝零。剛條非夏長。景物易流徙。今古同俯仰。躊躇悵回軫。何時還獨往。

遊麻姑山

雲出本無心。擇棲多奇巘。繫予慕真勝。涉趣不知遠。初緣碧澗行。幾傍丹崖轉。林追去虎蹤。蹬躡飛猿踐。泉流遞淺深。巖谷變陰顯。歎瀑遇留憇。石牀時仰偃。桂芳洞裏秋。霞映山中晚。探異尋前期。入幽忘後反。神遊力不惰。理愜情俱遣。天路如可梯。欲以微官免。

皇甫冲

冲字子浚。長洲人。嘉靖戊子舉人。與弟濬。濬稱四皇甫。○吳中詩品。自高季迪徐昌穀後。應推皇甫兄弟。以造詣古澹。無一點穠纖之習。時二黃三張空存名目耳。

維摩寺雨坐

回嶺無仄徑。陟岡有夷壤。展睇入空濛。游心益昭朗。長風吹輕衣。飄搖翠微上。古寺迷夕煙。明燈淡綃幌。冥雨從東來。驚雷自西往。林巒忽不見。但聞山澗響。景寂非避喧。心瑩乃成賞。爲禮沉痾蹤。因之知幻象。於巖石上眺東西兩湖

旭踐山中蹊。午憇巖上石。雲移石欲墮。雨霽蹊猶濕。倚策眺兩湖。波光渙相襲。東若旣紆青。西蘅亦凝碧。芙蓉落雙鏡。天影浮重壁。檣烏有離聲。磯鷗無並翼。會茲物化情。感彼高深跡。從適得所遣。何爲苦拘迫。

皇甫汈

汈字子循。長洲人。嘉靖己丑進士。官至雲南按察僉事。○子循古體出入二謝。五言律亦在錢劉之間。與兄子安可云敵手。

秋夜把酒對月

宋玉陳九辯。陸機歌百年。悵茲清秋日。聊使幽懷宣。矯矯歸雲雁。嘒嘒含風蟬。摧芳委朝露。俄景流夕川。鱗運有代謝。薜華無長妍。始知行樂貴。何用居情牽。長夜思秉燭。新月正當筵。金尊泛綠醕。寶瑟絙朱絃。

商歌當棗下。楚舞出花前。餘名焉足藉。達生乃爲賢。

過武城言子祠作

遡風枉輕橈。戴星理扁櫂。超忽之武城。有蕩瞻魯道。古邑一何卑。令猷久彌劭。絃歌謝清響。精華契深造。曰余廁文儒。耽寂遠時好。剖符辭帝京。腰章宰名趙。諒乏操刀資。懼貽製錦誚。經過緬遐矚。神對宣幽抱。言采江上蘋。薦此廟中貌。誰謂千載殊。可以同高調。

奉答子安兄

江郭改故陰。家園藹新霽。柔條始發林。芳草漸紆砌。潘居信爲閒。楊亭况重閉。曰余忝明時。與子承嘉惠。分省各有讐。佐郡慚所莅。暫就北山招。轉愜東田稅。情忘桃李言。跡豈匏瓜繫。感遇興長謠。來章緬幽契。從軍行寄贈楊用修

思文際聖君。稽古萃羣辟。子雲侍承明。胡爲去荒域。被命事犀渠。差勝下蠶室。憤志酬八書。榮名重三策。丁年子卿嗟。皓首仲昇泣。看鳶窮瘴煙。放鷄定何日。業旣違操觚。勳還期裹革。五月行渡瀘。千里望巴國。瀘水向東流。巴雲忽西匿。相思持寸心。願附雙飛翼。用修之才而謫戍邊微有情所共悲也擬之馬遷子卿仲昇伏波幾於歌以當哭

舟中對月書情

不識別家久。但看明月暉。關山一以鑒。驛路遠相違。影落吳雲盡。涼生楚樹微。天邊有烏鵲。思與共南飛。

九日寄子約

漫有登高興。兼當望遠何。對花驚白髮。見雁憶黃河。亂後書來少。霜前木落多。不堪羈宦日。同是阻干戈。

元夕熊子叔抑過集時謫遠州

國論何年定。鄉心此夕搖。雁飛天畔驛。龍隱日南橋。謫宦恩非薄。之夷路詎遙。誰憐梁傅淚。曾灑漢文朝。

寄劉諫議畿

欲將尺素遠相貽。疎懶無如與性宜。北虜塵飛榆塞日。西京灰滿柏梁時。中朝望屬陽司諫。左掖吟憐杜拾遺。定有封章回聖主。莫須焚草避人知。

廣寒宮登眺

寶閣凌霄建。珠窗映日開。月臨疑桂宇。露灑卽銅臺。山悉圖嶠入。池猶象漢迴。倚妝花屢發。窺舞鳥能來。傾國元因色。勞民豈但財。地隨胡運改。棟與美人摧。殷監良非遠。秦宮亦可哀。聖朝留故蹟。皇覽日休哉。

以前朝爲荒宴之戒。得杜老詠九成宮意。

對月答子浚况見懷諸弟之作

南北何如漢二京。迢迢吳越兩鄉情。謝家樓上清秋月。分作關山幾處明。

唐順之

順之字應德。武進人。嘉靖己丑進士。官至僉都御史。天啓中追諡襄文。

登喜峯古城時三衛貢馬散牧關外

絕頂孤峯見廢關。短衣落月試躋攀。三秋豹旅方乘障。萬里龍媒正滿山。候雁似隨鄉思去。寒花將送使臣還。籌邊迂薄真無補。空望伊吾抵掌間。

復官後報京師友人

姓名不復掛朝參。魚鳥由來性所耽。篋裏符經都已廢。山中藥草漸能諳。疎狂自分三宜黜。癩病其如七不堪。深謝故人推轂意。莫將陽羨比終南。

冬至南郊

明王敦大報。秦時禮神君位以南離正。宵從甲子分。月臨太乙館。星動羽林軍。除道疑登岱。鳴籥異度汾。聲容六變合。海岳百靈紛。封檢徵題字。屏帷悉畫雲。神光人共見。天語帝親聞。盛蹟誰能賦。多慙扈從羣。

陳

東字約之。鄆縣人。嘉靖己丑進士。官至河南提學副使。

咸寧山中雪霽晚行

雪霽乍見山。殘陽稍辭嶺。暝色起煙氛。寒光散墟井。田空獵火還。林凍棲鳥警。遙聞野寺鐘。初月生俄頃。都下秋雨夜。飲王子長宅。

闊別時何屢。蹉跎鬢已侵。還朝明主賜。卜夜故人心。涼雨杯初覆。空堂漏欲沉。安知非夢寐。相對帝城陰。

黃省曾省曾字勉之吳縣人嘉靖辛卯舉人

江南曲

旖旎綠楊樓。儂傍秦淮住。朝朝見潮生。暮暮見潮去。有情而必盡言此詩味所以薄也。只此說住見言外有無限情事。

錢

嶸嶸字君望南通州人嘉靖王辰進士歷官參議

憫黎詠

嘉靖戊申崖吏失御。重以積蠹之餘。羣黎遂叛。攻掠城邑。遠近繹騷。撫者無策。漫以牛酒從事。越歲不戢。當路請命。征討予分典戎事。深悼誅夷之慘。用廣咨諏。卒藉天威。誅獲渠首。殲蕩醜類。總五千餘級。諸村悔過。悉歸順焉。庚戌夏四月三日。凱奏底定。追惟致寇有因。覆車當戒。感時述事。潛然有懷。

在昔邃古初。鴻濛闢天地。絕谷嶂南海。深箐鬱蒼翠。中有黎母居。伊人尙蒙昧。鑿井以飲渴。農田亦時藝。荒路躓匪通。幽局或交市。雖爾隔華界。猶紀王正歲。生黎若草木。榮隕隨和厲。熟黎若鳥獸。獫俟無智慮。所以古先聖。馭之以不治。

粵南本炎嶠。矧此瓊崖東。玄冬日且和。幽郊鮮陰風。花柳蔭廣隰。苗黍青芄芄。皇仁漸南極。草木均化工。豈獨茲黎人。物與非吾同。軍行值人日。感歎心沖沖。

朝發城東門。夕駐藤江壘。殺氣干層雲。狼師渡藤水。鷄犬皆震驚。人民盡奔徙。海避愁蛟蛇。山匿畏虎兕。蛇虎猶可虞。狼毒不可邇。軍令甚分明。顛仆何由弭。伶俜泣路衢。迸淚不能已。嗟哉一將功。豈獨萬國毀。海南無猛虎。而有麋與麋。玄崖產珍木。種種稱絕奇。斯物出異域。頗爲中國推。以茲重徵索。奔頓令人疲。窮年務采獵。爲官共饋儀。苦云近歲盡。無以充攜持。直欲訴眞宰。鏹此蘇民脂。物理有固然。怛怛令人思。葉落當歸根。雲沉久必起。黎人多良田。征斂苦倍蓰。誅求盡餘粒。尙象犢與豕。昨當租吏來。宰割充盤几。吏怒反索金。黎民那有此。泣向邏者借。刻箭以爲誓。貸一每輸百。腴削痛入髓。生當剝肌肉。死則長已矣。薄訴吏轉噴。鎖縛不復視。黎兒憤勇決。挺身負戈矢。鎗急千人奔。犯順非得已。赫赫皇章存。今人棄如紙。朔風戒良節。赫赫張皇師。軍門號令嚴。震肅將天威。壯士快鞍馬。鋒鏃如星飛。一舉破賊壘。刀斧紛紆揮。剖尸越邱阜。踏血腥川坻。白日暗西嶺。瘴氣昏餘暉。翅鼠墮我前。飢烏逐人歸。征夫懷慘憂。涕泗霑我衣。黎人本同性。云何發禍機。神武貴勿殺。不在斬獲爲。息火當息薪。弭兵當弭飢。誰生此厲階。哲士知其非。

治之以不治。取遠人之道也。徵求賈物賦斂無藝。兵戎於是興矣。誰生厲階。至今爲梗。末以弭飢爲救亂之本。是真能弭亂者。老成遠慮。可垂炯戒。後之柄國者。尙其敬而聽之。

尹耕耕字子莘。蔚州人。嘉靖壬辰進士。官至河南按察僉事。坐劾戍遼左。○子莘七言律本李空同派。有秋筩曉角之聲。

秋興

薊門千里接雲中。燧火清宵警報同。合陣幾窺青海月。鳴鞭爭下黑山風。冬殘戰士衣仍薄。歲歉孤城廩

欲空南國十年輸。輓盡防秋諸將漫論功。
十萬鳴弦報吉囊。野心狼子是花當。連姻故自輕中國。分道頻看入漢疆。推轂丈人空肉食。操戈遺孽尙
蕭牆。不應干羽修文日。歲歲三關有戰場。
威名萬里馬將軍。白首丹心天下聞。遼水旌旗餘殺氣。泰山松柏已高墳。條侯自靖中州變。竇憲曾銘塞
外勳。獨倚凌煙思將略。暮天征雁下寒雲。
萬山環合蔚州城。紫塞連雲朔氣清。禾黍歲時供上谷。烽煙日夜接神京。九宮迤邐通軍壁。高壘崔巍列
虜營。稍喜摧鋒章節帥。能將俘獲謝蒼生。

上谷歌

大寧無路援開平。極目孤懸獨石城。遙憶先皇親躍馬。長驅絕塞苦提兵。寒流汨汨交樵徑。野戍荒荒列
漢旌。千載土人談往事。伯顏山下有英聲。
飛狐倒馬紫荊連。此去朝廷路一千。向日北門嚴鎖鑰。於今南牧盛風煙。時名受賑當關將。歲德臨分破
陣年。願假精兵渡遼水。莫令疫病久戈鋌。

紫荊關

漢家鎖鑰惟玄塞。隘地旌旗見紫荊。斥堠直通沙磧外。戍樓高並朔雲平。峯巒百轉真無路。草木千盤盡

作兵誰識廟堂柔遠意。戟門煙雨試春耕。

上谷歌上楚中丞

戍樓霜重角聲殘。策馬朝登十八盤。紫氣正當天北極。彩雲時見漢長安。誓將鎖鑰標銅柱。應有麒麟畫鐵冠。况是六龍巡幸地。至今谿谷尙鳴鑾。

春懷

春深關塞尙屯兵。萬里防胡拱漢京。不爲翠華臨遠道。豈應金甲廢深耕。轉輸坐見司徒急。經略親看相國行。莫訝至尊忘北顧。顯陵遷附聖人情。

往歲關山亦喪師。猶能不失漢旌旗。可憐虎帳分符日。偏是沙場棄甲時。白草自長驃騎壘。黃雲空壓李陵碑。書生無計當戎右。一劍眞思報主知。諸詠得少陵諸將遺意。但少開闔變化。所以不逮古人。

皇甫湜

湜字子安。長洲人。嘉靖壬辰進士。官至浙江按察僉事。○子安枕籍選體。故五言自高。然得風格而遺精理。未云詣極也。

送周氏

清晨餞我友。駕言遠徂征。前瞻齊魯墟。千里浮雲興。親交豈不昵。懷役不遑寧。曠野多悲風。揚塵翳邊庭。中衢雪霰集。邊馬寒無聲。蹊谷少行跡。側足橫層冰。回首望京闕。能不惻中情。子其祇自愛。順時保榮名。

秋日雜詩

廓處乏歡。驚出門眺長衢。悲風吹落日。四顧無行車。蹉跎失盛年。感歎獨嗟吁。况我在樊籠。六翮不得舒。撫劍思西邁。安得守故廬。淮陰困閭里。馬生戀邊隅。桑梓豈我志。蓬蒿非我虞。行行舍此去。去去浮雲俱。將命巡軺徒。倚署閣。

彌辰倦紛牘。徂春悵無樂。庶以散予襟。獨此稽山閣。霞蔚見層巒。花深隱羣壑。本自滄海人。悔吝滋糜爵。旋里東江輶。徘徊眷林薄。俄頃惻幽衷。遇物悲離索。且憑浮雲征。聊希至人託。

發郡城之天台道中述所經覽寄友

夕夢層城阿。曉行滄波上。縈溪復含流。連岑時隱嶂。風湍信千轉。雲峯非一狀。錦繡紛迎翫。氤氳忽彌望。蘭泉芬可掬。苔壁險難傍。思偕同懷子。攜手追禽尙。

雜興

鶩節流炎紀。馳暉屆清商。游魚湊重淵。蟋蟀鳴空堂。白露滋前除。陰風來北房。我心亦何思。所思天一方。離居宛如昨。再覩鴻雁翔。含情撫遙夜。申旦獨徬徨。哀彼采葛詩。零淚沾衣裳。

雪山歌奉寄彭太保

雪山嵯峨控西極。寒井陰光混開闕。千秋鳥道無陽春。北風慘淡吹峨岷。羽書宵過褒斜道。火入靈關徹昏曉。愁雲百里填城河。帳中銀燭然盤陀。將軍狐裘細馬馱。彈箏伐鼓金叵羅。指麾羽扇白玉珂。背河一

戰收蓬婆。銘功刻石報天子。麒麟閣上事已多。憶昔中原全盛日。八方無虞醴泉出。龍舉空悲劍鳥藏。海
南漠北俱蕭瑟。君王垂衣念西土。錢塘老子不足數。彭公大梁佇獻捷。已見彤弓出天府。持節心知主恩
重。入關更識王臣苦。文武吉甫非公誰。臨洮健兒勇如虎。驥子朝披玉壘雲。魚文夜濕金隄雨。閩中一月
見節制。烹羊宰牛酌清醑。狼籍衣冠頌破竹。馬前父老稱安堵。園陵佳氣春氤氳。錦官城中日鼓舞。當時
匹馬更朝天。又逐輕車過酒泉。勳名豈數七十戰。至今邊卒高枕眠。歸來謁帝承明殿。世事那知一朝變。
功成下吏古所悲。浮雲蔽日今曾見。天下驚聞柏臺火。匣內空留上方劍。壯士長歌梁父吟。孤臣獨泣瑤
池宴。蓮峯落日照黃河。榆谷飛塵暗蘭縣。武穆祠西秀水流。一望江山淚如霰。功成下吏。今古同悲。改絃
變調。如宮聲之換羽也。

西湖歌寄方思道

西湖窈窕三十里。柳絲含煙拂湖水。青山蕩漾春風來。蘇公隄邊花正開。玉缸春酒映江碧。幾醉江邊柳
花白。城頭日出照高樓。銀箏翠管喧行舟。吳姝如花捲綃幕。山水倒入金屏流。朝來復脫千金駿。還有牀
頭紫綺裘。人生行樂莫顧惜。落日松風吹古邱。我憶京華舊遊地。漁浦東看動愁思。醉裏空歌鏡湖月。夢
中尙識孤山寺。信安使君還舊溪。應對花卮惜解攜。白沙翠竹無人問。湖上孤吟聞馬嘶。

再別兄弟作

可歎江潭客。重爲魏闕游。河梁一悵望。芳草劇含愁。隴樹三年淚。邊雲萬里秋。無由慰棲泊。羈影任悠悠。

蔡

楠字子木。德清人。嘉靖壬辰進士。官至南京兵部侍郎。

晚晴

山晴欲暮天。山色轉蒼然。泉落雲中碓。溪迴樹杪船。斜明沙際日。遠遍綠蕪煙。還見鳧鷖伴。閒飛秋水前。

黎民表

民表字維敬。從化人。嘉靖甲午舉人。官至布政司參議。

紫荊關

徑轉蛇盤險。雲連鳥去長。山桃微著紫。沙柳不成黃。重鎮臨天府。神功劃大荒。金城誰獻議。老作尙書郎。

橫翠樓

高樓當絕塞。春望轉氤氳。百戰全燕地。千重大漠雲。控弦無掠騎。飲羽憶將軍。老去親戎馬。悲笳向夕聞。

同鄴別駕蔡山人登九成臺

芙蓉秀色半陰晴。影入空江百丈深。紫閣倒垂星宿象。碧天吹落鳳鸞音。烽塵正屬談兵日。雲路誰爲出世心。風景故園猶想象。丹梯吾肯倦登臨。

沈

鍊字純甫。會稽人。嘉靖戊戌進士。除清豐知縣。入爲錦衣衛經歷。坐劾嚴嵩。廷杖。謫田保安州。尋爲奸黨所陷。戮於邊。隆慶初。贈光祿寺少卿。諡忠愍。

寄馮敬叔

同作他鄉客。嗟予更滯留。關山明月夜。邊塞白雲秋。漢闕孤臣夢。胡笳萬里愁。桑乾河水近。知是憶并州。

得應職方書詩以答之

郎署飛符日。題書問謫居。自因鄉使到。翻覺舊交疎。塞月塵沙裏。邊風鼓角餘。誰知遷客夢。夜夜繞鸞輿。
應是謫戍後作。

送朱子南還

十年辛苦在京華。夢裏何時不見家。一照若耶溪畔月。始知楊柳隔天涯。

翁大立 大立字儒參。餘姚人。嘉靖戊戌進士。官至南京兵部尙書。

吳謳

舊徵未云已。府帖重徵新。昨朝銀花布。今日金花銀。侵晨趨城府。薄暮徧鄉鄰。一身應重役。奔走無定晨。
父母生我時。胡不百我身。殘軀被箠楚。苦切難具陳。寧爲乞市兒。莫作當官人。
銀花布。金花銀。當日徵稅名目。唯吳地行之。

王問 問字子裕。無錫人。嘉靖戊戌進士。官至廣東按察僉事。及卒。門人私謚文靖。

自山中泛湖歸

登踐窮幽深。下山日已晚。餘照留青蘋。歸雲度蒼巘。對此生遠心。返棹意自緩。川塗風浪平。沿流弄清淺。

贈吳之山

城柝聲聲夜未央。江雲初散水風涼。看君已作無家客。猶是逢人說故鄉。
其聲凄以哀。

徐文通

文通字汝思永康人嘉靖甲辰進士歷官山東按察副使

岱宗

岱頂凌霄十八盤。中原蕭瑟思漫漫。振衣日觀三秋曙。倚劍天門六月寒。風雨黃河通瀚海。星辰紫極近長安。小臣願獻蓬萊頌。闔闔高懸謁帝難。

陳臯謨

臯謨字思贊江陰人嘉靖甲辰進士歷官南京工部郎中

環縣城遠眺

靈武孤城霽色開。感時還上最高臺。山樓風急熊旗動。關塞天連鳥道回。經略久寒西夏膽。安危深仗北門才。殊方獨抱懷鄉思。日暮愁聞畫角哀。

張居正

居正字叔大江陵人嘉靖丁未進士以庶吉士歷官禮部尚書入閣官至太師諡文忠

舟泊漢江望黃鶴樓

楓林霜葉淨江煙。錦石游魚清可憐。賈客帆檣雲裏見。仙人樓閣鏡中懸。九秋杳影橫清漢。一笛梅花落遠天。無限滄洲漁父意。夜深高詠獨鳴舷。

楊繼盛

繼盛字仲芳容城人嘉靖丁未進士官兵部員外郎坐論馬市貶狄道典史事白入為戶部員外調兵部疏劾嚴嵩論死贈太常少卿諡忠愍

送徐子與讞獄江南

寥落白雲司半虛。看君此去更何如。西曹月滿幽人榻。南國星隨使者車。塞雁不堪行斷候。秋風况是葉飛初。秣陵故舊如相問。爲道疎狂病未除。婉而多風。

楊

巍字伯謙海豐人嘉靖丁未進士知武進縣入爲兵科給事中累官吏部尙書進少保太保

早秋登龍門城樓

指點雲州地。眞爲漢北門。八城臨大漠。一路向中原。晴日山川映。秋田禾黍繁。文莊經略處。父老至今言。
蕭關北作

塞路山難斷。胡天雲不開。遙驚戍火起。數見羽書來。周室朔方郡。唐家靈武臺。客心正多感。羌笛暮堪哀。

姚汝循

汝循字叔卿上元人嘉靖丙辰進士官至大名知府

郡齋詠懷

巴江清且駛。日有東歸舟。凜凜歲復暮。而我何淹留。才不瘳民瘼。位固忝邦侯。負擔過所任。踟躕增煩憂。南山有薄田。猶堪具膳羞。棄捐久不理。稂莠將盈疇。至道貴兼濟。豈固爲身謀。十羊方九牧。雅志悵悠悠。安能逐時態。坐取素餐尤。

章崑岡別駕邀登城南樓

樓前新漲迥浮天。把酒登樓思渺然。白鳥於人如有識。青山何處不堪憐。孤舟漁火炊寒渚。蕭寺昏鐘起

暮煙簿領稀疎逢勝景。誰能獨醒向尊前。

魏時亮時亮字敬吾南昌人嘉靖己未進士官至南京刑部尚書

平壤拜箕子墓并訪井田遺跡

禹範留西土。孤臣獨向東。道無浮海歎。義與采薇同。舊井存殷畫。遺黎尙古風。荒邱平壤外。麥秀想遺宮。

柳州碑文盡四十字內安放安帖神完氣足

申時行時行字汝默吳縣人嘉靖壬戌賜進士第累官少師兼吏部尚書贈太師諡文定

題清秋出塞圖

生不識醫無閭。夢不到狼居胥。警然示我出塞圖。令我目眩心神徂。憶昔籌邊贊廟謨。桓桓司馬傑丈夫。帝授節鉞臨玄菟。高憑熊軾佩虎符。榆關九月沙草枯。霜鷹下擊秋原蕪。煙荒雲慘天模糊。惟茲遼左僻。海隅頻年侵擾無。寧都射雕躍馬彎強弧。司馬申令陳師徒。指揮鐵如意。玩弄金僕姑。揚旌督戰親。援枹萬卒超距爭先驅。奔狼突豕皆就俘。凱歌入奏天顏愉。司馬讓功欲若無。但云將士多勤劬。何以勞行役。請蠲幕府租。何以恤飢疲。請發司農儲。人人挾纊齊歡呼。自從司馬歸江湖。遼人茹苦若董荼。荷戈不解甲。挽粟仍飛芻。羽檄徵材官。絡繹在道塗。震鄰之恐非剝膚。騷動根本何爲乎。安得再起司馬登戎樞。坐紆長策銷隱虞。國威震疊邊人蘇。安邊之策全在得人與轉輸二者失而邊事壞矣。篇內具有識力。

大閱詩應制

廟略收羣策。宸遊簡六師。代當全盛日。春是大蒐時。雲捧蒼龍駕。風迴翠鳳旗。轅門開複道。帳殿繞行麾。細柳前軍駐。長楊後騎隨。虬鬚天策將。猿臂羽林兒。拂劍星文動。彎弓月影披。連營分雁翼。布陣合魚麗。禮示三驅正。鋒藏九變奇。張侯仍是豹。賈勇盡如熊。引滿雙鵬落。騰空萬馬馳。元戎歸節制。法從肅威儀。詎數誇胡獵。還欣奏凱期。大風歌漢士。吉日誦周詩。我祖犁庭烈。先皇保泰規。永言思繼述。持以贊雍熙。

歸本於文皇之犁庭。孝宗之保泰。寓規於頌。大臣進言之體。

唐

鉞鉞字君錫。蘭谿人。嘉靖癸卯舉人。官任楚府長史。

江行

客計方歸越。征橈更背吳。風螢臨水亂。江月向人孤。洲已過迷子。山猶及望夫。可憐清夜色。強半在長途。

許邦才

邦才字殿卿。歷下人。嘉靖癸卯舉鄉試第一。官德府長史。

汴河守凍

客館寒燈淚滿襟。間關萬里欲歸心。眼前一水冰霜苦。又說三江瘴癘深。

皇甫濂

濂字子約。長洲人。嘉靖甲辰進士。官興化同知。

悼子乘

溟溟雨露集。熙熙歲始更。靈蠢各有化。人理獨無生。念我泉下子。一絕如朝榮。生男以待終。胡為遘天榮。清塵布虛室。寒晦凝軒屏。宿草旅庭薦。哀鳥為悲鳴。悵恍鯉趨日。禮訓猶用情。流目無存影。涕淚交霑纓。恫憂何能已。歎息每遺聲。堂闈曠基迹。詩書空復盈。奚但腸九迴。心膺成頽崩。愧乏延陵達。無乃傷吾明。

不赴郡檄答子循兄

矯翮思霄翥。游鱗托淵沉。物類各有適。殊塗難並尋。豈伊世網慮。擾擾誰為心。振衣還東山。寢迹棲舊林。江海多風濤。舟楫弭川陰。無令衝波激。但恐歲序侵。願言謝西府。谷口有徽音。

卷八

李攀龍攀龍字子鱗。歷城人。嘉靖甲辰進士。官至河南按察使。歷下詩元美諸家推獎過盛。而受之指擊。謹呼叫喚。幾至身無完膚。皆黨同伐私之見也。分而觀之。古樂府及五言古體。臨摹太過。痕跡宛然。七言律及七言絕句。高華矜貴。脫棄凡庸。去短取長。不存意見。歷下之真面目出矣。○七言律已臻高格。未極變態。七言絕句有神無迹。語近情深。故應跨越餘子。

錄別

顏色無常好。春華一以零。悲風蔽地來。四顧何冥冥。寤言懷往路。攬衣從此興。寒氣拳毛髮。涕泗斷為冰。仰視河漢星。離如水中萍。景光不戀人。遊子豈遑寧。夜依牛羊宿。日驅鷺馬行。努力及明時。安能愛其情。

又錄別

秋風西北來，蕭蕭動百草。蕩子無家室，悠悠在長道。紅顏能幾時，棄捐一何早。對客發素書，零涕復盈抱。上言故鄉好，下言故人老。淺語道得情出。

古意

秋風西北起，吹我遊子裳。浮雲從何來，安知非故鄉。蕭蕭胡馬鳴，翩翩下枯桑。暮色入中原，飛蓬轉戰場。往路不可懷，行役自悲傷。浮雲十字，殊近古人。

和許殿卿春日梁園卽事

梁園高會花開起，直至落花猶未已。春花著酒酒自美，丈夫但飲醉卽休。纔到花前無白頭，紅顏相勸若爲留。春風何處不花開，何處花開不看來。看花何處好空回。三句一韻，末三句纏聯而下，格調甚新。

歲杪放歌

終年著書一字無，中歲學道仍狂夫。勸君高枕且自愛，勸君濁醪且自酤。何人不說宦遊樂，如君棄官復不惡。何處不說有炎涼，如君杜門復不妨。縱然疎拙非時調，便是悠悠亦所長。

黃河

復就三秦役，還爲四牡歌。北風揚片席，大雪渡黃河。才豈諸郎少，名非一郡多。儒官明主意，吾道好蹉跎。

廣陽山道中

出峽還何地。松杉鬱不開。雷聲千嶂落。雨色萬峯來。地勝紆王事。年饑損吏才。難將憂國意。涕泣向蒿萊。

崔駙馬山池燕集得無字

主家池館帝城隅。上客相如漢大夫。十里芙蓉迎劍鳥。一樽風雨對江湖。橋邊取石鯨飛動。臺上吹簫鳳有無。向夕不堪車馬散。朱門空鎖月明珠。玩末句應主亡之後。

初春元美席上贈謝茂秦得關字

鳳城楊柳又堪攀。謝朓西園未擬還。客久高吟生白髮。春來歸夢滿青山。明時抱病風塵下。短褐論交天地間。聞道鹿門妻子在。祇今詞賦且燕關。誦五六語如見茂秦意氣之高。應求之廣。

同元美子相公實分賦懷泰山得鐘字

域內名山首岱宗。側身東望一相從。河流曉挂天門樹。海色秋高日觀峯。金篋何人探漢策。白雲千載護秦封。向來信宿藤蘿外。杖底西風萬壑鐘。第二語弱。○附記趙鶴登岱句云。山壓星辰從下看。海浮天地自東迴。胸中不知吞幾雲。夢也惜通篇不稱。

送皇甫別駕往開州

銜杯昨日夏雲過。愁向燕山送玉珂。吳下詩名諸弟少。天涯宦迹左遷多。人家夜雨黎陽樹。客渡秋風瓠子河。自有呂虔刀可贈。開州別駕豈蹉跎。濟南論七律云。王維李頎頗臻其妙。讀此數篇。知得力有由。

送趙戶部出守淮陽

仙郎起草漢明光。幾載軍儲事朔方。五馬新爲淮海郡。三臺舊署度支章。行車麥秀隨春雨。臥閣花深對夕陽。時憶上林詞賦客。鴻書遙下楚雲長。

送暉員外按察郢中

醉擁驪駒不可留。送君花發鳳凰樓。青春開府西陵色。到日登臺北雁愁。寒雨遠分荆楚望。白雲無盡漢江流。共知人世悲難合。倘得隋珠莫暗投。

送陸從事赴遼陽

御苑東風吹客過。共看芳草有離珂。西山晴雪鴻邊盡。北海春雲馬上多。地險時窺玄菟郡。天驕夜遁白狼河。知君幕下參高畫。諸將何時議止戈。

上朱大司空

河隄使者大司空。兼領中丞節制同。轉餉十年軍國壯。朝宗萬里帝圖雄。春流無恙桃花水。秋色依然瓠子宮。太史但裁溝洫志。丈人何減漢臣風。

懷子相

薊門秋杪送仙槎。此日開尊感歲華。臥病山中生桂樹。懷人江上落梅花。春來鴻雁書千里。夜色樓臺雪萬家。南粵東吳還獨往。應憐薄宦滯天涯。

趙州道中憶殿卿

憶爾澹帷出牧年。風塵誰識使君賢。政成神雀猶堪下。興盡冥鴻遂杳然。樹色遠浮疎雨外。人家忽斷夕陽前。重來此地逢寒食。何處看春不可憐。

平涼

春色蕭條白日斜。平涼西北見天涯。惟餘青草王孫路。不屬朱門帝子家。宛馬如雲開漢苑。秦兵二月走胡沙。欲投萬里封侯筆。愧我談經鬢有華。

杪秋登太華山絕頂

縹緲真探白帝宮。三峯此日爲誰雄。蒼龍半挂秦川雨。石馬長嘶漢苑風。地敞中原秋色盡。天開萬里夕陽空。平生突兀看人意。容爾深知造化功。滄溟詩有虛響有沉著此沉著一路

郡城送友人

西來山色滿城頭。東望漳河入檻流。傲吏歲時頻臥閣。故人風雨一登樓。亂離王粲逢多病。著作虞卿老更愁。君到長安相問訊。誰憐五月有披裘。

張駕部宅梅花

仙郎雪後建章迴。清夜西堂擁上才。笛裏春愁燕塞滿。梁間月色漢宮來。卽看芳樹催顏鬢。莫厭寒花對

酒杯共憶故人江北望。因君賦罷倚徘徊。

送楊給事河南召募

醜虜休南牧。朝廷議北征。幄中新授律。天下大徵兵。使者持符出。君推抗疏名。黃金秋突兀。白羽日縱橫。嶽雪三花秀。河冰萬馬行。將軍邀劇孟。公子得侯嬴。屠販多豪傑。風塵鬱戰爭。有呼皆左袒。無役不先鳴。寧久燕山戍。終期瀚海清。過梁投賦筆。更爲請長纓。

七夕集元美宅送茂秦

祖席陳瓜果。征衣理薜蘿。雲邊看露掌。花裏出星河。仙吏揮金碗。佳人罷錦梭。新知天上少。秀句鄴中多。疎拙時名忌。雄豪虜障過。秋風吹鬢髮。落日渡滹沱。七首荆卿贈。刀頭桂客歌。明年見牛女。能不憶羊何。

塞上曲送元美

白羽如霜出塞寒。胡烽不斷接長安。城頭一片西山月。多少征人馬上看。送元美寄元美諸詩可使樂人歌之。

送子相歸廣陵

廣陵秋色雨中開。繫馬青楓江上臺。落日千帆低不度。驚濤一片雪山來。

寄元美

薊門城上月婆娑。玉笛誰爲出塞歌。君自客中聽不得。秋風吹落小黃河。

漁陽烽火暗西山。一片征鴻海上還。多少胡笳吹不轉。秋風先入薊門關。
於郡城送明卿之江西

青楓颯颯雨淒淒。秋色遙看入楚迷。誰向孤舟憐逐客。白雲相送大江西。

懷明卿

豫章西望彩雲間。九派長江九疊山。高臥不須窺石鏡。秋風憔悴侍臣顏。

贈梁伯龍

太華峯頭玉女壇。別時明月滿長安。不知秋色今多少。君到仙人掌上看。

春日聞明卿之京却寄

十載浮雲傍逐臣。歸來不改漢宮春。摩挲金馬宮門外。誰識當時諫獵人。

輓王中丞

中丞名忬。元美父也。爲分宜嚴氏所害。

司馬臺前列柏高。風雲獨自夾旌旄。屬鏤不是君王意。莫作胥江萬里濤。
幕府高臨碣石開。薊門丹旆重徘徊。沙場入夜多風雨。人見親提鐵騎來。
爲中丞吐氣。而忠厚之意宛然。

和聶儀部明妃曲

天山雪後北風寒。抱得琵琶馬上彈。曲罷不知青海月。徘徊猶作漢宮看。
不著議論。而一切著議論者皆在其下。此詩品也。

觀獵

胡鷹掣鏃北風迴。草盡平原使馬開。臂上角弓如却月。當場意氣射生來。

章美中美中字道華吳縣人嘉靖丁未進士官至憲副

暮相思

征帆日已遠。回波不相待。暝色孤峯來。故鄉何處在。日淡墟裏烟。雲盡天邊海。如何暮相思。坐令鬢容改。

仲春虎邱

孤閣生殘照。平臺下夕陰。疎鐘不知處。人影在花林。古刹雲光杳。空山劍氣深。依依池上月。猶復照登臨。

初秋感懷

秋風吹海水。夜色一何長。思婦樓頭月。征人馬上霜。亭臯雲稍白。隴坂葉初黃。物候堪銷落。應憐杜若芳。

送人

送子薜蘿別。悠悠鸞鶴羣。亂山秋雨歇。孤驛暮濤分。去國見飛鳥。思家生白雲。闔閭城上月。清影爲留君。

秋思

涼風起燕趙。萬里浮雲陰。思婦驚秋葉。寒蛩啼暮林。霜催銀箭色。雁度玉關心。蕭瑟江潭客。芙蓉孤渚深。

王世貞世貞字元美太倉州人嘉靖丁未進士官山東副使以父難解官後補大名兵備歷仕至刑部尚書○弇州天分既高學殖亦富自珊瑚木難以及牛溲馬勃無所不有樂府古體高出

歷下何音數倍七言近體亦規大家而鍛鍊未純故華瞻之餘時露淺率選中嚴加汰存不使胡元瑞諸人得藉口也

天門開

天門旭呀然豁竅混沌金精發森若電燭橫漢十二樓。梟魚貫琉璃蹙階火齊鑿圯光液四射不可仰視。屏翳走約約馳霓旌靄若搖支朱明曜以東起。織阿迫以西垂。白榆歷歷河之湄。天漿灑洄示昭儀。天門開朝紫宮中有使者冠芙蓉。朱衣璧簡縹緗青。類有疑無觸若冥。將上帝命况羣生。顛精稽懇臚所希。惠我來思庇蒸黎。皞皞帝功斂希夷。光采灼爍不

戰城南

戰城南城南壁黑雲壓我城北伏兵搗我東。遊騎抄我西使我不得休息。黃塵合匝日爲青天模糊鉦鼓發亂謹呼胡騎斂。飄迅驅樹若薺草爲枯啼者何父收子妻問夫。戈甲委積血淹頭顱家家招魂入隊隊。自哀諱告主將主將若不知生爲邊陲士野葬復何悲。釜中食午未炊惜其倉皇遂長訣焉得一飽爲野風騷屑魂依之曷不覩主將高牙大纛坐城中。生當封徹侯死當廟食無窮。黃塵合匝三語寫出古戰場功意特變化無迹

欽鴉行

山海經欽鴉圖贊欽鴉及鼓是殺祖江帝乃戮之於崑崙之東

飛來五色鳥自名爲鳳凰。千秋不一見見者國祚昌。響以鐘鼓坐明堂。明堂饒梧竹三日不鳴意何長。晨

不見鳳凰。鳳凰乃在東門之陰。啄腐鼠。啾啾唧唧不得哺。夕不見鳳凰。鳳凰乃在西門之陰。媚蒼鷹。願爾肉攪分遺腥。梧桐長苦寒。竹實長苦饑。衆鳥驚相顧。不知鳳凰是欽鴉。應指分宜言。鈐山讀書時。天下以姚宋目之。故有千秋不一見見者之語。

將軍行

婁豬化爲龍。頭角故不分。貪狼長百獸。那不食其羣。有何短老公。自稱大將軍。從兵三十萬。華蓋若飄雲。尺一丹稜篋。細刺蛟螭文。一署臣某字。直入銅龍門。忽開青天笑。雷公不得聞。碧眼雙胡兒。慣騎大宛駒。與公同臥起。辮髮貂襜褕。朝令謁天子。暮令拜單于。單于開篋看。中有尺一書。織成紫氍毹。恰恰覆窮廬。犀毗黃金造。密嵌珊瑚珠。團龍五色帛。百匹爲一角。單于大歡喜。親爲割肉炙。小婦彈琵琶。大婦奉羊酪。手取一束箭。墨文何錯落。爲語而將軍。物微意不薄。箭鋒但相近。各各相引却。歸還告將軍。將軍大歡喜。今年胡却去。好復開茅土。幕府上功簿。兩胡對金紫。鬼伯何催促。將軍向蒿里。嚴霜一夜零。華堂遍荆杞。翩翩執金吾。緹騎類貔虎。急爲發其私。丞相下御史。支磔將軍骸。分梟十二邊。車裂兩胡兒。剗肉施烏鳶。紅顏夫人婦。懸首映旌旃。白面羽林郎。含咽向重泉。小女配人奴。歌舞侯家筵。田園億千疆。各自稱新阡。生爲衆人恨。死爲衆鬼憐。寄語二心臣。貽臭空萬年。此詩爲仇鸞作。鋪敘豐腴。中帶古勁。最近漢人。又有袁江流一章。紀嚴氏父子事。做焦仲卿妻詩。緣摹倣不錄。故

遙望北邙山

遙望北邙山。塚墓鬱相樛。石獸蹲草間。妖狐誤來求。斧斤焉施伐。原窞各趨疇。積泯漸成無。焉能覩其由。生時藉世贏。跡往神不留。豈若蓬蒿士。一語爲千秋。

過維揚有懷子相

淮南萬木落。兼葭鴻雁秋。迴瞻大江水。極眺黃河流。念此區中士。天翰阻同遊。巖巖麗神京。英俊滿賓幃。豈乏攜手好。抗志乃綢繆。浮沉衆自覩。安測衷所由。奈何各分離。徽音邈以脩。子如宵行燭。分輝均道周。予如汀際鷺。哀鳴望其儔。

過長平作長平行

世間怪事那有此。四十萬人同日死。白骨高於太行雪。血飛迸作汾流紫。銳頭豎子何足云。汝曹自死平原君。烏鴉飽宿鬼車哭。至今此地多愁雲。耕農往往誇遺跡。戰鏃千年土花碧。卽令方朔澆豈散。總有巫咸招不得。君不見新安一夜秦人愁。二十萬鬼聲啾啾。郭開賣趙趙高出。秦璽忽送東諸侯。說出天道好還。使窮兵贖

武者知戒。

贈梁公實謝病歸

汝謀結室羅浮頂。下飲仙人葛洪井。桂樹宛宛山日深。松花濛濛白雲冷。我亦欲買蜻蜓舟。歸與少年爲

薄遊采蓮一曲杳然去。得醉卽臥清溪頭。

送盧生還吳

盧生善詩逸者流。百結鸕鷀安足愁。曠然一笑別我去。春花落盡胡姬樓。欲留不能意彌惻。衆中誰憐好顏色。短裘倘過邯鄲道。青草已沒平原宅。吳趨小娃迎問郎。北遊滿地塵茫茫。采菱深處唱一曲。豈若盧笳能斷腸。

醉孫太初墓

死不必孫與子。生不必父與祖。突作憑陵千古人。依然寂寞一杯土。道場山陰五十秋。那能華表鶴來遊。君看太華蓮花掌。應有笙歌在上頭。離奇突兀。弔太白山人。自應爾爾。

陵祀

松楸何不極。複道見行宮。劍珮千官月。橋陵萬馬風。地迴山盡拱。雲合樹俱雄。白首先朝事。傷心涕淚中。自夾山趣顏神感古

千秋此夾谷。駐馬意徘徊。蒼嶺爭何向。青天線劃開。人疑懸索度。水憶建瓴來。回首兵車地。虛生命世才。陪段侍御登靈巖絕頂

徑折全疑盡。峯迴陡自開。蒼然萬山色。忽擁岱宗來。碧澗傳僧梵。青天落酒杯。雄風別有賦。不羨楚蘭臺。

蒼然二語可匹
空同泰山詩

登太白樓

昔聞李供奉長嘯獨登樓。此地一垂顧。高名百代留。白雲海色曙。明月天門秋。欲覓重來者。潺湲濟水流。
天空海闊。有此眼界。筆力纔許作登太白樓詩。

送顧舍人使金陵還松江

汝豈因鱸膾。吾曾識鳳毛。青雲歸暫得。白雪和誰高。海色鍾山雨。秋聲笠澤濤。南征有諸將。爲語聖躬勞。

送張虞部伯啓左遷常州別駕

把袂翻輕別。沾膺自感時。主恩遷地近。吾道小臣宜。月迥延陵劍。潮平太伯祠。古人崇退讓。今子莫淒其。
厚忠

亂後初入吳舍弟小酌

與爾同茲難。重逢恐未真。一身初屬我。萬事欲輸人。天意寧羣盜。時艱更老親。不堪追往昔。醉語亦傷神。
一身初屬我。與書到汝爲人。各極沉痛。五六正是追往昔也。氣雄味厚。不愧杜陵。

庚戌秋有約吳峻伯不就賦此

漢樹淹胡月。天都拂塞塵。九關虛虎豹。層閣望麒麟。社稷羣公手。兵戈一介身。請纓還請劍。慷慨涕沾巾。

義士李國卿歸骨長山哭以送之

生死銜恩在。問關病骨遙。刀頭空自卜。七首爲誰驕。風色田橫館。寒雲豫讓橋。豈無心一寸。魂斷竟難招。

書庚戌秋事

傳聞胡馬塞回中。候火甘泉極望同。風雨雕戈秋入塞。雲宵玉几晝還宮。書生自抱終軍憤。國士誰譏魏絳功。北望蒼然天一色。漢家高碣倚寒空。三句言宣大兵入援。四句言上自西苑還大內也。

登岱

尙憶秦松帝蹕留。至今風雨未全收。天門倒瀉銀河水。日觀翻懸碧海流。欲轉千盤迷積氣。誰從九點辨齊州。人間處處襄城轍。矯首蒼茫迥自愁。

壁立芙蓉萬古看。削成松檜隱高盤。中峰翠壓徂徠色。絕頂青收礪石寒。梁甫吟成還自和。茂陵書就欲誰干。依微白馬吳閫在。欲向秋風問羽翰。

軒轅皇帝有高臺。鞭石千秋輦道開。匹練天縈吳觀出。金泥日射漢封回。西盤瓠子河如帶。東挂扶桑海一杯。誰爲登壇論王氣。祇應塵世有仙才。

盤山

千盤歷盡更茫然。回首中原暝色邊。峽轉琳宮藏漢月。峯排紫劍插胡天。雲根檜拆龍鱗起。磴道泉歸玉

乳懸深夜不須驚鼓吹。看予箕坐嘯風前。

行部高陽遇河決不浸三板

投馬虛疑捷石成。射蛟或恐海神驚。陸沉玄圃千峯細。天倒黃河萬堞平。漸老中原魚沸鬱。欲歸南極虎縱橫。濁醪誰是高陽侶。遙夜窮愁白髮生。

同省中諸君過徐丈

詞客真同河朔遊。主人偏解孟公留。高城過雨涼生席。殘夜花明月滿樓。紫玉行杯彈出塞。紅牙催拍按梁州。更憐少日閨門侶。菱葉芙蓉湖上舟。

立春前一日過尹汝漁副使飲

東走齊河冰雪開。鬱蔥佳氣近樓臺。相逢臘向尊中盡。敢道春從使者來。落日千門飛鴈去。黃雲一騎按雕迴。知君且住袁絲里。陸博酣歌未易才。

寄家弟振美

江頭風色峭帆新。江雁銜蘆來往頻。握手已非生別地。題詩還是暫時人。天橫北海書難信。日落吳門練未真。俗敝汝曹無可却。時違豺虎卽須親。應是家難後詩。

寄耿中丞子承

黃龍東去海雲低。玄菟城頭烏夜啼。帳下青羌新屬國。軍中白馬舊安西。牙旗月擁諸陵出。甲帳天迴萬堞齊。最是駝酥爭捧處。不妨飛捷醉中題。

送徐子與祀康陵

佳城蔥鬱鎖楸枿。武帝神遊定有無。金榜星辰千嶺逼。翠旗風雨萬靈趨。俱傳駿足留瑤海。亦有龍髯墮鼎湖。此日詞臣空灑淚。獻陵春望已模糊。題祀康陵。結到望獻陵。見遺澤在人。不忍忘也。

戚大將軍入帥禁旅。枉駕草堂賦此贈別

初聞小隊駐吳江。忽漫花溪隱畫艘。細柳尙虛金鎖甲。前茅時緩碧油幢。南中舊部思馳義。塞上新城喜受降。倘寫雲臺須第一。如論國士總無雙。

憶昔

憶昔南巡漢武皇。樓船車馬日相望。輕裘鄴杜張公子。挾瑟邯鄲呂氏倡。秋盡旌旗營細柳。夜深烽火獵長楊。孤臣亦有遺弓淚。不見當時折檻郎。張公子指錢寧一。流呂氏倡謂劉孃。

故關

四塞河山險中通。一線行。雄關蔽全趙。壘障拱神京。尺地分寒暑。中天各晦明。秋英開繡壁。夕照吐金城。屋以浮空置。田疑傍漢耕。雲根穿作竇。石髓借爲粳。樹雜旌旂擁。峯陪劍戟迎。符從襄子計。陣擬率然名。

廣武堪稱客。成安未曉兵。古來興廢事。大半誤儒生。

送妻弟魏生還里

阿姊扶牀泣。諸甥繞膝啼。平安只兩字。莫惜過江題。

從軍行

蹋臂歸來六博場。城中白羽募征羌。相逢試解吳鉤看。已是金河萬里霜。

西宮怨

點點蓮花漏未央。乍寒如水浸羅裳。誰憐金井梧桐露。一夜鴛鴦瓦上霜。

飲歐陽鎮朔卽事有贈

旌旗春偃白龍堆。教客休停鸚鵡杯。歌舞未殘飛騎出。月中生縛左賢來。

廣陵訪周公瑕不遇

豪華自古讓維揚。一水橫江卽異鄉。二十四橋歌吹遍。不知何處覓周郎。

戚將軍贈寶劍歌

毋嫌身價抵千金。一寸純鉤一寸心。欲識命輕恩重處。灞陵風雨夜來深。曾向滄流割怒鯨。酒闌分手贈書生。芙蓉澀盡魚鱗老。總爲人間事漸平。

謝

棗棗字茂秦臨清人自稱四溪山人○四溪五言近體句烹字鍊氣逸調高七子中故推獨步古體局守規格有宗法而無生氣弗取也

榆河曉發

朝暉開衆山遙見居庸關雲出三邊外風生萬馬間征塵何日靜古戍幾人閑忽憶棄繻者空慚旅鬢斑

讀風生萬馬間紙上有聲若衍成二語氣味便薄

大梁冬夜

坐嘯南樓夜孤燈客思長人吹五更笛月照萬家霜歸計身多病生涯鬢易蒼征鴻向何許春意遍湖湘

居庸關

控海幽燕地彎弓豪俠兒秋山牧馬處朔塞用兵時嶺斷雲飛迥關長鳥度遲當朝有魏尙復此駐旌旗

送謝給事封蜀

使星巴蜀外漢節夜郎西樹斷分金馬江清見石犀王孫重茅土天子錫桐圭異世懷張載應留劍閣題

渡黃河

路出大梁城關河開曉晴日翻龍窟動風掃雁沙平倚劍嗟身事張帆快旅情茫茫不知處空外櫂歌聲

翻字掃字得少陵詩眼法

初冬夜同李伯承過碧雲寺

並馬尋名寺。登高藉短筇。飛泉鳴古澗。落月在寒松。石路經千轉。雲巖復幾重。人間多夢寐。誰聽上方鐘。

李行人元樹宅同謝張二內翰話洞庭湖

南望岳陽郡。蒼茫吳楚分。帆迴孤島樹。樓出九江雲。落日波中沒。秋風天外聞。何時采蘋藻。湖上弔湘君。

暮秋簡徐別駕載卿

南征秋轉劇。不寐夜漫漫。白髮艱虞出。滄洲去住難。旌旗連野暗。兵甲照江寒。選將須臾事。誰能議築壇。

元夕道院同公實子與于鱗元美子相五君得家字

長空月正滿。遊騎隘京華。夜火分千樹。春星落萬家。乘閑來紫府。垂老問丹砂。笙鶴歸何處。依稀見彩霞。

春星五字亦警亦秀。自能高壓竊坐。

七夕敬二君餞別得秋字

北斗挂城頭。明河迥不流。人間清露夜。天上白榆秋。聚散多歧路。悲歡自女牛。誰知老來拙。回首故鄉樓。

與朝暉開衆山一種起手。

送樊侍御文敏之金陵

地入維揚路。天分牛斗墟。秋帆二水外。春草六朝餘。冰雪生官舍。風塵走諫書。從來經國者。寧不念樵漁。

送欽水部子辰之沛中

清標憐水部。南去意何窮。樹色分淮甸。河流見禹功。亂帆春草外。古堞暮雲中。感慨登臺處。蕭蕭起大風。

有感

薄伐元中策。論兵自古難。漢唐頻拓地。將帥幾登壇。絕漠兼天盡。交河蕩日寒。不知大宛馬。曾復到長安。

野興

白白霜凝地。飛飛鴈渡河。孤峯依漢迥。老樹得秋多。月曉山精伏。時清野父歌。短筇隨我意。一徑入煙蘿。

秋日懷弟

生涯憐汝自樵蘇。時序驚心尙道途。別後幾年兒女大。望中千里弟兄孤。秋天落木愁多少。夜雨殘燈夢有無。遙想故園揮涕淚。况聞寒鴈下江湖。

夜話李孺長書屋因懷其尊君左納言

忘年爾我重交情。論事相同見老成。月到廣除寒有色。鴉歸疎柳夜無聲。三農最苦江南稅。百戰方休海上兵。歲暮銀臺應感歎。幾人封事爲蒼生。

時江南增稅。海寇方息。山人感事及之。非泛作憂時語。

中秋宴集

滿空華月好登樓。坐倚高寒攬翠裘。江漢光翻千里雪。桂花香動萬山秋。黃龍塞上征夫淚。丹鳳城中少婦愁。詞客共耽今夜酒。漫彈瑤瑟唱伊州。

送謝武選少安犒師固原因還蜀會兄葬

天書早下促星軺。二月關河凍欲銷。白首應憐班定遠。黃金先賜霍嫖姚。秦雲曉渡三川水。蜀道春通萬里橋。一對鄜筒腸欲斷。鵲鴿原上草蕭蕭。將題意逐層安放。一氣轉摺。有神無迹。與高青邱送沈左司詩。三百年中不易多見者也。

送王侍御按河南

塞上初歸復此行。燕南極目送飛旌。天連嵩嶽寒雲盡。馬渡黃河春草生。簪筆常思未央殿。封章時發大梁城。知君最愛應劉賦。更向西園一寄聲。

七夕留別汪伯陽李于鱗王元美得知字

久客言歸意。留連幾故知。鵲橋星度夜。燕館月沉時。天上纔歡合。人間轉別離。晴分絳河影。秋動白榆枝。桂醕還成醉。萍蹤不可期。年年湖海上。今夕定相思。

行路難

荀卿將入楚。范叔未歸秦。花鳥非鄉國。悠悠行路人。平淡語而行。路之難自見。

秋閨曲

目極江天遠。秋霜下白蘋。可憐南去雁。不爲倚樓人。

塞下曲

旌旗蕩野塞雲開。金鼓連天朔雁回。落日半山追黠虜。彎弓直過李陵臺。

漠北詞

石頭敲火炙黃羊。胡女低歌勸酪漿。醉殺羣胡不知夜。鷓兒嶺下月如霜。

擣衣曲

秦關昨夜一書歸。百戰猶隨劉武威。見說平安收涕淚。梧桐樹下擣寒衣。可憐無定河邊骨。猶是春閨夢裏人。幾於哀感頑豔矣。此詩可

以嗣音。

遠別曲

郎君幾載客三秦。好憶儂家漢水濱。門外兩株烏柏樹。叮嚀說向寄書人。寫情極真。方之芙蓉。爛一篇。可云新聲古意。

卷九

張佳胤佳胤字肖甫。銅梁人。嘉靖庚戌進士。官至兵部尚書。加太子太保。贈少保。謚襄敏。○少保詩時露警拔。陳臥子重其莊雅。稱爲李王後勁。

烏蠻灘

烏蠻灘前石齒齒。盤渦轉地驚濤起。險絕空傳灩澦堆。估客帆檣愁欲死。萬里江源異域來。右出夜郎左交趾。青天赤日毒霧合。跼跼飛鳶墮深水。我本西梁道上人。瘴鄉奔逐胡爲爾。停舟一奠伏波祠。丹荔黃

蕉前致詞。英雄心事無今古。神物風雲各有時。銅柱功名倘難就。澤車款段任吾之。

宿黃牛峽

春到黃牛峽。江辭白帝城。楚雲高不落。巴水去無聲。絕塞書難得。孤舟月更明。櫂歌聽自短。幾處夜猿鳴。

赴雁門聞虜退去呈楊中丞

驅車九月度飛狐。萬里霜淒塞草枯。白馬偶來逢使者。黃沙何處走單于。胡雲夜動雙龍匣。漢日秋懸八陣圖。一自雁門留李牧。邊關烽火至今無。

登函關城樓

樓上春雲雉堞齊。秦川芳草自萋萋。黃看雨後河流急。青入窗中華岳低。客久獨憑三尺劍。時清何用一丸泥。登高遠眺鄉心起。關樹重遮萬嶺西。

梁有譽

有譽字公實。順德人。嘉靖庚戌進士。官刑部主事。

姑蘇懷古

看山幾日到吳中。遊客登臨感慨同。金虎跡荒靈氣滅。水犀軍散霸圖空。春歸茂苑烏啼月。花落橫塘蝶怨風。誰識倦遊心獨苦。扁舟長憶五湖東。

燕京感懷

塵塞戈鋌血未乾。龍庭烽火報長安。擬擒頡利先開幕。欲拜嫖姚更築壇。青海月明胡馬動。黃榆風急皂鷗寒。材官羽騎多如雨。夜夜旄頭倚劍看。

吳國倫

國倫字明卿。與國州人。嘉靖庚戌進士官至河南參政。

送徐行父少參赴關內

咸陽天下險。洛邑天下中。潼關睥睨周西東。君自三川歷三輔。分陝經營王命同。登車忼慨千人雄。矯若八翼凌蒼穹。左馮翊。右扶風。漢關秦畿指顧通。爲將匣裏雙龍劍。擲作天邊二華峯。

得元乘書

已道還江縣。猶然滯海門。別來新鬼哭。書至故人存。萬死懸兵力。孤忠藉主恩。豈無排難意。畏路不堪論。
善倫杜意。

高州雜詠

粵南天欲盡。風氣迥難持。一日更裘葛。三家雜漢夷。鬼符書辟瘴。蠻鼓奏登陴。遙夜西歸夢。惟應海月知。
風土詩須此奇警之筆。方寫得生動。

鄱陽湖

欲向匡廬臥白雲。宮亭水色晝氤氳。千山日射魚龍窟。萬里霜寒鴈鷺羣。浪擁帆檣天際下。星蟠吳楚鏡

中分東南歲暮仍鞞鼓。莫遣孤舟逐客聞。

送姜太史節之使楚王

天子分桐葉。詞臣下柏梁。共憐星是使。况乃玉爲堂。江漢環宗國。風雲護帝鄉。居人思過沛。太史復浮湘。地險東南勝。藩盟帶礪長。晴山開絳節。高浪出牙樯。楊柳停旌豔。椒蘭設醴芳。樓臺招鶴馭。環珮憶鷓行。六博中原路。雙鋒北斗旁。緘書如有意。歸雁自衡陽。

寄遠曲

章臺楊柳綠如雲。憶折南枝早贈君。一夜東風人萬里。可憐飛絮已紛紛。

徐中行

中行字子與。長興人。嘉靖庚戌進士。官至江西左布政使。

暮發滁陽

荒城一騎出。落日萬峯西。澗水流人影。松陰散馬蹄。懸崖青欲滴。芳草綠堪迷。洵美非吾土。翻然憶故溪。

盤江驛阻雨寄門人汪維

天連益部長多雨。路出盤江况毒淫。春早蟄龍蒸赤水。夜深山鬼嘯青林。已憐道遠妻孥累。更恐年衰瘴癘侵。吹笛哀生應好在。懷予堪和武溪吟。結用爰寄生事。恰與門人關合。

宗

臣字子相。興化人。嘉靖癸丑進士。官至福建提學副使。

登雲門諸山

山頭月白雲英英。千峯倒插千江明。手把芙蓉步石壁。蒼翠亂射猿鳥驚。誰其雲外吹紫笙。欲來不來空復情。天風吹我佩蕭颯。恍疑身在崑崙行。

雨夜沈二丈至

榻有何人下。君能此夜過。寒蟬吳客賦。衰鳳楚人歌。雨氣千江入。秋聲萬木多。明朝寒浦望。搖落有漁蓑。
長庚純一舜隆既別憶之

一別不主意。茫然空復愁。孤舟仍盜賊。多病已春秋。明月半江水。故人何處樓。風塵雙淚眼。爲我寄滄洲。

張九一九一字助甫。新蔡人。嘉靖癸丑進士。授黃梅知縣。歷官右僉都御史。撫寧夏。

寄見甫弟

歷盡巴山白髮新。西風何處不傷神。馬曹蹭蹬官難達。鳥道崎嶇老更貧。九派長江春後鴈。一年芳草夢中人。相思况是無消息。徒倚天涯涕淚頻。

王世懋世懋字敬美。太倉州人。元美弟。嘉靖已未進士。官至太常寺少卿。

送李太史元甫册封蜀藩

玉檢金泥出大庭。雙旌萬里去冥冥。漢宮朝浥仙人露。益部宵占使者星。巫峽雲中流濯錦。峨眉天半落

空青先驅恥作臨邛客。囊筆重題劍閣銘。

橫塘春泛

吳姬小館碧紗窗。十里飛花點玉缸。蠟屐去尋芳草路。青絲留醉木蘭艫。山連暮靄迷前浦。雲擁春流入遠江。棹裏長干聽一曲。煙波起處白鷗雙。

潘 緯字仲文。歙縣人。

送友人北遊

樽酒慰行軒。交深敢贈言。經過鄭莊驛。好問孟嘗門。一諾休輕許。千金未是恩。年來長送客。此意不曾論。

張邦伊邦伊字孺覺。鄞縣人。以父蔭仕至陝西苑馬寺少卿。

沈嘉則有三楚之遊席上得分字

春城斗酒惜離羣。把袂高歌到夕曛。地入衡陽三楚盡。天迴襄漢九江分。停舟夜聽湘靈瑟。倚閣高攀鄂渚雲。知爾尙平家累淺。逢人勝事好相聞。

戚繼光繼光字元敬。登州人。世襲衛千戶。以參將備倭浙東。破倭於台州。平海衛等處寇。平以都督同知召理戎政。出爲薊鎮總兵。進左都督。加少保。

盤山絕頂

霜角一聲草木哀。雲頭對起石門開。朔風虜酒不成醉。落葉歸鴉無數來。但使玄戈銷殺氣。未妨白髮老

邊才勒名峯上吾誰與。故李將軍舞劍臺。無意爲詩自足生趣若郭定襄直於詩壇中位置之。

歐大任大任字楨伯順德人以歲貢選江都訓導入爲國子博士終南京戶部郎中

泊縱陽眺覽遂憶漢武之遊

行役屆皖城。放舟下縱陽。原隰鬱靡靡。江波浩湯湯。憶在元封中。君王狩朱方。大江深且廣。及茲一葦航。彎弧射蛟臺。皇武何可當。宸遊事既往。六合無回光。不見樓船還。空餘蕙蘭芳。追昔有虞氏。恭己垂衣裳。聖人重無爲。君子貴豫防。覽古動悽惻。延佇增徬徨。

除夕九江官舍

餞歲潯陽館。羈懷強笑歡。燭銷深夜酒。菜簇異鄉盤。淚每思親墮。書頻寄弟看。家人計程遠。應已夢長安。一結憶及家人又於家人意中念己之夢長安曲折往復善學少陵。

九月十五夜月

瑤草三秋色。金風一夕寒。書緣多難絕。月在異鄉看。淒斷驚霜角。遲迴望露盤。刀頭今未定。誰最憶長安。

登宣武門樓

百二山河控上遊。鬱蔥佳氣滿皇州。風驅大漠浮雲出。天轉滹沱落日流。雙闕金莖連北極。萬家紅樹動高秋。茱萸黃菊俱堪佩。獨上城南百尺樓。

張元凱

元凱字左虞吳縣人蘇州衛指揮

楓橋與送者別

楓橋秋水綠無涯。楓葉滿樹紅於花。萬里之行纔十里。闔閭城頭尙堪指。遊子尊前淚濕衣。離心已逐片

帆飛。酒酣忘却身爲客。意欲元同送者歸。

英雄兒女一齊下淚。

陳鶴

鶴字鳴野山陰人世醫百戶。五言如近海潮通郡。連山瘴入樓孤。月常隨棹。寒潮自到門。頗近自然。

夜坐寄朱仲開張甌江

坐久北風起。江聲帶遠沙。客愁初到鬢。鄉夢不離家。林靜無殘葉。燈寒有落花。懷君滯羈旅。雲海各天涯。

臥病雙溪山館見月寄張有功

溪邊桑柘映雙流。病裏蕭條賦四愁。坐雨幾宵方見月。別君一日已成秋。山深倦鵲猶依樹。風定飛雲自上樓。託跡文園須共遣。莫因鄉國歎羈留。

徐渭

渭字文長。山陰人。

懷陳將軍同甫

飛將遠從戎。翩翩氣自雄。椎牛千嶂外。騎象百蠻中。銅柱華封盡。昆池漢鑿空。雁飛真不到。何處寄秋風。

沈明臣

明臣字嘉則鄞縣人。

顧晉卿席上聞其弟益卿憲副南越之捷

廿年豺虎劇縱橫。百粵遙傳一日平。再覩樓船橫海出。更標銅柱伏波名。天青馬嶂春銷甲。雨過龍川夜洗兵。誰道虎頭非將種。請纓從古是書生。

凱歌

銜枚夜度五千兵。密領軍符號令明。狹巷短兵相接處。殺人如草不聞聲。嘉則與徐文長同在胡少保宗酒酣樂作。嘉則於席上賦凱歌十章。吟至狹巷短兵二語。少保起捋其鬚曰。何物沈郎。雄快乃爾。命工刻石置山上。

唐詩無錫人。子言。

橫江曲

家住橫江口。年年傷暮春。落花隨水去。不爲待歸人。

黃姬水姬水字淳父。長洲縣學生。

與友人共飲

青郊歇馬拂吳鉤。萍聚天涯共白頭。久客新豐惟命酒。長謠故國一登樓。林殘半壑飛寒雨。潮落空江急暮流。世路風煙悲去住。莫辭此日醉筵篋。

袁景休景休字孟逸。吳縣人。隱於卜。

送沈嘉則遊中原兼訪戚將軍

中原此去欲如何。把酒聞君感慨歌。道上霜寒逢白雁。馬前木落見黃河。五陵煙雨秋難盡。三輔風雲氣尚多。記得少年曾學劍。壯心猶自憶廉頗。

嵇元夫

元夫字長卿歸安人

刈稻夜歸

西莊刈稻夜半歸。明月皎皎當柴扉。櫓聲隔岸人語近。斗柄插江霜氣微。木葉蕭蕭覆林屋。蘆花茫茫藏釣磯。兒童村南酒家去。野夫獨立風吹衣。

立秋日蘆溝送新鄭少師相公

單車去國路悠悠。綠樹鳴蟬又早秋。燕市傷心供帳薄。鳳城回首暮雲浮。徒聞後騎宣乘傳。不見羣公疏請留。三載布衣門下客。送君垂淚過蘆溝。此江陵與司禮監馮保逐新鄭相公事也。無位之士爲之垂淚。足徵公論在人。

居節

節字士貞。吳縣人。

晚坐

鴉背夕陽盡。柴門暮色初。山寒漸風露。人語半樵漁。落葉聞砧急。蘆花映月疎。年年楚江上。不見雁將書。

孫良器

良器字字實。休寧人。

過姑蘇有感

東吳城外盡烽煙。百姓流移半在船。爲問秋風舊來雁。稻粱今有幾家田。此詩應是僂寇之後經過所作。比海燕初歸不見人其聲又蕭

矣。風

王叔承叔承字承父。吳江人。

風雨泛太湖宿松陵長橋漫興

羣飛鷗鷺去不極。予亦揚帆赴杳冥。灑鬢湖風寒氣白。打船春雨浪花青。水邊萬樹來江縣。雲裏雙峯出洞庭。七十二橋燈火亂。野煙沾酒宿漁汀。

王穉登穉登字百穀。長洲人。國子監生。

塘栖道中

水關雨冥冥。帆飛去不停。人聲兩涯斷。魚市一江腥。雲已辭吳白。山初到越青。侯芭數行淚。千里弔玄經。

聞警

交河十月水潺潺。虜騎秋高過黑山。六郡平時元近塞。一夫誰箇可當關。雲中太守須重起。日逐賢王未肯還。空抱平胡二三策。書生無計謁龍顏。

袁相國故居訪李孝甫太僕

魚文匕首不離身。馬踏長安市裏塵。重過楊家舊亭子。深悲侯氏老門人。朱欄易主花無色。青眼逢君酒可親。同是中郎琴畔客。一般憔悴各沾巾。

汪時元時元字惟一休寧人

九日舟中

秋風葉正飛。江上逢重九。人世幾登高。寂寞黃花酒。只此已足

蔡文範文範字伯華新昌人隆慶戊辰進士歷官廣東布政司參議○隆慶以後詩教漸衰故所收從略

自瀛德至東昌道中雜詩

聞道張秋決。先朝慮獨深。名山標戊己。奉使失辛壬。地控支祈鎖。天寒象罔沉。誰知神禹蹟。疏鑿本無心。

遊南岳

縹緲仙臺紫氣浮。煙籠玉座儼垂旒。地包荆楚標南紀。江合沅湘向北流。牲帛千秋周祀典。衣冠五月舜諸侯。塵緣未斷慚仙骨。金簡雲書何處求。

黃洪憲洪憲字懋忠嘉興人隆慶辛未進士改庶吉士官至少詹事掌翰林院事

山海關

長城古堞俯滄瀛。百二河山擁上京。銀海仙槎來漢使。玉關秋草戍秦兵。星臨尾部雙龍合。月照平沙萬

馬明聞道遼陽飛羽急。書生急欲請長纓。

李三才三才字道夫。臨潼人。萬曆甲戌進士。官至戶部尚書。

送許郎中轉餉薊密諸鎮

重鎮經行遠。清秋離別難。和戎兼漢策。轉餉命秦官。朔雁驚風下。邊雲入夜寒。都亭尊酒罷。落葉滿征鞍。

朱期至期至字子得。蕪水人。萬曆甲戌進士。官懷慶知府。

送蔣太守之瓊州

五羊南去客心孤。銅柱遙分使者符。爲語越裳諸屬國。清時不用貢珊瑚。從張謂戲杜侍御送賈物詩翻出。能摹國體。

馮琦琦字用韞。臨胸人。萬曆丁丑進士。官至吏部侍郎。贈禮部尚書。諡文敏。

題三娘子畫象

紅妝一隊陰山下。亂點醅酥醉朔野。塞外爭傳娘子軍。邊頭不牧烏孫馬。此爲忠順夫人作。

朱國祚國祚字兆隆。秀水人。萬曆癸未賜進士第一。官至南京禮部尚書。入東閣。後加少傅。贈太傅。諡文敏。

經寧庶人廢苑

吳淞何知反。劉安但自尊。魚鹽時不利。雞犬爾焉存。俘已儒臣獲。軍猶鎮國屯。白頭遺老在。尙說獻王孫。

西山謁景皇帝陵

戾園悽斷白楊風。黃瓦今看天壽同。北狩專馳通問使。南還偏賞奪門功。若教守土盟城下。安得蒙塵返域中。多少諫臣司耳目。昌言翻賴校官忠。追復景皇帝諡號。由荆門州訓導高瑤上疏言之。

恭謁慶陵作

講幄頻趨鶴籙深。重來就日慘棠陰。十年始受東朝冊。一月真傾下土心。視權盡收中使節。披沙罷採卯人金。最愁日曆書難既。龍去烏號涕不禁。

徐學聚學聚字敬輿。蘭谿人。萬曆癸未進士。官至右僉都御史。巡撫福建。

夜宿日觀峯禪房

岱宗面面削芙蓉。時有卿雲出漢封。杖屨中天干象緯。風煙下界起蛟龍。河流舊繞滄溟遠。練影斜懸紫翠重。夜半石牀天籟發。夢中錯認景陽鐘。

湯顯祖顯祖字義仍。臨川人。萬曆癸未進士。官南京禮部主事。謫典史。量移知遂昌縣。

送別劉大甫

欲別悲歌雞又鳴。白頭無計與書生。恩讐未盡心難死。獨向田橫島上行。

徐燧燧字惟和。閩縣人。萬曆戊子舉人。惟和近體宗法唐人。在詩道冗雜時。遇之如沙礫中得簡珠也。七言絕尤能作情至語。在李庶子鄭都官之間。

銅雀妓

銅臺遺令在。玉座主恩非。舊曲流哀管。餘香散舞衣。總帷空寂寞。羅綺失光輝。日日西陵望。君王歸不歸。

陳价夫歸自崖州談粵中山水因懷舊遊

朱崖彈缺動經年。醉向黎姬酒肆眠。笑語自存豪士氣。衣裳猶帶島夷煙。波羅老去甘如蜜。萋葉開時小似錢。十載遊蹤俱是夢。不堪重聽舊山川。

送人遊吳楚

津亭煙柳綠垂絲。萬里關山匹馬遲。去國正當秋盡後。登樓多在日斜時。楚江草長悲鸚鵡。吳苑花深走鹿麋。話別何須共惆悵。秋風搖落是歸期。

旅次石頭岸

石頭城下水微茫。回首鄉關驛路長。瓜步煙波連斷靄。秦淮雲樹隔斜陽。秋高落木見村舍。夜靜寒潮到女牆。客裏愁心已如此。一聞南雁更淒涼。

金陵故宮

先朝遺殿閉塵埃。零落空勞過客哀。五夜銅壺乾罷滴。六宮金鎖澀難開。翠華逝後全無跡。羅綺焚餘自有灰。弓劍盡埋煙雨冷。椒房一半上莓苔。閱五六知當時初無遜國之事。蓋帝與后同在灰燼中也。史氏致身錄之誣。神廟時人俱能言之。得錢牧齋諸人之辨益明。

送李太守擢憲滇南

昆明池水靜無波。擁傳新從熨道過。開府定能寬漢法。采詩自可入蠻歌。趁墟滇客龍名市。納款蠻王象渡河。他日勒功留片碣。點蒼如黛石嵯峨。

訪梅禹金秦淮客舍

舟過長干問客星。風流不用歎飄零。一秋桃葉居淮水。時同小姬十月梅花夢敬亭。遊遍南朝故宮地。翻殘西竺淨名經。贈君欲折藏鴉柳。滿目長堤何處青。

武夷溪口送惟起弟

青山遊侶散紛紛。況復臨歧遠送君。兩地鴈鴻難顧影。一時鸞鶴總離羣。人從杜若洲邊去。路在桃花洞口分。明發登高各惆悵。鵝溪斜日幔亭雲。

丹陽遇陳十八

丹陽渡口遇同鄉。欲語忽忽怨夕陽。君返江南我江北。雲山千疊斷人腸。

長門怨

芳草何時輦路通。長門花鳥自春風。祇緣薄命難承寵。豈是相如賦未工。

郵亭殘花

征途微雨動春寒。片片飛花馬上殘。試問亭前來往客。幾人花在故園看。絕句七章。詞不必麗。意不必深。而婉轉關生。覺一種至情餘於

意言
之外。

酒店逢李大

偶向新豐市裏過。故人尊酒共悲歌。十年別淚知多少。不道相逢淚更多。

芋江驛樓送張四之白下

春風吹柳萬條斜。極目金陵隔暮霞。不必相思當後夜。片帆開處卽天涯。

禦兒舟中別朗公

月下談深睡已遲。滿身涼露夜何其。雞聲未斷鐘聲起。又是江頭欲別時。

寄弟

春風送客翻愁客。客路逢春不當春。寄語鶯聲休便老。天涯猶有未歸人。

陶望齡

望齡字周望。會稽人。萬曆己丑。賜進士第三。官至國子祭酒。卒。諡文簡。

沛縣過高帝廟

路經舊沛山川古。龍起中原戰鬪多。一代雄圖開赤帝。千秋遺廟傍黃河。雲歸尙識真人氣。風起猶傳猛士歌。魂魄來遊長此地。漢宮秋色近如何。

高攀龍

攀龍字雲從。無錫人。萬曆己丑。進士。歷官至左都御史。坐忤逆。闈削籍。被逮。赴水死。贈太子少保。兵部尙書。諡忠憲。○忠憲詩無心學陶。天趣自會。羽翼名教。人不以擊壤一派爲高。益

信定山甘泉非
風雅之宗也

水居

薄暮登樓四望遠疇時雨既降農人乍休乳燕來止儵魚出游萬族有樂吾心何憂

中有元化
偶然得之

夏日閑居

長夏此靜坐終日無一言問君何所爲無事心自閑細雨漁舟歸兒童喧樹間北風忽南來落日在遠山顧此有好懷酌酒遂陶然池中鷗飛去兩兩復來還

湖上閑居季思子往適至

正爾山水間念我煙霞友春風吹微波日暮倚楊柳我友惠然至童僕喜奔走相別歎幾時相逢慮非久所歡得晤言欲言仍無有默默各自怡一室閒相偶夜深不能寐明月在東牖

夜步

幽人夜未眠月出每孤往繁林亂螢照村屋人語響宿鳥時一鳴草徑露微上欣然意有會誰與共心賞

弢光靜坐

偶來山中坐兀兀浹旬餘淡然心無事宛若生民初流泉當几席衆山立庭除高樹依巖秀修篁夾路疎所至得心賞終日忻忻如流光易蹉跎此日良不虛寄言繕性者速駕深山居

傅新德新德字元明定襄人萬曆己丑進士官至國子祭酒贈禮部右侍郎諡文恪

送郭青字參藩巴蜀

殊方幾載歎離羣。忽漫相逢又送君。萬里江湖龍劍合。一尊風雨薊門分。峨岷迥出天連雪。棧閣平臨馬度雲。蜀相威名應不負。他時消息好相聞。

區大相大相字用孺廣南高明人萬曆己丑進士官翰林檢討歷贊善中允

家人初至京置酒亭中對雪作

庭霰今朝集。家筵此日開。不知燕地雪。猶訝故園梅。玉袖承花出。珠簾卷絮迴。瑤華雖可贈。留賞上春來。
中允海南人海南無雪故領聯特妙。頸聯亦秀艷香霧雲盤同一筆墨。

送何儀部稚孝謫桂林

長沙非不遠。南去更蕭森。謫宦楚山盡。獨行湘水深。鄉書同雁少。官舍共猿吟。今夕懷人夢。隨君到桂林。

南行感懷

聞道貂璫輩。由來為掃除。先朝煩鎮守。重任典方輿。貢采山川竭。徵輸井邑虛。明明皇祖訓。宮府意何如。
時曠稅之使紛紜四出至寺人職掃除者列坐督撫之上小民窮瘁幾於賦若華歌萋楚矣詩中念祖訓正以慨時事之非也。

入羅滂水

井邑新安集。閭閻雜漢。火耕春伐木。山獵夜歸樵。潮響蠻溪合。林光瘴峒消。直須勤撫字。勿使困征徭。

鄭明選

明選字子升。侯官人。萬曆己丑進士。官南京刑科給事中。

感懷

黃虞世已遠。大道漸陵遲。十室八九空。奸邪乃猖披。法令日以繁。盜賊日以滋。宣尼相魯國。道路不拾遺。君子正其本。禮義將自治。莫以鞭與轡。能使疲馬馳。莫以刑與戮。能使風俗移。長吏苟有闕。三尺將安施。

恭聞册立皇太子喜而賦詩

少海初流潤。前星已麗空。九重原獨斷。四皓本無功。鶴馭丹霄上。龍樓紫禁東。君王有金鑑。早晚賜春宮。
神廟爲鄭妃。故屢欲建立。福王迫於公議而止。作者歸本九重獨斷立言之體。故應溫厚也。

十五夜寫懷

明月孤懸夜。空齋獨坐人。地平連海岳。天闊散星辰。祿米悲親沒。柴門憶弟貧。吾生無限事。况感百年身。

歸子慕

子慕字季思。崑山人。萬曆辛卯舉人。崇禎時。追贈翰林待詔。○待詔詩雅淡清真。簞瓢童冠。無非樂趣。生平與高忠憲公敦道義交。詩品亦略相似。所云同心之言也。

對客

默然對客坐。竟坐無一語。亦欲通殷勤。尋思了無取。好言不關情。諒非君所與。坦懷兩相忘。何害我與汝。

城北初夏

三見草木榮。栖栖猶未旋。偶與城市遠。因耽此地偏。獨館背清池。一無俗事牽。晨興課書罷。日午蛙聲喧。出門見新秧。微綠映遠田。久晴初得雨。稚子亦欣然。田父說歲占。今茲定有年。物情既如此。予樂復何言。
淡然無意。太
癸玄酒之遺。

雜詩

日出羣動作。智計千萬端。用此徒爲勞。不用殊未安。所繇在有身。坐令思慮殫。所以古賢達。與物同一觀。俯仰放懷抱。宇宙何其寬。

館城北

妻孥昔居城。我淹江上廬。妻孥來江上。我去城北居。城北何所事。二生喜從余。既愛童子真。且得人事疎。長夏北窗竹。風吹几案書。坐看牆外帆。樹中去徐徐。中情苟無繫。觸物皆有餘。今茲對佳節。正值秋風初。香稻感我情。歸食空江魚。小女解思父。一見當何如。

壬寅正月西村築室成

經始逼歲除。春肇室云考。結構稱心爲。彌拙亦彌好。村樹旣羅列。溪流亦瀠抱。北牖移修篁。南圃藝藥草。室中圖與書。閒暇可探討。農人理耰鋤。念此歲供早。願我長負疴。不耕慚亦飽。

移居

冉冉歲云暮。寒風動林於。言辭東村宅。去適西村廬。豈無舊巢戀。歡與吾仲俱。西村况不遠。相去一里餘。回瞻竹樹間。炊煙出前廚。吾病四十衰。厭厭日不如。憂患易反本。戚戚念友于。安得我叔氏。亦復來此居。遙望城中山。引領空嗟吁。

丙寅六月過吳子往荻秋菴

蕭瑟湖上廬。六月如清秋。涼雨過柴門。綠楊風颭颭。水濱一稗子。洋洋何所求。終日無一魚。持竿釣不休。問之向我笑。使我心忘憂。諸詠有物我同得之趣。覺月到天心。風來水面終是有心作理語。

歸江上

去年冬盡歸。室家尚完好。兒女曝檐隈。牆頭日杲杲。今年冬盡歸。離憂不可道。中饋闕無人。虛堂塵不掃。一兒依外家。兩女傍兄嫂。奚獨天運乖。謀生亦草草。人世骨肉緣。尙爾不可保。而况一切營。何足櫻懷抱。久矣吾行迷。回車苦不早。

歲暮別諸生

惻惻不可道。臨歧但依依。常恐語言多。貌勝中情微。感茲寒色厲。北風吹爾衣。歲暮家室情。各各念爾歸。羣居雖云樂。人情諒難違。所患不同心。不患相見稀。尼父重久要。如醴久已非。勗哉儀先民。雅道庶可幾。人人胸臆中語。便是至情。視華子潛詩。只學得陶公形象。所謂得其皮骨者也。

卷十

謝肇淛

肇淛字在杭長樂人萬曆壬辰進士官至廣西左布政使

秋日邀龍君御同鍾伯敬林茂之賦詩君御時將赴滄中

營道植高操。大音謝俗機。誰云京洛塵。而能緇素衣。前蹤旣云邈。後會安可希。斗酒自斟酌。蟹螯秋正肥。南陸有殘暑。西山無留暉。不知松際月。已挂花間扉。雜坐忘磬折。緒談聞芬菲。君今赴河滄。戎馬生郊畿。白面誰見賞。青雲願多違。舊歡意未泯。新離淚仍揮。余亦倦遊者。因之歌式微。

送徐興公還家

楓落空江生凍煙。西風羸馬不勝鞭。冰消浙水知家近。春到閩山在客先。斜日雁邊看故國。孤帆雪裏過殘年。憐予久負寒鷗約。魂夢從君碧海天。

春怨

長信多春草。愁中次第生。君王行不到。漸與玉階平。

秋怨

明月憐團扇。西風怯綺羅。低垂雲母帳。不忍見銀河。

袁宏道宏道字無學公安人萬曆壬辰進士官吏部郎中○公安兄弟意矯王李之弊而入於俳諧又一變而之竟陵詩道遂不復振人但知竟陵之衰而不知公安一派先之也

感事

湘山晴色遠微微。盡日江邊取醉歸。不見兩關傳露布。尚聞三殿未垂衣。邊防自古無中下。朝論於今有是非。日暮平沙秋草亂。一雙白鳥避人飛。

曹學佺學佺字能始侯官人萬曆乙未進士歷官參議廣西天啓中以閹禍除名為民崇禎初起復廣西疏辭不赴家居二十餘年殉節死

夜泊彭山江口

錦城平日暖。旅泊始知寒。犍蜀中分地。岷峨相向看。岡連三女冢。水疾二郎灘。蘆葦風吹急。蕭蕭漢將壇。

岑彭遇害此地。有彭亡之稱。

泰昌皇帝輓歌

龍馭升遐日。封章滿御牀。施行猶令旨。德意自先皇。沛若江湖決。俄然石火光。更聞哀詔到。能不淚沾裳。
龍馭升遐謂神宗更聞哀詔謂光宗

勸進箋三上。騰歡遍九垓。逐臣皆召用。中使盡收回。貨賤昭先儉。心勞集相才。大工須計日。久矣柏梁災。罷稅不停徵。邊庭歲用增。金錢溢輸輓。士馬飽飛騰。北闕聞天語。東隅望日升。那堪遽辭世。倉卒治山陵。九轉神丹祕。三旬帝業終。春秋書法謹。中外揣摩窮。兩泣將填巷。攀髯或墮弓。由來戮方士。豈但為無功。

過木瀆

指點十三橋。迎船半柳條。夕陽潮正滿。春草岸俱遙。琢研開山市。爲園灌藥苗。賣錫時節近。處處有吹簫。
琢研種花風土。自昔寫來。光景如畫。

送陳民部出守思州

言辭粉暑重。淒淒道路時。聞征馬嘶。日照夢懸鄉樹外。夜郎吟向郡樓西。竹雞羣裏登峨嶺。銅鼓聲中出朗溪。我欲白門攀柳送。相思此夜有烏啼。

八月朔日王元直招集南樓送陳汝翔之東粵王玉生之清漳沈從先還姑蘇徐興公之建溪陳維尋之聊城蔣之才之廣陵予返白下

西風蕭瑟動離顏。一樹衰楊不剩攀。秋老幾人猶白社。月明無主自青山。征途南北高樓外。客淚縱橫杯酒間。此別紛紛難聚首。天涯那許夢魂閒。

蔡毅中

毅中字弘甫。光山人。萬曆辛丑進士。官至禮部右侍郎。

秋興

木落江空天氣清。西風蕭颯雁南征。浮雲暗逐年華變。歧路虛憐短髻生。千里關河懸客夢。萬家砧杵動秋聲。崇蘭芳芷依然在。何處江潭弔屈平。

公

龜鼎字孝與。蒙陰人。萬曆辛丑進士。官至禮部右侍郎。諡文介。

詠古

古人獲我心。善達窮通理。安危慮所居。屈伸貴自己。已貴可復賤。中立常不倚。衰至易生驕。腊毒恆在美。薛公僅遺榮。疏傅庶知止。寥廓晞冥鴻。增繳安可擬。

穆陵關

昔日齊侯履。南疆盡此封。諸山沂作鎮。五岳岱爲宗。霸國猶餘業。重關識舊蹤。故園相去近。回首海雲重。
諸將

上谷漁陽拱帝京。相連河外受降城。一從塞馬來南牧。遂使王師罷北征。絕徼尙傳青海箭。中原新動綠林兵。主憂正值宵衣日。誰向天山答太平。

李流芳

流芳字長蘅。嘉定人。萬曆丙午舉人。嘉定四君中以禮園爲上。雖漸染習氣。而風骨自高。不能掩其真性靈也。

過臯亭龍居灣宿永慶禪院同一濂澄心恆可諸上人步月

歸裝出西湖。問道向黃鶴。屢愆桐塢期。偶遂龍居諾。輕舟凌晨風。遙山滿晴郭。丹林尙可數。寒條紛無託。披松指微徑。聽水捫暗壑。新構爭遠勢。平臺攬搖落。霜餘山容淺。天清海氣薄。暫歇塵勞心。始知寂滅樂。每多方外遊。見僧卽如故。燈明一龕下。夜長愜深晤。不知山月上。千林已流素。出門尋舊溪。愛踏松影路。

氣和空宇澄。寒魄如春露。幽泉洗我心。微鐘杳然度。讀第二章。如見東坡承天寺夜遊光景。

白門七夕時將入燕

舊日維舟處。懸情獨柳條。秋風又京國。客思正江潮。長路有時到。歡期難再邀。徘徊望牛女。愁絕向中宵。

黃河夜泊

明月黃河夜。寒沙似戰場。奔流聒地響。平野到天荒。吳會書難達。燕臺路正長。男兒久爲客。不辨是他鄉。

唐時升

時升字叔道嘉定人

南翔里有八老人爲社長者年九十四少者年八十一居止不一二里耄耋相望杯酒談笑日相娛樂誠太平盛事詩以紀之

白鶴村頭春日曉。香霧濛濛百花好。蒼顏素髮八老人。花前置酒相傾倒。笑說鄰翁學語時。追談邑子知名早。不知主客更勸酬。爭引曾玄互提抱。今年孟春甲子晴。占云麻麥俱豐成。坐中祭酒九十四。敬酌社公旨且清。其間迭起拜更祝。但願脚健雙眸明。桂林從事八十一。只聞喚弟無呼兄。南村翳翳桑榆日。出共持杯歸散帙。但課兒孫種黍苗。何知方士餐芝朮。香山居士有遺篇。九十不衰真地仙。公等康健逢聖世。能無旦暮歌皇天。願炊香飯秣釀酒。日奉杖履長周旋。武皇遺事多訛謬。欲問鑾輿南幸年。

薛侍御出按貴州便道歸雲南省親

繡衣持節出長安。南入牂牁路萬盤。重箐濕雲常欲雨。點蒼晴雪不知寒。登車自掃豺狼跡。問寢應彈獬豸冠。遙憶樹頭新酒熟。雲南人釀酒於樹。刺桐花下正承歡。

程嘉燧

嘉燧字孟陽歙縣人寓居嘉定。○孟陽詩亦娟秀少塵。自錢牧齋嘗李何王李諸人推孟陽為一代宗主。幾與高季迪李賓之前後相埒矣。而陽羨邵子湘有心矯枉。摘其累句云。爭倚畫樓衝妓席。獨橫朱袖占歌筵。亦知終去婚和嫁。且戀閒來弟勸兄。近逐歌喉須闌席。閒開笑

鬢待歌船閒。偃串迹圓留面。戲劇鞞痕曲印肩。年去貧來不自由。暗傷顏面向交遊。等句。謂其穢褻俚俗。幾於身無完膚矣。予錄其氣清格整去風雅未遠者四章。見孟陽自有真詩。勿因牧齋之過許而毛舉其疵以掩之也。

值唐叔達同錢將軍北上言別

方舟然燭夜相過。道上匆匆奈別何。我已三年懷錦里。君偏五月渡黃河。南遊誰共煙花早。北上兼聞金鼓多。此別各懷無限意。莫將春淚點江波。

送李中翰還朝

漢家宮闕枕燕關。使者乘槎八月還。吳地潦平猶似海。廣陵濤壯正如山。同舟夜醉神仙侶。染翰春隨供奉班。聞道滄溟今未息。幾回溝壑動愁顏。

閩門訪舊作

悵望吳閩百里餘。故園兄弟日應疎。多年華鬢絲相似。三月春愁水不如。歌扇舊分桃葉渡。釣船還傍藕花居。掃眉才子何由見。一訊橋邊女校書。

登樓

少小聽歌怕唱愁。一聲楚尾與吳頭。如今身在傷心地。但見春光莫上樓。

楊

漣漣字文孺。應山人。萬曆丁未進士。熹宗朝官至副都御史。劾魏闡二十四大罪。被逮死。鎮撫司獄。贈太子少保。左都御史。諡忠烈。

題柏子園青芸閣

官閣凌空汶水深。金飆初動客登臨。浮雲易改三山色。落葉先驚萬里心。江上美人遺雜佩。城南少婦拭

清砧。繁臺兔苑今禾黍。日暮憑欄思不禁。

王象春

象春字季木。濟南新城人。萬曆庚戌進士。官至吏部郎中。

書項王廟壁

三章既沛秦川雨。入關又縱阿房炬。漢王真龍項王虎。玉玦三提王不語。鼎上杯羹棄翁姥。項王真龍漢

王鼠。垓下美人泣楚歌。定陶美人泣楚舞。真龍亦鼠虎亦鼠。奇闢可儷。謝臯羽篇。

賀萬祚

萬祚字孝延。嘉興人。萬曆庚戌進士。官至江西右布政使。

周侍御行部

蘭臺使者舊知名。攬轡從容江海情。抗疏共看任伯雨。行軍還擬趙營平。五花驄馬巡周道。三輔黃圖歷漢京。不獨艱危憂水旱。前籌更欲請長纓。

高道素

道素字玄期嘉興人萬曆己未進士官工部郎中以督造桂府殿傾論死

秋日寄沈無回

涼風起庭際。簾幙迥秋陰。一葉空階落。孤燈獨坐深。芙蓉思遠道。蟋蟀動愁吟。誰念閒居客。能傷遲暮心。

陳鳴鶴

鳴鶴字汝翔閩人諸生

伍相祠

黃池宴罷羽書催。骨葬鴟夷檣可材。西子已辭吳苑去。東門忍見越兵來。春風故國靡蕪長。落日荒祠杜

宇哀。千載忠魂何處問。滿城兒女弄潮回。

周永年

永年字安期吳江縣學生

弔淮陰侯

一市人皆笑。三軍衆盡驚。始知真國士。元不論羣情。楚漢關輕重。英雄出戰爭。何能避蒯越。垂釣足平生。

王人鑑

人鑑字德操吳縣人

冬夜閑居

忽忽寒光早。閑居水上村。病疎當世事。貧負故人恩。黃葉深樵徑。荒煙淡華門。憑誰論出處。短褐信乾坤。

吳稼竳

稼竳字翁晉孝豐人以例除南光祿典簿

金陵酒肆贈茅平仲

暮年看爾壯心孤。落落酣歌擊唾壺。但數一錢憐姹女。纔誇千騎笑羅敷。梨花雨濕紅襟燕。楊柳春藏白項烏。欲向盧家借雙槳。莫愁不是舊時湖。

宋登春登春字應元新河人

秋日野望

聽鳥中林性。看雲故國心。地卑湘漢闊。天遠洞庭深。老馬空知道。窮猿豈擇林。十年書劍客。寂寞到如今。

孫友篋友篋字伯諧歙縣人

過古墓

野水空山拜墓堂。松風濕翠灑衣裳。行人欲問前朝事。翁仲無言對夕陽。

俞安期安期字羨長吳江人

憶家

故國千山外。經秋遠別離。浮生能幾日。爲客此多時。衰眼高堂淚。寒砧少婦悲。天涯念游子。風雨共淒其。

望海

紛紛靈異變昏朝。陰火隨波遠自飄。龍藏函經連水府。蜃樓開市借雲霄。星臨東極無分野。山入南荒有

沃焦日日潮來長應候似應西答百川朝

登祝融峯

中天積氣入清涼雲霧翻看地混茫雨挾蒼龍奔下嶺星懸朱鳥定南方何年石匱藏金簡自古山祇禮赤璋壇上長流青玉乳神池高捧帝臺漿

何

白字无咎永嘉人

淮上歸興

淮泗秋風動地來月明如水雁聲哀南經伍員吹簫市北眺曹公較弩臺歸路漸香菰米飯佳期已負菊酒杯愁聞烽火連東北極目浮雲黯未開

鄭

琰字翰卿閩縣人○翰卿工七言律如霜色欲將關樹折河聲如帶戍樓奔曠上陰雲連塞黑關中落日帶沙黃劍戟已消兵後火闕體猶泣戰時瘡皆忼慨有燕趙聲

哭李大將軍

十萬旌旗染血丹招魂夜夜哭桑乾殘兵來拾中郎印野鳥飛登大將壇金獸鎖門嚴鼓角石麟窺塚葬衣冠至今俺答騎胡馬猶是將軍舊戰鞍

盛鳴世

鳴世字太古鳳陽人國子監生

題岳陽酒家壁

巴陵壓酒洞庭春。楚女當壚勸客頻。莫上高樓望湖水。煙波二月已愁人。

沈

木字喬嘉
興縣學生

夜起

暑夜不成寐。起步中庭中。殘月忽墮水。明河猶在空。籬根滴清露。樹杪生微風。坐愛新涼好。先秋有候蟲。

殘月忽墮水二語是夜起雞聲
茅店月二語是曉行各入神妙

王

屋字孝峙
嘉善人

子夜歌

千金買良玉。百金求良工。爲儂作雙環。相連無始終。
妾身妾自惜。君心君自知。莫將後日情。不如初見時。

吳夢陽

夢陽字允
兆歸安人

送胡孟弢邑博之沅江

攜手情無極。茫茫此別何。一官猶俎豆。滿地已干戈。畏路身難定。騷人怨自多。可堪寥落思。木葉洞庭波。

范

納字東生
烏程人

琴川夜泊懷孫齊之

野宿次鳧鷖。青青荻筍齊。潮痕隨月落。山勢壓城低。殘夢風前杳。歸心曙後雞。還知高隱處。只隔水東西。
春日訊吳允兆

遠樹微波黯不分。闔閭城畔寄孤雲。春來儘有還鄉夢。除卻青山便是君。

吳兆 兆字非熊。休寧人。

同曹學佺過宿碧峯寺愚公房

入寺昏煙斂。雙橋竹澗通。僧歸殘磬裏。客夢亂山中。燈暗窗沾雨。枝喧鳥墮風。他鄉寥落夜。語笑喜能同。
戊子春宿寒山空谷菴中。始知客夢亂山中句之妙。

徐慤 慤字興公。閩縣人。

送俞本之遊楚

寒臯木落水連天。雲際孤城望漢川。隔岸數聲湘女瑟。中流千里鄂君船。鷓鴣夜叫黃陵月。猿狖秋啼赤壁煙。挾得離騷經一卷。行吟長對楚江邊。

送康元龍之靈武

賀蘭山下戰塵收。君去征途正值秋。落日故關秦上郡。斷煙殘壘漢靈州。胡兒射獵經河北。壯士吹笳怨隴頭。城窟莫教頻飲馬。水聲嗚咽動鄉愁。

黃河官路黑山程。羌笛橫吹漢月明。漠北烽煙三里霧。隴西鼙鼓十年兵。燕鴻度塞寒無影。胡馬行沙暗有聲。後夜思君勞遠夢。朔風吹過白登城。

文震孟 震孟字文起長洲人天啓壬戌賜進士第一授翰林修撰忤逆聞

擬古遠行

江之陽兮有嶼。江之陰兮有渚。朝而風兮夕而雨。望夫君兮渺何許。春波兮悠悠。日暮兮夷猶。擊青桂兮爲楫。攀木蘭兮爲舟。况含思兮凝睇。乘清風兮遠遊。遠遊兮上下。載行兮載舍。遵中流兮待君。將寄心於遠者。

徐石麒 石麒字寶摩嘉興人天啓壬戌進士除工部主事崇禎初起補南禮部歷吏部尙書乙酉城陷自經可經堂

望匡廬

突兀此何處。匡君廬。巨天黛。浮五老壁。青入九江船。慧遠林中寺。康王谷口泉。苻生今已老。誰與買山錢。

倪元璐 元璐字玉汝上虞人天啓壬戌進士改庶吉士官至禮部尙書翰林學士京師陷自縊初諡文正定諡文貞

皇極門頌曆作

鳳闕開彤旭。猊爐散紫煙。六階齊度緯。七政轉璣璿。甲曆龍躔改。寅賓象魏懸。明時功在革。資始義承乾。黑帝威初試。青皇位早傳。周官新月令。甘氏舊星篇。人繼羲和後。書成堯茨前。庚先三日戒。貞下一元旋。

圖籙符垂赤。干支德應玄。興王惟有歲。太史又編年。賜出黃星曜。披看綠字鮮。因知天曆數。如日起虞淵。

蔣

燦燦字韜仲。長洲人。崇禎戊辰會魁。官至天津兵備副使。

題杜少陵像

誰貌杜陵老。憂懷筆底傳。凋殘悲瘦馬。慷慨拜啼鵑。作客依江閣。浮家寄楚船。高才同濩落。千古有青蓮。大雅長往矣。遺容後代看。萬間思廣廈。一諫失微官。抗志隆中對。饑驅蜀道難。蕭騷兩鬢白。應爲憶長安。

徐

汧汧字九一。長洲人。崇禎戊辰進士。官至少詹事。家居殉節死。

三月十九日

珍饌精鏐賜講筵。每逢令節主恩偏。十章書未陳金鑑。九逝魂猶戀細旃。社稷風雲誰奏曲。園林霜露已經年。龍髯回睇橋山遠。玉匣珠襦不忍傳。

萬壽祺

壽祺字年少。徐州人。崇禎庚午舉人。

入沛宮

泗亭春盡樹婆娑。漢帝宸遊不再過。魂魄有時還至沛。樓臺落日半臨河。風吹大澤龍蛇近。天入平沙雁鶩多。我亦遠隨黃綺去。東山重唱采芝歌。

贈胡彥遠

河渚經營把釣綸。乾坤草莽一閑身。南陽高臥眞名士。東漢餘生舊黨人。十載荃蘅同入夢。三冬冰雪獨傷神。荷鋤歸去田廬閉。莫向人間學問津。

馬世奇世奇字君常無錫人崇禎辛未進士改庶吉士官至翰林院侍講京師陷自縊初諡文忠定諡文肅

贈曹元宰守漳州

靈槎秋泛海天涼。五夜心懸燕寢香。總爲至尊憂社稷。漢臣何必薄淮陽。溫柔敦厚

楊廷麟廷麟字伯祥清江人崇禎辛未進士官終編修死節贛州

別葉侍御

渾水橋邊寺北田。行騰東去雨連緜。桑村古渡沙移路。茅屋人家鳥就煙。江左衣冠悲楚澤。淮西烽火接秦川。更聞羣盜郊原遍。欲下潯陽萬里船。茅屋句寫盡荒涼不減江燕初歸不見人句

張溥溥字天如太倉州人崇禎辛未進士改庶吉士

孟門行

雙絲繫玉環。宛轉生光澤。本以結同心。何知反棄擲。君家美酒琥珀光。紅顏少年空滿堂。酒酣意氣不可當。君家玉堂盛孟門。孟門深谷無朝昏。中有美人嘯且歌。仁義結客客自多。相與醉君金叵羅。黃雀銜環報舊主。畏君彈射遠飛去。夜深孤棲城北樹。夜深孤棲餘情不盡忠愛之心故應如是

姜

採採字如農萊陽人崇禎辛未進士官禮科給事中以言事廷杖削籍戍宣城

赴戍宣州衛

垂死承恩譴天威咫尺間荷戈荒徼去收骨瘴江還衰職猶思補龍髯竟絕攀橋陵千滴淚獨在敬亭山

淚痕血點垂胸臆○荒徼瘴江未合宣州

顧咸正

咸正字端木崑山人崇禎癸酉舉人除延安推官殉節死

登華山

倚杖高臺萬里秋山川元氣共沉浮金神法象三千界玉女明妝十二樓井鉞參旗皆北拱濁河清渭自東流愁看殺氣關中滿獨立南峰最上頭

陳宗之

宗之字玉立長洲人崇禎癸酉舉人

漢道

漢道昔云季四海沸羣雄賢士失綱維奔竄投西東管寧棲遼海田疇隱無終鄭玄與王粲各自獲所從如何盛明世栖栖泥淖中雨雪積荒塗渚田路不通寧無北門歎要自秉固窮疾耕寡樂郊仕宦乏奇功乾坤雖浩廣何地置吾躬愴惻衡門下憂來溯悲風

謝

遴字彙先宜興人崇禎癸酉舉人

巴女詞

巴川積水極岷峨。巴女明妝豔綺羅。爲語秋江風浪急。斷腸休唱木蘭歌。

吳本泰本泰字美子仁和人崇禎甲戌進士官南京禮部郎中

帝京篇崇禎元年作

夢想黃京臺。來歌白石粲。明明聖人出。旭日天方旦。廣殿飭梓材。神霄聳輪奐。微垣妖彗消。芝蓋卿雲縵。三吳罷機杼。九廟秉珪瓚。下國頌時雍。至尊理宵旰。宵旰懷殷憂。籌邊寢弛玩。軍需飛檄催。水衡仰屋歎。大奸已距脫。羣疑未冰泮。漸鴻雖可儀。羔羊不聞讚。名盛實則衰。事倍功乃半。因之勅幾康。匪伊游泮渙。君旣勤晝接。臣當思日贊。朝中去朋黨。政府參謀斷。網必挈其綱。繩先理其亂。求治毋太速。防微勿滋蔓。所期日月光。幽遐理必貫。思陵初政。寔有可觀。狐疑瑣屑。仍任奄人。而臣工泄泄。朋黨連結。此後日事也。詩中思患豫防。具有灼見。

萬泰泰字履安鄧縣人

留別董西來

客塗相見卽相親。總是淒涼夢裏人。且喜何郎能似舅。不妨綺季未稱臣。睢陽城上三生淚。無定河邊後死身。惆悵天涯分手處。秋高一雁落江津。

閻爾梅爾梅字用卿江南沛縣人崇禎丙子舉人

明詩別裁 二卷十

重過兗州

亭長臺西舊酒徒。疎狂名姓滿江湖。每從世外尋高蹈。不識人間有畏途。季札重來周樂散。奚斯一去魯宮蕪。高樓極目誰同醉。正月愁聽有蟋蟀。

劉永錫永錫字欽爾。魏縣人。崇禎丙子舉人。官長洲儒學教諭。革命後隱於陽城湖之濱。窮餓死。

行路難

雲漫漫兮白日寒。天荆地棘行路難。四字抵過千萬言。

陳子龍子龍字人中。更字臥子。青浦人。崇禎丁丑進士。官兵科給事中。殉節死。○詩教之衰。至於鍾目。將蝸蟻齊鳴。不復之候也。黃門力闢榛蕪。上追先哲。厥功甚偉。而責備無已者。謂仍不離七子面目。必有鈞韶之響耶。

曜靈

曜靈。天子遇早而憂。省獄減刑。雨以時降。詩人美之也。

曜靈維陽。杲杲麗天。爰自東作。火見於昏。天之薦瘥。繇隆如焚。皇曰予冀。方邦畿所安。廢我來牟。兆民孔艱。一章。旱之始盛。維塵冥冥。早既太甚。百卉具零。豈降自天。胡德非馨。曾是有象。恭曾是有讒。隱曾是有詭。隨曾是有培克。二章。爰命宗伯。大雩孔明。爰命徹侯。于郊于宗。以爾幣玉。及爾斯牲。方社既周。山川用享。叶。振古率育。胡邁予不寧。三章。巍巍薊邱。維君宅之。翼翼皇心。維天釋之。禮莫不展。來饗來格。膳宰既徹。鏞鼓

既釋凡百君子。曷爾無斃。四章。皇曰。司寇維刑。世重世輕。朕聖姦宄。或愆于平。悍陽驕驕。憂我黎氓。乃清岸獄。乃釋累囚。肆赦時夏。或歌且謳。倬彼燕山。出雲油油。終朝彌野。既舒既柔。既霑既優。田峻語語。樂哉士女。以育我稷黍。皇王布惠。天錫純嘏。

仲夏直左掖門送夏彝仲南歸

金塘迴素波。中有雙鴛鴦。托身在清禁。和鳴君子旁。顧此同林鳥。孤翼忽南翔。生平志忱慊。何事獨難忘。本爲四海人。豈得常相將。丈夫重知己。萬里同一鄉。黽勉效貞亮。德輝在巖廊。莫憂青蠅多。和璧貴善藏。執手不能語。悵矣結中腸。

雜詩

山椒微風發。薄暮遲佳人。頽陽淡林表。素月生河津。佇立懷往路。時宴多苦辛。君家青雲樓。瑤華艷當春。皐蘭亦有芳。欲寄良無因。歡愛豈足重。要使恩誼申。浮雲誠易阻。白璧終見珍。至道無相非。末流乖心跡。高懷苟不亮。執誼日以積。賢隨貴同用。愚與賤交役。騰名自有階。投讒豈無隙。營營棘上蠅。可以攜金石。履純思寡尤。超方鮮奇策。毀譽苟未忘。顧影慙跼蹐。墓門有惡木。鳴鴉巢其巔。同茲雨露潤。不與百卉妍。性質固自殊。大造安能遷。我行適見之。中心懷憂悵。利斧雖在手。斬伐無此權。去去保芳潔。願言藝蘅荃。手無斧柯。奈龜山何。

平陵東

炎精中燼妖彗紅。平陵松柏生秋風。四十萬人頌符命。巨君却在層城宮。東郡太守建旗鼓。排山動地連關輔。五威國將紛東馳。大誥金滕亦何補。汚宮薦棘雖無成。天下始知稱漢兵。不逢時會豈失策。猶與宛洛開先聲。斗柄橫斜漸臺蹙。白水真人坐黃屋。逢萌束帛卓茂封。義公碧血無人哭。男兒何必上雲臺。千古徒悲兩黃鵠。義公之稱兵更難於勝廣之開漢祖而光武之封不及何也不以成敗論人具有卓識

小車行

小車斑斑黃塵晚。夫爲推婦爲挽。出門何所之。青青者榆療吾飢。願得樂土共哺糜。風吹黃蒿望見牆。宇中有主人當飼汝。叩門無人室無釜。躑躅空巷淚如雨。寫流人情事恐鄭監門亦不能繪

寄獻石齋先生

烈風蕭條吹百羽。朱鳳葳蕤適南土。羅爵如雲不見天。秦人高歌楚人舞。出門不向妻子辭。八尺銀鐙五色組。虎鬚較尉紅錦裘。峨舸大扁下江州。蛟龍鬢鬢黃沙臥。日月冥冥青楓秋。赭衣墨幘安魚服。予亦相逢淮水曲。京華時事不足論。慘淡相看日彌促。鎌刀誰留門外蘭。庖廚肯恕山中鹿。可憐舉世學浮沉。燭龍迴照杳難尋。蒼茫不解時人意。愛護還憑明主心。我有短札置懷袖。安能一矢千黃金。平生風義兼師友。陳蔡相從但鼓琴。此石齋被逮黃門遇之淮南而作

闔闔門開翡翠城。鳳凰十二相和鳴。碧血一灑玉階裂。驚雷急電何時平。門生往往自引匿。故吏不復相
通名。賈彪奔走何側足。曹鸞上書翻桎梏。鈎黨幾入甘陵部。相將同入黃門獄。緋衣獄吏行生風。黃封小
匣排當中。更番榜掠不知數。但稱汝罪如山崇。小臣萬死不足惜。聖德如天輝典冊。帶血晨興寫孝經。裹
瘡夜臥編周易。爰書一旦下高天。薄譴由來湘水邊。萬里聞聲頌明聖。漢廷有待賈生還。此述石齋自詔
獄得戍酉陽而

作帶血晨興寫孝經
二語自是當時實事

交河

烏啼征馬動。曙色散淖沱。海氣通三島。天風靜九河。沙平邊草斷。日澹塞雲多。百里無煙火。空林枉自過。

廬居

行遯山河改。歸來松菊荒。尙餘三畝宅。無復萬家旁。祈死煩宗祝。偷生愧國殤。但依親隴在。含笑此高岡。

襄陽

江漢西陲重。荆襄南紀雄。諸侯悲峴首。耆舊失隆中。燧色通秦塞。妖星下楚宮。不知大隄女。何處舞春風。

雜感

大河南北望。萬里入春愁。車馬空官渡。風煙滿豫州。黃巾連戶著。白骨少人收。自古中原地。應煩聖主憂。
兵戈傳劍外。消息每差池。已失夔門險。誰言蜀棧危。雪山寒鼓角。玉壘暗旌旗。天子頻西顧。元臣實總師。

此楊嗣昌總師時也。變門失而蜀不可守矣。喪師辱國。伊誰之咎哉。

送張玉笥中丞擢河道少司空隨召陞見

舊聞開府靜牙璋。詔領河隄入未央。周室保釐分邠鄆。漢家底績念宣房。九天星宿開秦塞。萬里梯航走冀方。爲語至尊南顧日。不堪重問海陵倉。典切。

酬李司馬萍槎先生

久瞻樞府重明光。投我連城雲錦章。傷亂已聞劉太尉。賞音深愧蔡中郎。九龍移帳春無草。萬馬窺邊夜有霜。早晚滄江驚驛使。詔書先問右賢王。

錢唐東望有感

清溪東望大江迴。立馬層崖極望哀。曉日四明霞氣重。春潮三折浪雲開。禹陵風雨思王會。越國山川出霸才。依舊謝公攜屐處。紅泉碧樹待人來。

送吳巒穉司李桂林

翡翠巢邊匹馬過。千盤桂嶺鬱嵯峨。南浮灘水啼猿滿。北望君山落雁多。蠻府官閒能作賦。漢廷恩近憶鳴珂。愁心獨繫張平子。欲寄瑯玕奈遠何。

重遊弇園

放艇春寒島嶼深。穿山花木正蕭森。左徒舊宅猶蘭圃。中散荒園尚竹林。十二敦槃誰狎主。三千賓客半知音。風流搖落無人繼。獨立蒼茫異代心。今拿園一帶廢爲民居矣。讀此不勝時代之感。

卷十一

梁朝鐘朝鐘字未央。順德人。崇禎已卯舉人。殉節死。

將出皖留別楊六符沈乃功唐聖俞徐譽星

船傍垂楊別緒生。煙含春樹鴈歸聲。羣公縞帶遺吳錦。幕府青絲唱渭城。幾樹烏啼趨夏口。何時馬首望西京。江南江北如相憶。千里高樓待月明。

方以智以智字密之。桐城人。崇禎庚辰進士。授翰林檢討。革命後爲僧。名弘智。

看月

一片鍾山月。那從嶺外看。昔嘗臨北闕。今獨照南冠。萬里天難問。三更影易寒。夢中兒女路。莫憶舊長安。

黃周星周星字九煙。上元人。崇禎庚辰進士。晚變名黃人。字略似。自沉於水。

秋日與杜子過高座寺登雨花臺

被髮何時下大荒。河山舉目共淒涼。客來古寺談秋雨。天爲幽人駐夕陽。去國屈原終婞直。無家李白只

伴狂百年多少憑高淚。每到西風灑幾行。

陳

瑚字言夏。太倉州人。崇禎壬午舉人。

贈吳興公

我非陳孟公。君乃吳季子。千金重一諾。結交有終始。仗劍作遠遊。欲爲報讐死。惜哉時不遇。長歎歸故里。其事雖不成。其名滿人耳。

李映碧廷尉遺地圖

圖畫山川感慨多。邊陲風景近如何。入關無復蕭丞相。聚米空思馬伏波。兩戒一江橫似線。九州五嶽小於螺。錯疑留守魂歸夜。風雨聲聲喚渡河。讀至末語。紙上有聲。恐流連光景者不能作。亦不解讀。

山中喜遇徐昭法共飲

一夜寒香萬樹開。相逢花下且銜杯。窮途兄弟難成醉。故國風煙易入哀。雪滿山中蘇武窖。雲橫江上謝翱臺。寸心不盡斜陽晚。濕遍青衫首重回。

徐

枋字昭法。吳縣人。崇禎壬午舉人。考文靖公殉節後。隱於上沙。

別詩

上山采薇蕨。日暮不盈把。苦飢不足悲。將遺同心者。良友遠別離。踟躕送於野。我有盈觴酒。黃流傾玉甌。

申以遠遊曲。中懷期共寫。清商一何悲。四座和者寡。恐傷遊子心。攬涕不敢下。景光已西馳。日月不我假。
譚貞良貞良字元孩嘉興人崇禎癸未進士

樓桑先主廟

系出中山近。名從小沛聞。卜鄰占李定。望氣得周羣。象叶黃龍瑞。符仍赤帝文。全家頻脫險。一旅忽能軍。
名士收諸葛。英雄獨使君。志寧摧百戰。力已限三分。淚盡髀生肉。魂歸棧入雲。枯桑遺廟折。野火斷碑焚。
繫馬寒風急。題詩塞日曛。枌榆存舊社。絃管尙紛紛。

題河梁泣別圖

都尉臺前起朔風。節旄空盡路西東。不知別淚誰先落。同在河梁夕照中。

黃淳耀淳耀初名金耀字蘊生嘉定人崇禎癸未進士乙酉城破自縊

野人

野人歎息王師勞。秦賊楚賊如蝟毛。攻城掠野官吏死。大江以北民嗷嗷。昨聞死賊刦財賦。分與官軍作
賄賂。亂斫民頭挂高樹。黎明視賊賊已去。時章疏皆稱賊爲死賊
野人歎息年歲惡。池中掘井井底涸。飛蝗引子來蔽天。枉自傾家事田作。朝廷加派時時有。哭訴官司但
搖手。歸逢吏胥狹路邊。軟裘快馬行索錢。

野人歎息朝無人。朝中朋黨如魚鱗。十官召對九官默。匍伏苟且容一身。廟堂何人理陰陽。頻年日食四海荒。吾欲上書問朝士。却恐人訶妄男子。朝野大勢如是。雖欲不亡其可得乎。

吳

易字日生。吳江人。崇禎癸未進士。殉節死。

威寧伯王襄敏公越

威寧熊罷姿。高視氣敵萬。脫略繩墨外。勇智走飛電。大廷吐奇言。排闥怒風旋。威聲動異域。瓌特震所見。目屬膺帝心。短袂故上殿。帝曰快御史。爲朕將而弁。所部皆鷹騰。公也身搏戰。擣虛握勝策。入穴虎乃困。一炬紅鹽池。冰天千帳爛。烽消玉關煙。雪卷陰山片。轅門正高會。琵琶奏哀艷。戰士挾秦姝。頓使死力賤。豁達籠豪英。出沒神鬼眩。丈夫重勳名。志豈在鐵券。絕塞懸孤臣。中援何足玷。慘淡黃金印。零落白羽扇。風塵暗不開。北顧撫長劍。爲威寧一洗其辱。○懷賢諸詠原本少陵八哀而已之抱負自出三章擇其尤有骨幹者。

定襄侯郭忠武公登

郭公武定孫。神駒渥洼好。十齡走健筆。歛吸振奇藻。洞徹春秋義。兵法腹笥了。安危異人出。所以奠皇造。英宗北狩初。決機一何早。黃塵擁翠蓋。痛憤居庸道。紫微爲盪搖。柱極西欲倒。我公奮孤撐。乃心協少保。國也今有君。揮血視清昊。巖巖雲中城。虎豹鬱相抱。崩騰萬馬陣。擊衆每用少。猿臂捷有神。鐵甲盡穿縞。楊石雄軍聲。鎖鑰資電掃。撇烈天網翻。槎枒地龍繞。豈多三軍力。遂爭造化巧。詩看橫槊賦。檄倚馬上草。

排宕非常姿。灑氣秋空島。高詠戰場篇。寂寞風流紹。

少保戚公繼光

大將東南誰。戚公眞鷹揚。雄情恣捭闔。秘策揮陰陽。夙奉綦履訓。更見經術詳。結友傾賢豪。文采殊頡頏。曉達三門流。以律師所臧。龍鳥追武侯。衡軸通軒皇。變化開精心。什伍爲鴛鴦。少保所結陣名島夷蹂南土。兵氣慘不張。閉營百日練。戰士虎力強。疾掃溟波平。受鉞總蘄方。計伸犁庭威。十萬環偏廂。遠猷振華夏。定策爲周防。亭障雜星羅。旌旄蔽日光。呼韓遂稽首。邛支亦來王。款關四十年。戎馬不敢颺。伐暴貴上兵。功豈必戰場。竟無通侯賞。坐使壯士傷。時平武略絀。世亂智勇長。問彼登壇者。曷以恢我疆。

黃翼聖翼聖字子羽太倉州人崇禎中辟召官安吉知州

渝城度歲

風俗他鄉異。巫歌達四鄰。江明無月夜。猿喚不眠人。眷屬生兼死。年光臘帶春。客中艱一醉。辜負物華新。

周立勳立勳字勒貞華亭縣學生

詠懷

東登泰山巔。纍纍見城郭。秋風吹平原。牛羊下寒澤。呂尚本陰謀。漁釣竟所托。神明啓遠疆。後世資經略。遭逢良有時。志士固窮約。飄蓬西南征。浮雲散林薄。悲哉大國風。田橫不可作。

傷春

平池曲巷古祠東。幾樹桃花落晚風。明日殷勤樽酒後。春光已過別離中。
白燕墳前載酒過。幾人同唱柳枝歌。莫愁一夜花如雪。搖落春心自此多。

夏完淳

完淳字存古。華亭人。考功郎允彝之子。殉節死。存古十五從軍。十七授命。生爲才子。死爲鬼雄。汪錡不足多也。詩格亦高。古罕匹。

秋懷

涼風何瑟瑟。吹我遊子顏。歷歷江上林。流蟬鳴其間。浮雲西南征。一去何時還。駕舟凌洪波。杖策窮崇山。君子不遑息。小人豫以閑。感激在溝壑。敢念徒旅艱。中夜起百憂。勞人獨長歎。秋色從西來。風物自淒緊。金飈辭炎暉。玉露戒商軫。鷓鴣薄暮鳴。幽蘭望秋隕。零落在一時。榮華若朝菌。高從巢父棲。下與壺公飲。靜觀百歲間。無名以爲準。

精衛

北風蕩天地。有鳥鳴空林。志長羽翼短。銜石隨浮沉。崇山日以高。滄海日以深。媿非補天匹。延頸振哀音。辛苦徒自力。慷慨誰爲心。滔滔東逝波。勞勞成古今。此淵明詠荆軻作也。

秋夜感懷

登樓迷北望。沙草沒寒汀。月涌長江白。雲連大海青。征鴻非故國。橫笛起新亭。無限悲歌意。茫茫帝子靈。

鄺露字湛若南海縣學生城陷爲兵所害○湛若詩原本楚騷五言尤勝

洞庭酒樓

落日洞庭霞，霞邊賣酒家。
晚虹橋外市，秋水月中槎。
江白魚吹浪，灘黃雁踏沙。
相將楚漁父，招手入蘆花。

五言佳處全在氣韻不求工於語言對偶之間得此意可與讀湛若詩

洞庭

人歸洞庭水，心遠百蠻天。
虹飲吳山雨，蟬嘶楚岫煙。
挂帆明月樹，沽酒白雲船。
來雁紛南向，衡陽何處邊。

西湖上春

行逢新歲月，驕馬踏城橋。
旭日催蘅帶，春人艷柳條。
香車流水擊，仙袂逐風飄。
小鳳銜花去，空傷雲漢遙。

虞山謁舜祠

荒服垂衣日，三苗格命年。
鳥耘千畝籍，龍御九疑煙。
蒲阪征雲外，蒼梧落照邊。
何人撫瑤瑟，離恨隔湘川。

采石

牛渚青天月，長縣供奉祠。
如何今夕酒，不共昔人持。
高詠誰能似，扁舟從所之。
溯洄殊未已，言折楚江蘼。

浮湘禮三閭墓田尋賈生故宅

浮湘孤月下，靈渠牢落殘。
魂伴索居，庚子日斜聞野鳥。
端陽沙渥見江魚，天高未敢重相問。
年少何勞更

上書。此去樊城望京國。定從王粲賦歸歟。

莫愁湖贈劉瞻甫

顛顛行吟落照時。莫愁湖上與君期。五噫一賦梅花國。三黜重逢柳士師。吳苑舊游淹越鳥。楚裳今雨裊江離。姑蘇煙月長相待。萎絕芙蓉白露滋。

劉城字伯宗。貴池人。

羣盜

羣盜尙如此。江城未可依。健兒身手劣。祈父爪牙非。貽鼠能中飽。飛鴻恆苦飢。從來比管樂。詎肯泣牛衣。

沈壽民壽民字眉生。宣城縣學生。舉賢良方正。門人私謚貞文。

訪姜如農城北

石公嚴譴後。又見荷戈新。曠代留遺直。殘山待老臣。龍歸天上馭。環賜夢中身。生死昭亭畔。鄉園別自春。

嘉靖中石御史金以諫止醮詞謫戍宣州。

邢昉字孟真。高淳縣學生。

九江城南樓晚眺

泱泱九江口。日入煙濤深。登樓俯危檻。近見廬山岑。昔人此讌賞。嘉月陶幽襟。長使千載下。緬想南樓心。

孤城何蕭條。殺氣餘秋陰。交衢無人行。荒榛遂如林。撫事遽成往。含悽方在今。履運適如此。髮端苦沉沉。溪行屢經與亡友胡印度別處

濺濺溪水側。是子門前路。涓流亂石間。褰裳乃可渡。憶昔造子廬。款款平生故。尊醪亦時有。日晏未遑去。相送屋東偏。幽林每徐步。欵岸注微波。殘陽在高樹。情因老易悲。欲別恆返顧。茲來溪草綠。偶到臨分處。子猶耿夙懽。子已長不寤。流泣但徘徊。空慚子桑扈。

故宮燕

君不見故宮燕。春雨秋風幾回換。宮中風雨長蓬蒿。飛入宮牆繞虛殿。穿簾度閣羽差池。盡日呢喃人未知。柳下乍銜千點絮。花間仍拂萬年枝。玉階寂寞罌罌冷。畫棟回翔春燕影。歲歲營巢竟不成。春來秋去誰曾省。可憐此度秋風早。整頓毛衣猶自好。徘徊欲別未央宮。萬戶千門忽如掃。鐘簾何年去洛陽。仙人辭漢淚成行。最苦西飛雙燕子。重來不見舊宮牆。

施

武武字魯孫長洲人

相見坡

上坡面在山。下坡山在面。相見令人愁。何如不相見。

烏鴉關

朝上烏鴉關。暮下烏鴉關。老烏啼啞啞。行人還未還。寫盡境地險惡。

葉襄襄字聖野。長洲縣學生。

感舊

洛蜀紛爭日。君王宵旰時。內朝私鬪急。河北捷書遲。近輔連羣盜。臨郊誓六師。傷心殷浩輩。一蹶竟難支。
思陵時。朝局及天下大勢已盡。四十字中如讀少陵洛下天中諸作。

喜康小范孝廉至兼弔楊機部閣學

萬里清江浪拍天。故人消息動經年。重來麋鹿長洲苑。歸去荒蕪彭澤田。虎帳角殘辭部曲。龍沙旗折偃戈船。盧謔淪落劉琨死。回首章門一惘然。

陸圻圻字麗京。錢塘貢生。

與歌者陳郎

落日橫江老白蘋。同鄉停問一相親。未嫌李尉翻新曲。且喜何戡是舊人。玉管謾吹秋月白。紅牙曾對綺筵新。坐中恐有傷心客。莫按伊涼水調頻。

沈欽圻欽圻字得輿。長洲縣學生。周準填諱。○先大父詩。中歲愛劉隨州。晚境愛陸放翁。五言如山橫去鳥。外人立晚霞。邊學易應觀我言。詩或起予。七言如冷岸孤舟。搖月白。荒村一犬吠燈紅。皆陸太僕起頑所稱賞者。茲錄感時傷事五章。異於流連光景之作。有關風教。不在語言之工也。孫男德潛敬識。

書事

天地兵戈滿江湖。逋竄頻。布衣難許國。淚眼不逢春。玉闕悲龍馭。雄關喪虎臣。唐家靈武業。望斷素衣人。
此思陵殉社稷後有望於南都擁立也江邊老人
淚暗泣眼昏不見風塵清憂時感事古今一轍

詠史

臥薪嘗膽日。縱飲擘牋時。但識憑江險。而忘厝火危。一堂爭洛蜀。四鎮角熊羆。此日王夷甫。清言或未宜。
君臣魚水合。半壁且遊嬉。樂奏李天下。歌傳郭順時。還須求故劍。慎勿剪連枝。野老瞻烏意。茫然空爾思。
此留都事勢也不止於從臣皆半醉天子自無
愁矣須求故劍勿剪連枝當時草野自存公論

亂後哭友

故友如黃葉。傷心漸覺稀。途窮天地窄。世亂死生微。腹痛車頻過。琴亡人已非。嗟余稱後死。慟哭返荆扉。

哭劉剩菴先生

名永錫

萬里離家客。孤身易簣時。變名唯恐識。後死尙嫌遲。麥飯鄰僧薦。蓬廬野父悲。招魂弟子事。愧乏楚人辭。

顧夢游

夢游字與治江寧學生

訪鄒滿字溪上

言尋居士家。薄暮清溪道。荒原鳥獨飛。寒木雲相抱。入室聞疎鐘。開門見秋潦。落葉坐來多。清風時一掃。

同蔡大美徐曰贊沈治先秦淮夕泛

落日澹生煙。波明影碧天。人來花檻裏。酒出板橋邊。楊柳風千樹。笙歌月一船。十年重對此。回首各淒然。

社集天界循公房

來已半春徂。佳游欣有徒。鳥窺遲日下。花近午風蘇。世事到山盡。高言對佛無。杖錢曾不繫。隨意乞香廚。

錢秉鐙

秉鐙字幼光桐城人。○幼光胃好情性無意工詩。五言似陶公。亦在神理不在字句與高忠憲歸待詔所謂同工異曲者也。

效淵明飲酒詩

寄生大塊中。何者爲我故。譬如逆旅物。暫有安足據。在世雖百年。畢竟舍之去。臨去豈不戀。戀亦不得住。所以達觀人。澹然隨所遇。委順生死間。不厭亦不慕。日飲一杯酒。可以全此趣。

田園雜詩

夙昔慕躬耕。所樂山澤居。憂患驅我遠。常恐此志虛。十載一言歸。舊宅已焚如。嗟我昆與弟。茅茨倚廢墟。徘徊靡所栖。還結田中廬。結廬雖不廣。牀席容有餘。牀上何所有。一二古人書。熒熒披上麥。青青畦間蔬。日入開我卷。日出把我鋤。仲春邁時雨。旣雨旋亦晴。百草吐生意。衆鳥喧新聲。紛紛羣動出。各各有其營。孰是形骸具。而懷安居情。老農憫我拙。解輓爲我耕。教以駕馭法。使我牛肯行。置酒謝老農。願言俟秋成。

一春勤稼穡。草木荒東園。今晨始芟刈。逝將除其根。良苗常恐短。惡草常恐繁。腰斧伐荆棘。用以衛籬藩。荆棘傷我手。淋漓手中痕。手傷不足道。籬弱何以存。家人挈酒至。滿斟在瓦盆。勸我飲一醉。頽然臥前軒。前軒無人來。春風開我門。

鷄鳴識夜旦。鳥鳴識天時。東臯人語語。我起毋乃遲。攬衣出門早。且復驅其兒。黃犢初教成。我鋤子則犁。犁鋤豈不苦。衣食道在茲。道旁一老父。顰蹙前致辭。言兒筋力薄。稼穡非所宜。詩書世所輕。猶是祖父遺。如何舍素業。自甘辛苦爲。多謝老父言。此意君未知。呼兒且飯牛。吾去燒東菑。若一說明。索然無味。

春天不久晴。衣垢及時澣。身上何所著。敝襦及衾短。家人念我寒。一杯爲斟滿。酒滿不可多。農事不可緩。奮身田野閒。襟帶忽以散。乃知四體勤。無衣亦自煖。君看狐貉溫。轉使腰肢嬾。

人生會有盡。行止非自由。止亦不可趣。行亦不可留。如何柴桑叟。汲汲爲此憂。終年痛飲酒。冀以忘其愁。吾身聽物化。化及事則休。當其未化時。焉能棄所謀。有子亦須教。有田亦望收。天心與人事。何息不周流。我不離世間。而願與天游。焉能外親戚。視之同聚漚。乃知黃老書。不如孔與周。末章將倫常用。存順沒寧和盤托出。可以想其品矣。概

金陵卽事

秋山無樹故峻嶒。幾度支筇未忍登。荒路行愁逢牧馬。舊交老漸變高僧。鐘樓自吼南朝寺。佛塔還然半

夜燈莫向雨花臺北望。寒雲黯淡是鍾陵。

顧

絳字寧人。後更名炎。武崑山人。終於山西。○寧人肆力於學。自天文地理古今治亂之迹。以絳及金石銘碣音韻字畫。無不窮極根柢。韻語其餘事也。然詞必已出。事必精當。風雷之氣。松

柏之質。兩者兼有。就詩品論。亦不肯作第二流人。

述古

微言既以絕。一變為縱橫。下以游俠權。上以刑名衡。六國固蚩蚩。漢興亦攘攘。不有董夫子。大道何由明。孝武尊六經。其功冠百王。節義生人材。流風被東京。世儒昧治本。一槩而相量。於乎三代還。此人安可忘。六經之所傳。訓詁為之祖。仲尼貴多聞。漢人猶近古。禮器與聲容。習之疑可睹。大哉鄭康成。探蹟靡不舉。六藝既該通。百家亦兼取。至今三禮存。其學非小補。後代尚清談。士苴斥鄒魯。哆口論性道。捫籥同矇瞽。清言何足論。宋人掃斥箋疏。亦偏見也。篇中議論。豈云小補。

五國並時亡。世道當一變。掃地而更新。三王功可見。鼓琴歌有虞。釣者知其善。區區山澤間。道足開南面。天步未回旋。九州待龍戰。空有濟世心。生不逢堯禪。何必會風雲。弟子皆英彥。俗吏不知人。寥落儒林傳。自註文中子書五國並時而亡。蓋傷先王之道盡墜。故君子大其言。極其敗。於是乎掃地而求更新也。○後賢以隋史無王通傳。疑為烏有先生。果爾。古人之可疑者多矣。此詩可為正論。

謁夷齊廟

言登孤竹山。愴焉思古聖。荒祠寄山椒。過者生恭敬。百里亦足君。未肯滑吾性。遜國全天倫。遠行辟虐政。

甘餓首陽岑。不忍臣二姓。可爲百世師。風操一何勁。悲哉尼父窮。每歷邦君聘。楚狂歌鳳衰。荷蕢識擊磬。自非爲斯人。棲棲無乃佞。我亦客諸侯。猶須善辭命。終懷耿介心。不踐脂韋徑。庶幾保平生。可以垂神聽。唐人登首陽山。只淡淡寫景。此作者自抒懷抱。應以議論爲長。

過矩亭拜李先生墓下

人生無賢愚。大節本所共。蹉跎一失身。豈不負絃誦。卓哉李先生。九流稱博綜。心鄙馬季長。不作西第頌。屏居向郊坰。食淡常屢空。清修比范丹。聰記如應奉。力學不求聞。終焉老家術。同時程中丞。一疏亦驚衆。玉璽安足陳。亟進名臣用。自註。中丞名紹。德州左衛人。巡撫河南時。漳河旁得玉璽。上疏奏黨論正紛拏。璽不足珍。國家以賢爲寶。薦黨籍諸臣十餘人。不納。遂謝病歸。黨論正紛拏。中朝並歸訟。世推山東豪。三李尤放縱。祠奄與哭典。後先相伯仲。初踰士類閑。竟折邦家棟。悲哉五十年。風塵尚瀕洞。我來拜遺阡。增此儒林重。雖無警欬接。猶有風流送。自非隨武賢。九原誰與從。自註。漢司隸校尉魯峻碑。

休神家術。

龍門

巨地黃河出。開天此一門。千秋憑大禹。萬里下崑崙。入廟焄蒿接。臨流想像存。無人書壁問。倚馬日將昏。

嵩山

位宅中央正。高疑上界鄰。石開曾出啓。嶽降再生申。老柏搖新翠。幽花茁晚春。豈知巢許窟。多有濟時人。

酬王處士九日見懷之作

是日驚秋老。相望各一涯。離懷銷濁酒。愁眼見黃花。天地存肝膽。江山閱鬢華。多蒙千里訊。逐客已無家。

與江南諸子別

絕塞飄零苦著書。竭來行李問何如。雲生岱北天多雨。水決淮壩地上魚。濁酒不忘千載上。荒雞猶唱二更餘。諸公莫效王尼歎。隨處容身足草廬。自註。管輅別傳。雞一二更鳴者爲荒雞。晉書王尼傳。尼早喪婦。車上嘗歎曰。滄海橫流。處處不安也。

酬傅處士

清切頻吹越石笳。窮愁猶駕阮生車。時當漢臘遺臣祭。義激韓讐舊相家。陵闕生哀回夕照。河山垂淚發春花。相將便是天涯侶。不用虛乘犯斗槎。

劉諫議祠賈

皂囊青史漫傳名。白日黃泉氣未平。自古國亡緣宦者。可憐身沒尙書生。荒阡草長妖狐出。舊驛風寒倦馬行。一自德陵升馭後。山河祠廟總淪傾。

贈郝將軍太極

溧人。天啓中守霑益。余於絃功疏識其姓名。今爲醫客於吳之上津橋。言及舊事。感而有贈。

曾提一旅制黔中。水蘭諸酋指顧空。入楚廉頗猶未老。過秦扁鵲更能工。風高劍氣蛤川外。水沸茶聲鶴

澗東橋畔相逢不相識。漫將方技試英雄。

賦得秋柳

昔日金枝間白花。只今搖落向天涯。條空不繫長征馬。葉少難藏覓宿鴉。垂老桓公重出塞。罷官陶令乍歸家。先皇玉座靈和殿。淚灑西風向日斜。此小小題俱有關係。杜陵詠物體。

華山

四序乘金氣。三峰壓大河。巨靈雄最鳳。白帝儼巍峩。地劣窺天井。雲深拜斗阿。夕嵐開翠巘。初月上青柯。欲摘星辰墮。還虞虎豹訶。正冠朝殿闔。持杖叱羲和。勢扼雙嶠壯。功從駟伐多。未歸桃塞馬。終負魯陽戈。山鬼知秦帝。蠻王屬趙佗。出關收楚魏。浮水下江沱。老尚思三輔。愁仍續九歌。唯應王景略。歲晚一來過。

禹陵

大禹巡南守。相傳此地崩。禮同虞帝陟。神契鼎湖升。窆石形模古。墟宮世代仍。探奇疑是穴。考典或言陵。玉帛千年會。山河一氣憑。御香來敕使。主守付髡僧。樹暗巖雲積。苔深壑雨蒸。鶴鷗呼冢柏。蝙蝠下祠燈。餘烈猶於越。分封並杞鄩。國詒明德胙。人有霸圖稱。往者三光墜。江干一障乘。投戈降北固。授子守西興。沖主常虛己。謀臣動自矜。普天皆爵祿。無地使賢能。合戰山回霧。窮追海踐冰。蠡城迷白草。鏡沼爛紅菱。樵採岡林徧。弓刀塢壁增。遺文留仆碣。仄徑長荒藤。望古頻搔首。嗟今更撫膺。會稽山色好。悽惻獨攀登。

高漸離擊筑

神州移水德。故鼎去山東。斷霓夫人劍。殘煙郭隗宮。身留烈士後。跡混市兒中。改服心猶苦。知音耳自通。沈淪餘技藝。恍惚本英雄。壯節悲遲暮。羈魂迫固窮。一吟遼海怨。再奏薊邱風。不復荆卿和。哀哉六國空。

韓

洽洽字君望長洲人隱居陽山

題李龍眠諸夷職貢圖

元豐三年畫

有唐貞觀萬國寧。殊方異域皆來庭。立本爲圖擬王會。詭形怪狀流丹青。龍眠居士生有宋。未必諸蕃真入貢。得毋舊本重臨摹。左食貫胸聊玩弄。元豐天子承平日。君臣競講強兵術。不知中國正凋殘。馳想海邦兼日出。貢粳西旅四夷賓。作訓猶煩保傅臣。爲問伯時圖作貢。何如鄭俠繪流民。如此立意方異風雲月露愚采明未諸賢

詩當谷音一集可也

黃孝子端木萬里尋親

父子分殊域。趨庭道路難。一身衝虎豹。萬死涉風湍。乍識容顏是。翻悲涕淚乾。故園今共反。猶作夢中看。

雪下紅

籬落徧積素。愈知顏色丹。故非嘉卉列。聊作野花看。天道存微物。韶華惜歲闌。芳心良獨苦。誰謂不知寒。

鐵馬

急響中宵發。凌空鐵騎行。不知風信至。頓使旅魂驚。當世正多事。吾儕方苦兵。那堪檐宇下。又作戰場聲。
下半忽然推開感慨時事詠物詩中別有天地。

關山月

曉角數聲哀。邊風捲地來。十年征戍客。不上望鄉臺。
翻進一層倍覺沉痛。

聞鴈

朔風吹鴈渡江干。月白霜清響尙寒。孤客幾回愁裏聽。故鄉何處報平安。

朱鶴齡

鶴齡字長孺吳江縣學生。

感遇

薇蕨苟可采。何必在首陽。清流苟可泛。何必在滄浪。至人處委蛇。守己非一方。直木寧見伐。芳蘭寧遂傷。縱志游霄漢。俯仰隨翱翔。

陳

忱字遐心烏程人。

閱羅隱詩

餘杭山水役精魂。末世才人眼界昏。憔悴感恩依尙父。可憐尙父事朱溫。
非貶昭諫借此發出正論也。○武肅不討朱溫實爲當時恨事。

知李亞子真英雄矣。

李沂沂字子化興沂化縣學生

贈魏叔子

魏生嶽嶽目如電。董子祠旁忽相見。豫章國士天下聞。生不逢時且貧賤。東西奔走非無故。側身海內求英彥。卽今屠釣豈無人。常恐摧頽筋力變。握手數語露肺肝。別我西歸尋考槃。子之往兮各努力。歲暮雨雪江風寒。

挽從伯瞻鹿公

喪亂君臣在。偏安社稷蕪。封章懸日月。旅櫬歷江湖。報國餘孤劍。匡時屈壯圖。故園春樹綠。愁聽野禽呼。

王翊翊字介人嘉興布衣。○介人七言。如周道秋風行黍稷。漢宮春雨長蒲桃。西蜀論通司馬檄。中山謗滿樂羊書。夜月旌旗五馬渡。秋風草木八公山。極工鑄語。無竟陵氣習。

村居

獨樹寒煙外。孤村流水間。偶隨花草去。遠逐漁樵還。川暝罷垂釣。日斜長掩關。何年事高隱。歸臥鹿門山。

客中九日

細雨成陰近夕陽。湖邊飛閣照寒塘。黃花應笑關山客。每歲登高在異鄉。沈子山云。不失唐音。

沈自然自然字君服。吳江人。

江南樂

初景爛銀浦。溢溢浮鷗鷺。儂情兩搖蕩。持比春江色。江深蓮子齊。水暖鴛鴦棲。不須更相問。家住橫塘西。橫塘連夾浦。曲曲明如許。誰打白蘋開。前溪夜來雨。雨霽上南樓。天高水影浮。出門郎不見。仍蕩采蓮舟。
音節神似西州曲。

屠

曠字闕伯嘉興縣學生

贈別袁重其

高飛鴻鴈滿關河。此日寒江起夕波。庾信哀時常作客。梁園去國獨行歌。霜淒茂苑清砧急。月照荒臺落葉多。爲問吳中舊知己。空山叢桂近如何。

卷十二

龔

賢字半千上元人

扁舟

扁舟當曉發。沙岸杳然空。人語蠻烟外。雞鳴海色中。短衣曾去國。白首尙飄蓬。不讀荆軻傳。羞爲一劍雄。

顧

苓字云美吳縣人吳江貢生

石公山

明詩別裁 二卷十二

茫茫三萬頃。日夜浴青蔥。骨立風雲外。孤撐濤浪中。若令當路出。應作一關雄。朱勔真多事。荆榛滿故宮。

應歎賢者不用而小人誤國也。下半拓開得唐人格律。

杜

濬濬字于皇黃岡人。○茶村長篇頗近頹唐。又聞燈船鼓吹。以此得名其實頹唐之尤者也。茲錄其整頓有骨格者。

游夾山漾

出塢謝羣賢。放舸理長嘯。煙岫映澄波。始知所歷妙。林壑羅秋姿。紫翠冒寒照。蘋汀欲爲雪。楓岸忽如燒。目逐絕境往。意愜佳處要。層峯何嬋娟。灣環亦窈窕。泛漾疑江湖。回帆復蘿蔦。面面見道場。一起憑弔。尋幽不覺遲。歸晚顧而笑。石門免見訶。登樓感同調。

嵇康

嵇康人中龍。義不可當世。視彼盜國臣。伎倆如兒戲。吐辭薄湯武。千載有生氣。臨命索琴彈。聊示不屑意。

登金山塔

極目非無岸。滄波接大荒。人煙沙鳥白。春色嶺雲黃。出世登初地。思家傍戰場。咄哉天咫尺。消息轉茫茫。

蒼蒼莽莽。自是大家舉止。

焦山

觸處迷人代。茲山尙姓焦。上頭仍棟宇。到眼忽雲霄。樹色南徐近。江聲北岸遙。衣冠留洞壑。不必訪松寮。

出郭來差遠。憑高望獨深。江分神禹跡。海見魯連心。密竹藏金像。回流灌石林。擬尋幽絕處。却誦白頭吟。

方文文字爾止桐城人

攝山絕頂

下方惟見石。不信有柴荆。仄徑盤空上。危峯到頂平。夕陽千嶺秀。春水一江明。愁絕浮雲外。蒼茫舊帝京。

岑

徵徵字金紀南海人

湘潭晚春寄耒陽胡使君

花落鶻啼日欲曛。白蘋洲畔悵離羣。東風綠遍章臺柳。夜雨寒生夢澤雲。避地少陵猶寄食。依人王粲漫從軍。春深塞鴈皆還北。書札何因報使君。

紀映鍾

映鍾字伯紫上元人

學圃贈鄧生

我爲東湖樵。子學南山圃。相逢大道旁。雪涕問勞苦。我逢冬青樹。再拜不敢斧。子有東陵瓜。屢潰深秋雨。生事尙饑寒。吟詩坐蒿堵。

申涵光

涵光字覺盟廣平人

路氏妹江南使來

骨肉何由見。音書隔歲通。雨深楊子驛。霜白趙王宮。旅食憐空橐。鄉心逐斷篷。十年戀慈母。淚盡北來鴻。

懷太原傅青主

曾約溪村訪釣竿。數年設榻待君歡。亂離苦憶良朋少。衰病應愁遠道難。晉國山川容白髮。中原天地此黃冠。幸將卷帙傳高迹。日向晴窗展畫看。

蔣

易字前民。江都人。

清涼山頂留別杜于皇

招提上夕陽。別酒置崇岡。秋老孤帆色。人輕百戰場。江雲平楚岸。風葉減吳霜。來日空回首。思君獨渺茫。

戴

冠字巖仲。更名易。南枝山陰人。

釣臺懷古

赤伏符興罷戰爭。釣竿三尺足平生。遠攜仙女桐江隱。深悔羊裘大澤行。一夜星辰凌帝座。九重貴賤見交情。請看七里瀧中水。未到錢唐徹底清。南枝釣臺詩。多至千餘章。皆潦倒淺率。此擇其尤雅者。首尾渾成。精神滿腹。可以傳世。

費

密字此度。四川成都人。亂後流寓揚州。

朝天峽

一過朝天峽。巴山斷入秦。大江流漢水。孤艇接殘春。暮色愁過客。風光惑榜人。明年在何處。杯酒慰艱辛。

三四語十字成句。王新城
尙書所謂十字堪千古也。

棧中

棧閣通秦道。青天不易行。盡過奇絕處。不負有平生。白馬巖中出。黃牛壁上耕。野花埋輦處。幸蜀只空名。

朱茂暉

茂暉字子若秀水人。祖蔭授中書舍人。

哭譚禮部元孩

去日乘桴易。歸愁度嶺艱。河山成死別。兒女望生還。劍氣沉三島。文星隕百蠻。旅魂招未得。何處望鄉關。

朱茂曙

茂曙字子衡秀水縣學生。

秦淮河春游卽事

橋下溪流燕尾分。灣頭新水慣湔裙。六朝芳草年年綠。雙調鳴箏戶戶聞。春雨杏花虞學士。酒旗山郭杜司勳。兒童也愛晴明好。紙剪風鳶各一羣。

王光承

光承字玠右上海諸生。

送人之廣南

並馬銜盃日未曛。羊城山水正愁君。秋聲已入庭前樹。客路遙尋嶺外雲。溟海上連辰極動。星河南去越天分。年來莫問流人狀。知有清猿不可聞。

俞汝言汝言字石吉秀水諸生

進艇

晴川曲曲抱沙隄。岸柳依依遠近齊。山色欲開疎雨外。夕陽忽在亂峯西。舟前波浪沓流駛。望裏煙嵐魯樹低。作客乘春行處好。故鄉曾否息征鞮。

張綱孫綱孫字祖望錢塘人。○古詩得杜一體。時武陵諸子以祖望爲最。

涿州城

曉霜不在地。微白生牛背。遙望涿鹿城。嶮然沙磧內。控縲走其下。壁立皆土塊。此地古范陽。甲兵天下最。側耳聞啼飢。傷心自我輩。野狼遇人嗥。蒼鷹攫雉碎。生涯底如此。浩歎茲行邁。

白竹村

路盤白竹村。峗崎探窮谷。居人八九家。林杪構破屋。下惟四柱立。亭亭不附木。仰視如鳥巢。夕暝梯雲宿。已防虎豹害。復懼麋鹿觸。我行多彷徨。歧路不敢哭。日晚慎前行。何處堪投足。

晏城

小小古晏城。西對華不音花。注昔之晉卻克。逐馬匝此處。我行實已倦。解鞍歇薄暮。鳴梟嘯其羣。老烏守枯樹。不見古人跡。斷碑委樵路。手摸苔蘚痕。字句讀未誤。平仲之采地。緬然起思慕。奈何千載後。蕪沒如

野戍相望有遠山。恐是齊朝附。

苦旱行

田中無水騎馬過。苗葉半黃蟲齧破。五月不雨至六月。農夫仰天淚交墮。去年臘盡頻下雪。父老俱言水應大。如何三伏無片雲。米價騰貴人飢餓。大河之壩風揚沙。桔槔無用袖手坐。林木焦殺鳥開口。魴魚枯乾溝底臥。人人氣喘面皮黑。十箇熱病死九箇。安得昊天降靈雨。童兒歡笑父老賀。高田低田薄有收。比里稍可完國課。不然官吏猛如虎。終朝鞭扑疇能那。

吳

騏字日千。華亭布衣。

喜汪振生歸自雲南

萬里歸來日蓬蒿。滿華門登堂一長慟。兄弟幾人存。豺虎關山險。烽煙日月昏。無窮故交意。相與盡清尊。

漢昭烈

名儒盧鄭久周旋。正值黃星受命年。龍種已移三統曆。蠶叢還闕半隅天。金甌付託耕莘佐。玉几彌留顧命篇。一代英雄生死際。銅臺遺令最堪憐。足令老媿死。

感時書事寄計子山陸孝曾

十月寒風急。浮雲暗大荒。客行愁道路。時事慮蕭牆。薊北非吾土。秦中亦異鄉。空憂天欲墜。未見日重光。

廟略慚靈武。軍聲謝朔方。元臣誇定策。列帥許勤王。好爵娛姻婭。官評視篋筐。簾編青鳥骨。玉斲辟邪香。冠蓋晨先集。笙歌夜未央。冰蠶裁寶帳。墮馬鬪新裝。營窟謀初遂。憑城氣轉揚。荆牛烹可待。國狗噬何狂。鐵券封蘇峻。丹書錫董昌。中朝容桀梟。羣醜益鴟張。百里無煙火。千村絕稻梁。軍行咸擁婦。鬼哭暗聞殤。朽索飢難馭。開籠飽欲颺。先須憂輦轂。莫道劃沮漳。每作蛇蟲鬪。深虞鷓蚌亡。內睽戎伏莽。外侮剝侵牀。劇盜鋒初遠。函關勢尙強。霧迷黃帝陣。彗集紫微房。造次分旄節。安危作棟梁。諸公咸倚重。吾意獨徬徨。厚寵雖三錫。雄圖愧一匡。籓籬殊未固。肘腋况難防。邯敗惟降楚。溫強且叛唐。養蛇將螫手。筦庫遂探囊。下土棲蓬室。無因叫帝閭。詩題蕉葉遍。風到葛衣涼。濁酒醜難醉。悲歌激不妨。私心圖國是。未敢告明堂。同社多英俊。居貧更慨慷。華陰終拂拭。霄漢自飛翔。壯志清河洛。交情重太行。風濤爲砥柱。冰雪見松篁。縱使三靈改。無移百鍊剛。累朝皆養士。努力念前皇。此亦留都實錄也。閩主無愁。羣姦障蔽。強藩跋扈。生民塗炭。作者痛哭言之。激於板蕩之章矣。

塞下曲

四牡駢駢出玉門。詔持繒帛賜烏孫。爲言侍子今無恙。初在京師讀魯論。

少年行

紅玉鞍驕碧玉驄。樂遊原上柳絲風。詔求季布今何處。只在三千奴僕中。

茂陵

茂陵枯柏自巒岘。露重珠襦馬上寒。獨與銅人相對哭。三更殘月下金盤。

書李舒章詩後

胡笳曲就聲多怨。破鏡詩成意自慚。庾信文章真健筆。可憐江北望江南。惜其清才。哀其遭遇。言下無限徘徊。

周

箕箕字青士。嘉興布衣。隱於市。

哭然公

然公釋門老。獨臥孤峯雲。古貌世莫見。高風予夙聞。松杉手自種。虎豹時爲羣。歎息永徂謝。山堂空夕曛。懷舊爲亡友。王翊作

南浦驚心憶往年。送君獨上子猷船。烏衣舊巷看猶在。馬首長途信可憐。煙樹瘴深過嶺日。寒潮風急渡江天。寧知陸賈遺歸橐。空爲王孫給墓田。

陳恭尹

恭尹字元孝。廣州潤德人。

蜀中

子規啼罷客天涯。蜀道如天古所嗟。諸葛威靈存八陣。漢朝終始在三巴。通牛峽路連雲棧。如馬瞿唐走浪花。擬酌昔賢魚水地。海棠開遍野人家。高祖以蜀王。後主以蜀亡。明眼人可與論古。

鄴中

山河百戰鼎終分。歎息漳南日暮雲。亂世奸雄空復爾。一家辭賦最憐君。銅臺未散吹笙伎。石馬先傳出水文。七十二墳秋草遍。更無人表漢將軍。表揚才華。襁奪。表魄。最爲定論。

隋宮

穀洛通淮日夜流。渚荷宮樹不曾秋。十年士女河邊骨。一笑君王鏡裏頭。月下虹蜺生水殿。天中絲管在迷樓。繁華往事邗溝外。風起楊花無那愁。

發舟寄湛用啗鍾裴仙湛天石

扶胥古渡水淒淒。雨後移舟望轉迷。數口寄居秋草外。一身爲客楚雲西。家無兄弟依朋友。地夾河山畏鼓鼙。知己片言應不負。亂離兒女藉提攜。

虎邱題壁

虎跡蒼茫霸業沉。古時山色尙陰陰。半樓月影千家笛。萬里天涯一夜砧。南國干戈征士淚。西風刀剪美人心。市中亦有吹簫客。乞食吳門秋又深。

秋日西郊讌集

時風子歸自塞上。

黍苗無際鴈高飛。對酒心知此日稀。珠海寺邊遊子合。玉門關外故人歸。半生歲月看流水。百戰山河見落暉。欲灑新亭數行淚。南朝風景已全非。

明妃怨

生死歸殊俗。君王命妾來。莫令青塚草。生近李陵臺。
韻語中明是非。定賞罰。居然史筆。

徐

夜夜字東痴山東新城人。

九日得顧寧人書

故國千年恨。他鄉九日心。山陵餘涕淚。風雨罷登臨。異縣傳書遠。經時怨別深。陶潛籬下意。誰復續高吟。

余

懷懷字澹心。福建莆田人。

金陵雜感

六朝佳麗晚煙浮。擘阮彈箏上酒樓。小扇畫鸞乘霧去。輕帆帶雨入江流。山中夢冷依弘景。湖畔歌殘倚莫愁。吳殿金釵梁院鼓。楊花燕子共悠悠。

由畫溪經三箬入合溪

畫舫隨風入畫溪。秋高天闊五峯低。綠蘿僧院孤煙外。紅樹人家小閣西。箬水長清魚可數。篁山將盡鳥空啼。桃源彷彿無尋處。楓葉紛紛路欲迷。
晚唐風格。

潘問奇

帆問奇字雪錢塘人。

自磁州趨邯鄲途中卽事

中宵聞霹發。日出走黃沙。風力能飛石。河冰不陷車。郊寒騰俊鶻。樹老立飢鴉。傍午停征轡。炊煙得幾家。
比山虛風落石尤險。每下一字俱有鋒稜。

金棺峽

濤聲何所似。石罅走雷霆。地拔雙崖起。天餘一綫青。真形獐獮古。毒霧蝮蛇腥。我欲窮深險。誰能覓五丁。

肅寧縣有故瑤魏忠賢地宅

肅寧池館舊連阡。過客追思鹿馬年。齊國豎刁呼尚父。漢朝名士拜中涓。北司計就書難上。元祐碑成事可憐。獨喜左楊崇廟食。春來一曲奏神絃。

周同谷同谷字鶴

流螢詞

偶因微雨點蒼苔。還被輕風扇復開。應為前身是芳草。多情頻上院牆來。

梵梵梵琦字楚石象山人居海鹽天寧寺明初琦徵至京建法會賜座第一○以下僧詩

曉過西湖

船上見月如可呼。愛之且復留斯須。青山倒影水連郭。白藕作花香滿湖。仙林寺遠鐘已動。靈隱塔高燈欲無。西風吹人不得寐。坐聽魚蟹翻菰蒲。
釋子詩取無蔬筍氣者。寥寥數章已盡其概。

漢北懷古

曠野多遺骨。前朝數用兵。烽連都護府。柵遶可敦城。象膽隨時轉。駝蹄入夜明。卻因班定遠。牽動故鄉情。北入窮荒野。人如曠古時。天山新有唱。耶律晚能詩。共說羊堪種。誰知繭作絲。漫漫風雪裏。南望是京師。

居庸關

天畔浮雲雲表峯。北遊奇險見居庸。力排劍戟三千士。門掩山河百二重。渠答自今收戰馬。兜鈴無復置邊烽。上都避暑頻來往。飛鳥猶能識袞龍。

宗

宗泐字季潭。臨海人。洪武初舉高行沙門。居首遣往西域求遺經。授左善世。

夏夜與錢子貞集西齋賦詩敘別

明月不可招。流光入堂中。白雲不可約。挂我屋上松。茲會固難得。後會寧易逢。明朝在東郭。隔水但聞鐘。

聽泉軒爲藏無盡作

若人有耳惟聽泉。泉聲入耳長涓涓。穿林出澗度天樂。終古不斷冰絲絃。此聲不來耳不往。中自寂然遣外響。青燈照壁夜沉沉。獨倚軒窗月東上。

守

守仁字一初。富陽人。住持靈隱。洪武中徵授右善世。

弘上人所蓄秋山圖

萬峯霜晴翠如洗，峯底行雲度流水。西北高樓爽氣邊，江南落木秋聲裏。兼葭潮長魚在梁，白鷗飛盡天茫茫。松根丈人讀書處，時有疎鐘來上方。仙槎影沒銀漢遠，木末芙蓉爲誰剪。何處涼風送客船，歸來似是東曹掾。東曹頗笑未識機，挂帆直待鱸魚肥。山川搖落已如此，未信草露霑人衣。

道

道衍字斯道，長洲人。洪武中徵入侍燕府，後以靖難功特授少師。

京口覽古

譙欄年來戰血乾，煙花猶自半凋殘。五州山近朝雲亂，萬歲樓空夜月寒。江水無潮通鐵甕，野田有路到金壇。蕭梁事業今何在，北固青青客倦看。

大

大同字妙止，會稽人。延慶寺僧，修永樂大典。

讀謝翱傳

南奔北走家何在，七里灘前許劍來。厓海夜寒惟月上，冬青樹老又花開。側身天地聊晞髮，悵望江山獨把杯。一掬當年知己淚，秋風灑盡下西臺。

明

秀明秀字雪江，海鹽人。祝髮天寧寺。○時有雪江僧送王伯安謫龍場驛丞，有蠻煙瘦馬經荒驛，瘴雨寒雞夢早朝。句上句寫投荒景象，下則忠愛之心亦俱傳出矣。是爲風雅正聲。

送陳墨山還吳淞兼柬胡秋田

五茸城外月不見，十年餘顧我曾遊地。因君得寄書，津亭然夜火。江市賣鱸魚，若見秋田父。還勞問起居。

宗倫字性
彝字溪人

旅懷

東吳隔千里。歸計尙茫然。忽見梅花發。他鄉又一年。

通

潤通潤字一
雨吳僧

種松老人

飯後罷鋤春。寒山信短筇。偶隨孤犢去。適與老人逢。見面不知姓。自言能種松。橫岡千萬樹。大半已成龍。
格高本之唐人訪陸鴻漸不遇詩

道

源道源字石林太倉人
居吳北禪寺

早梅

萬樹寒無色。南枝獨有花。香聞流水處。影落野人家。

讀

徹讀徹字蒼雪滇南人
住吳中中峯

別吳中諸子

相晤了無意。臨歧還黯然。回看吳苑樹。獨上秣陵船。春老還山路。江昏欲雨天。白鷗略似我。聚散綠波前。

送朗壻入匡山

偶向匡廬去。安禪第幾重。九江黃葉寺。五老白雲峯。落日眠蒼兕。飛泉下玉龍。到時應爲我。致意虎谿松。
著雪五言有風吹殘雪樹人語夕陽山句七言有十日花開湖上路半春家在雪中山句王阮亭尙書賞之采入詩話中

今種今種字一靈番禹人

魯連臺

一笑無秦帝。飄然向海東。誰能排大難。不屑計奇功。古戍三秋雁。高臺萬木風。從來天下士。只在布衣中。
骨力排氣神完氣足起語超落語勁中間十字成句放開眼界一覽衆山小矣

晉太尉劉琨墓

扶風歌未罷。國勢日倉皇。辛苦盧從事。相依在晉陽。風吹沙磧草。月滿塞樓霜。遺墓東安縣。蕭蕭徧白楊。

攝山秋夕

秋林無靜樹。葉落鳥頻驚。一夜疑風雨。不知山月生。松門開積翠。潭水入空明。漸覺天雞曉。披衣念遠征。

自白下至樵李與諸子約遊山陰

最恨秦淮柳。長條復短條。秋風吹落葉。一夜別南朝。范蠡河邊客。相將蕩畫橈。言尋大禹穴。直渡浙江潮。
一氣赴題有神無跡在唐人中亦不多見

粵江秋夜

明月生珠澗。蒼茫萬里愁。笙歌喧極浦。風露滿孤舟。落雁栖難定。寒潮靜不流。年來秋望苦。不上五層樓。

由雲母峯上大小石樓

獨上朱明頂。高尋仙子蹤。玉樓夾日月。秋瀑飛芙蓉。白髮幾時變。青鸞安可從。何人吹鐵笛。忽過麻姑峯。

郭貞順

貞順潮陽周仲玉妻。明初師下嶺南。指揮俞良輔征諸塞之未服者。貞順從。伯玉居溪頭塞。作詩上之。良輔覽詩大喜。一塞得全。○以下名婉詩。

上俞將軍

將軍開國之武臣。早附鳳翼攀龍鱗。煙雲慘淡遍九野。半夜捧出扶桑輪。前年引兵下南粵。眼底羣雄盡流血。馬蹄帶得淮河冰。灑向江南作晴雪。潮陽僻在南海濱。十載不斷干戈塵。仁風溥被萬里外。天子亦念遐方民。將軍高名邁千古。五千健兒猛如虎。輕裘緩轡踏地來。不減襄陽晉羊祜。此時特奉明主恩。金印斗大龜龍紋。大開藩衛制方面。期以忠義酬明君。宣威布德民大悅。把菜一笠誰敢奪。黃犢春耕萬隴雲。鸞龍夜臥千江月。去歲壺陽戍守時。下車愛民如愛兒。壺山蒼蒼壺水碧。父老至今歌詠之。欲爲將軍紀勳績。天家自有如椽筆。但囑壺民歌太平。磨厓勒盡韓山石。

陸

娟陸德蘊女。馬龍妻。

代父送人之新安

津亭楊柳碧穉穉。人立東風酒半酣。萬點落花舟一葉。載將春色過江南。

沈瓊蓮

瓊蓮字瑩中烏程人弘治初選入掖庭官女學士

送弟溥試春官

少小離家侍禁闈。人間天上兩依稀。朝迎鳳輦趨青瑣。夕捧鸞書入紫微。銀燭燒殘空有夢。玉釵敲斷未成歸。年年望汝登金籍。同補山龍上袞衣。

屈安人

安人華陰人副都御史直之女參議韓邦靖妻

送夫入覲

君往燕山去。棄妾雒水旁。雒水向東流。妾魂隨飛揚。丈夫輕離別。所志在四方。努力事明主。肯爲兒女傷。君有雙老親。垂白坐高堂。晨昏妾定省。喜懼君自量。珍重復珍重。丁寧須記將。既爲遠別去。飲余手中觴。莫辭手中觴。爲君整行裝。陽關歌欲斷。柳條絲更長。閨閣詩盡洗金粉。獨標高格。既取風雅。亦用垂教。別於時俗金粉之習。

黃安人

安人遂寧人黃簡肅司之女。修撰楊愼繼室。

寄外

雁飛曾不度衡陽。錦字何由寄永昌。三春花柳妾薄命。六詔風煙君斷腸。日歸日歸愁歲暮。其雨其雨怨朝陽。相聞空有刀鐙約。何日金雞下夜郎。重陽韻首句或改衡湘。

方維儀

維儀桐城人。大理卿大鎮之女。適姚孫榮。夫天請大歸守志。

死別離

昔聞生別離。不言死別離。無論生與死。我獨身當之。北風吹枯桑。日夜爲我悲。上視滄浪天。下無黃口兒。人生不如死。父母泣相持。黃鳥各東西。秋草亦參差。予生何所爲。死亦何所辭。白日有如此。我心徒自知。

出塞

辭家萬里戍。關路隔風煙。賦重無餘餉。邊荒不種田。小兵知有死。貪吏尙求錢。倚賴君王福。何時唱凱還。

旅秋聞寇

蟋蟀吟秋戶。涼風起暮山。衰年逢世亂。故國幾時還。盜賊侵南甸。軍書下北關。生民塗炭盡。積血染刀鏃。
如讀杜老傷時之作。聞關中乃有此人。

黃幼藻

幼藻字漢薦。莆田人。蘇州府通判。議之女。

題明妃出塞圖

天外邊風撲面沙。舉頭何處是中華。早知身被丹青誤。但嫁巫山百姓家。
亦作黃潛仲昭詩。

商景蘭

景蘭會稽人。吏部尙書周祚女。祁公彪佳配。

悼亡

公自垂千古。吾猶戀一生。君臣原大節。兒女亦人情。折檻生前事。遺碑死後名。存亡雖異路。貞白本相成。

曹壽奴壽奴小字山姑崇禎間吳興女子

夫君北行以菩提數珠留贈

百八菩提子紅絲貫小纓無眠後夜月留記遠鐘聲關合無迹

俛遜朝鮮○遜同鵠人世居俛葦河因以爲氏官端本堂正字○以下外國詩

山雨

一夜山中雨林端風怒號不知溪水長祇覺釣船高純乎天籟

申從漢官成均直講

傷春

茶甌飲罷睡初輕隔屋聞吹紫玉笙燕子不來春又去滿庭紅雨落無聲

崔澱澱字彥沉海州人進士

春日

楊柳依依江水生杏花如雪落無聲青霞卷盡畫樓出中有玉人吹玉笙

成侃爵里未詳○成侃至鄭之升見朝鮮采風錄官爵世次俱闕

囉噴曲

爲報郎君道。今年歸未遲。江頭春草綠。是妾斷腸時。

林 悌

閨怨

十五越溪女。含羞語不發。歸來掩重門。泣向梨花月。如讀崔國輔小詩。

姜克誠

湖堂早起

江月曉欲沉。宿雲寒未去。但聞柔櫓聲。不見舟行處。唐無名氏有煙昏不見人。隱隱數聲櫓句。傳寫曉景。俱非畫筆能到。

李仁老

題杏花鸚鵡圖

欲雨未雨春陰垂。杏花一枝復兩枝。問誰領得春消息。惟有鸚之與鵲之。

鄭之升

留別

悵望溪亭夕。照明綠楊如畫。春城無人爲唱陽關曲。惟有青山送我。行。情致纏綿。比唐人作更翻得別。

許景樊。景樊字闡雪。七歲作廣寒宮上梁文。長適進士金成立。成立殉國。難許以節見。

塞上

侵雲石磴馬蹄穿。涉盡重岡若上天。秋晚魚龍眠巨壑。雨晴虹蜺落飛泉。將軍鼓角行邊急。公主琵琶說怨偏。日暮爲君歌出塞。劍花騰躍匣中蓮。

望高臺

層臺一柱壓嵯峨。西北浮雲接塞多。鐵峽霸圖龍已去。穆陵秋色雁初過。山迴大陸吞三郡。水割平原納九河。萬里登臨日將暮。醉憑青嶂獨悲歌。風格意度俱好。錢牧齋因其近七子體故亦貶之。

李

氏趙媛

登樓

紅闌六曲壓銀河。瑞霧霏霏濕翠羅。明月不知滄海暮。九疑山下白雲多。

占城貢使

江樓留別

青嶂俯樓樓俯波。遠人送客此經過。西風揚子江邊柳。落葉不如離思多。

洞庭老人

歌

八十滄浪一老翁。蘆花江上水連空。世間多少乘除事。良夜月明收釣筒。

無名氏

題西山清涼寺壁

山僧汲空潭。驚起二龍子。百里雲濛濛。三日雨不止。

上海图书馆藏书



A541 212 0006 1949B

中華民國二十二年十一月初版
中華民國二十六年二月三版

(36063)

國學基明詩別裁一冊
本叢書

每冊實價國幣貳角伍分

外埠酌加運費匯費

編輯者

沈德潛
周準

發行人

王雲五
上海河南路

印刷所

商務印書館
上海河南路

發行所

商務印書館
上海及各埠



特價 13.00